
INSAIT

Momase
rijon i bin
gutpela
long
Krismas

-pes 2

Skul fi
sabsidi
gen
long
Morobe

-pes 5

Politik na
Bisnis
ripot long
Yia 2000

pes 12 - 13

NPF askim plis long sasim Jimmy Maladina

YAKAM KELO i raitim

NESENEL Providen Fan (NPF) i salim komplem i go pinis long Plis Komisina John Wakon long karimaut eksen long hevi we bikpela mani i bin paul long NPF taim olpela siaman Jimmy Maladina i bin stap long opis.

NPF i mekim dispela komplem egensim olpela siaman Jimmy Maladina we ol i tok em i bin mekim planti rong pasin long NPF olsem na ol i laikim plis i mas mekim eksen long dispela.

Komplem pas i tok Mista Maladina i

bin mekim planti bikpela asua we i sut long pasin stil na pretim ol witnes. Olsem na long dispela taim NPF i laik lusim ol dispela wok bilong painimaut na karimaut eksen i go long han bilong plis fraud skwat.

Long makim NPF, eking Menesing Dairekta Rod Mitchell i tok komplem bilong NPF i sut long:

- Mista Maladina i bin pasim tok wantaim ol arapela olsem Shuichi Taniguchi, Kazu Kobayashi, Herman Leahy na Ken Yapane long paulim na kisim mani bilong NPF long pasin hait.

- Haitim na paulim mani bilong

NPF we Ken Yapane na Jimmy Maladina bai kisim long hait na karamap pasin bihain long taim Tower o bikpela NPF tawa long Mosb i pinis na long dispela hait o karamap rot tu bai kisim moa mani bilong NPF yet taim Kumagai Gumi, kampani husat i wokim dispela tawa bai kisim moa kos long wokim dispela tawa na tupela bai kisim mani gen long dispela kampani.

- Jimmy Maladina i pasim tok wantaim lori Veraga na Mariano Lakae long paulim na kisim mani bilong NPF long ol propeti bilong em.

- lori Veraga na Jimmy Maladina

bai kisim mani bilong NPF hait long sasim ekstra fi long makim kos bilong graun long Waigani we ol wok i kamap bilong kisim dispela graun i go long nem bilong NPF. Tasol taim olgeta wok bilong kisim dispela graun i go long NPF bai abrus na go long Jimmy Maladina na lori Veraga.

- Wankain tu, Jimmy Maladina wantaim Mariano Lakae i laik mekim wankain pasin tu long dispela Waigani graun long sasim ekstra kos long veluim dispela graun na bihain bai tupela i kisim mani long en hait long NPF.


- Jimmy Maladina i pasim tok wantaim Herman Leahy na Philip Eludeme long mekim hait wok na pasin bilong paulim mani bilong NPF.

- Traim long paulim mani bilong NPF we Jimmy Maladina, Herman Leahy na Philip Eludeme bai salim graun long Waigani i go long NPF we prais bai abrusim mak tru bilong graun. Dispela em ol yet i save olsem prais i antap long prais tru bilong graun.

- Jimmy Maladina i gat nem long lukautim ol propeti bilong NPF bihainim lo bilong NPF tasol em i laik senisim ol dispela propeti i go aninit long em yet long yusim.

- Em i makim NPF na i save kisim Dairekta fi na ol sampela bikpela samting bilong NPF i kam long Vengold Inc tasol em i kisim ol dispela samting i go long nem bilong em yet.

Komplem bilong NPF i go long plis i tok dispela em ol sampela komplem ol i ken givim tasol ol bai wok klostu yet long givim moa ripot long ol hevi we i lukim NPF i lusim bikpela mani tru taim Jimmy Maladina i bin siaman bilong NPF.



• Ol yangpela manki ya i kisim setifiket long winim tripela de AIDs progrem long Goroka las wik. Foto: SAPE METTA.

NAMBA olsem 18 kalabus lain i bin ronawe long Bomana haus kalabus long Mosbi long Sarere Desemba 23, 2000. Ol dispela 18 kalabus lain i bin go antap long het bilong haus na kalapim waia banis na go pundaun long hap sait na ronawe nabaut.

Eking Plis Komisina Joseph Kupo i tokaut olsem ol manmeri husat i stap insait long Sentrel provins na Mosbi siti i mas lukaut gut long Nu Yia taim. Bikos ol dispela lain i gat nem nogut long ol kain kain bikpela trabel olsem ol bikpela stil, kilim man i dai na bagarapim ol meri. Ol kalabus lain ya em:

Vincent Kim 20 krismas bilong ples Ainte Kainantu Isten Hailans provins (stil yusim sotgan), Manuel Java Gorla 19 krismas bilong ples Kemeng Boana Morobe provins (stil na kilim man i dai), Manai Dernui Nicholas 27 krismas ples Moro Afore Oro provins (stil, kilim na i dai na i laik kilim man), Paul Gumasa 21 krismas ples Oroipa, Tapini Sentel provins (bikpela stil), Yangau Peter 18 krismas Soku ples Tapini (stil), Peter laiam Ivoro 15 krismas

18 kalabus lain ronawe long Bomana

Aivara ples Tapini (stil), Russell Dauma 21 krismas Logea ples Samarai (stil) rupa Vali 17 krismas Kwarimar, pice Rigo Sentrel provins (stil wantaim sotgan), Allan David harem 17 krismas Belavisa ples Fane Sentrel provins (stil), Eddie Steven 20 krismas ples Tatape Magarima Sauten hailans provins (stil), Kenneth Varagi 17 krismas Kwapeupa ples Aroma Sentrel provins ((stil), Philip Katau 23 krismas ples Aniwai, Guari Sentrel provins (kilim man i dai), Avana Gini bilong Gosoru ples Kwikila Sentrel provins (stil wantaim sotgan), Andrew Ambrose Maniva 19 krismas moimo ples Garaina Morobe provins (bagarapim meri), Paul Andrew Rau 18 krismas Siria ples Waima Sentrel provins (stil), Jacob Simon Aiagi 30 krismas Karude ples Ioma Oro provins (prelim man), Julius Oeva 18 krismas Moimo ples garaina Morobe provins (stil), Roy Laiam 18 krismas givena: Guari ples Tapini Sentrel provins. Ol

dispela kalabus lain i bin ronawe taim olgeta manmeri insait long Papua Niugini i bin sindaun isi long amamasim Krismas na Nu Yia insait long kantri.

Eking Komisina Mista Kupo i tok ol dispela lain husat i ronawe na ol lain husat i no bin mekim gut wok bilong ol i mekim bikpela asua tru. Ol rekot long bipo i soim olsem taim bikpela namba bilong ol kalabus lain i ronawe olsem, dispela i save mekim laip na sindaun i hat long ol manmeri, long kain bikpela de olsem.

Mista Kupo i singaut long Komisina bilong Koreksenal Sevises (CIS) long yusim wanem kain rot em i ken long traime holim bek ol dispela kalabus lain. Na tu ol menesmen bilong Bomana nau i mas kam aninit long wanpela wok glasim na skelim long traime stapim kain hevi olsem long i no ken kamap moa long bihain taim.

Nestlé MILO

IKEN WOKIM GUTPELA SAMTING LONG YU

PLIS RIPOOT

Kantri:

OLGETA hap bilong kantri i bin gat kwait wiken wantaim nogat bikpela trabel long dispela Krismas, plis i ripotim olsme.

Ekting Plis Komisina Joseph Kupo i tok Krismas wiken i bin kwait tasol. Em bin tok ol plis i karimaut ol spesel operesen na ol bai skruim dispela i go inap long Nu Yia taim neks wik.

Mista Kupo i tok Krismas taim long dispela yia i bin kwait long olgeta provins na dispela i soim olsem pablik i luksave na helpim ol plis long wok bilong ol long lukim olsem sindaun insait long ol komyniti na ples i kamap gut tasol long dispela bikpela pestode. Na Mista Kupo i autim tok amamas bilong em long pablik long dispela samting.

Long wankain taim tu, long Krismas wiken we i bin stat long Fraide Desemba 22 inap long Boksing de Tunde Desemba 26, ol ripot we ol plis i bin kisim long ol raskol na birua pasin i bin kamap long olgeta hap bilong kantri inap long 132 mak.mak ya i stap daunbilong long dispela bilong las yia na ol arapela yia moa. Insait long Nesenel Kapitel Distrik, ripot long tupela man i bin dai long tupela Hailans provins em long Enga na Westen Hailans, Tupela long Wes Nu Briten na tupela man long Nesenel Kapitel Distrik. Plis i mekim ol wok painimaut long ol dispela birua.

Taim Mista Kupo i makim maus bilong ol plis long tok amamas long pablik long gutpela helpim we ol i givim long plis long Krismas taim, em i askim ol long skruim dispela wankain helpim na sapot long Nu Yia.

Nesenel Kapitel Distrik:

Eitin (18) pela strongpela kriminel i bin ronawe long Bomana haus kalabus long Krismas Sarere Desemba 23. Na bos bilong ol plis long Nesenel Kapitel Distrik Tom Kulunga i tromoim tok i go long ol sinia manesmen bilong Koreksenal Institut Sevis long dispela samting.

Deputi Plis Komisina Joseph Kupo taim em i askim pablik insait long Mosbi siti long lukaut gut i stap i tok taim planti kalabus lain i save ronawe, ol i save kamapim sindaun nogut na trabel insait long komyniti. Em i askim ol CIS long yusim ol rot ol i gat long painim bek ol ronawe kalabus lain. Em i tok ol plis i stap insait long ol spesel operesen na i hat nau bikos ol i nogat inap lain long karimaut ol arapela wok. Em i wari bikos em i tok dispela i no namba wan taim ol strongpela kalabus lain i ronawe long Bomana. Em i askim pablik long helpim na em i mekim strongpela tok-tok olsem ol lain husat i haitim na lukautim ol dispela kalabuslain bai kisim bikpela mekim save long han bilong lo.

Mista Kulunga i tokaut long nem bilong ol dispela hatko ronawe kalabus lain olsem: Paul Gumasa wantaim 21 krismas, Peter Yangau wantaim 18 krismas, Peter Ivoro wantaim 15 krismas, Rupa Vali wantaim 17 krismas, Allan Hareai wantaim 17 krismas, Kenneth Varagi wantaim 17 krismas, Philip Katau wantaim 23 krismas, Avana Gini wantaim 20 krismas na Roy Laiam wantaim 18 krismas em olgeta bilong Sentrel provins, Andrew Maniva wantaim 19 krismas Julius Oeva i gat 18 krismas em tupela bilong Morobe provins, Russel dauma wantaim 21 krismas bilong Milen Be, Eddie Steven bilong Sauten Hailans, Manai Nicholas bilong Oro provins, Vincent Kim wantaim 20 krismas bilong Isten Hailans na Manua Gori wantaim 19 krismas.

Singaut long gavman bilong sapotim ol boda provins

WINIS MAP i raitim

Singaut long gavman bilong sapotim ol boda provins

WANPELA Sandaun komyuniti lida i apil long gavan bilong nau na bihain taim long katim moa mani i go long tupela boda provins bilong Westen na Sandaun.

Rex Namah, foma Sandaun Provinsel Asembli memba i tok gavman nai i mas luksave long olsem tupela provins ya em ol i impoten bikos ol i holim dua bilong nesenel sekyuti long kantri bikos ol i stap long boda namel long PNG na Indonesia.

"Nesenel gavman i mas katim moa mani long baset bilong Westen na Sandaun na ol i ken yusim dispela mani long stretim ol rot samting long tupela provins ya."

Mista Namah i laikim Nesenel Gavman long fandim ol wok long Vanimo-Grinriva

na Tabubil-Telefomin rot. Em i tok dispela tupela rot em ol i stap aninit long nesenel gavman.

Em i taim hevi i kamap long boda eria na Wes Papua, gavman i peim moa mani long salim ol sekyuriti fos na plis long balus i go.

Em i tok olgeta taim hevi i kamap long Wes Papua, ol boda ples na pipel i save kisim taim tru taim hevi i kalap i kam long PNG sait.

Em i tok dispela i no nupela samting na gavman i pasim ai na yau bilong em long tupela provins we hevi i save kukim ol gut.

Em i tok i moabeta long gavman i givim ol samting bilong lukautim ol yet na kantri olsem inap woklain, ol gutpela masin na ol gan samting long yusim taim hevi i kamap.

"Nau yet Vanimo i nogat ol wokman bikos plis stesen i pas long wanem em i gat hevi long sait bilong helt."

Em i tok ol bin salim planti ol plisman i

go bek long ol wan wan ples bilong ol na i gat liklik lain plisman tasol i stap.

Mista Namah i tok Foren Afeas long Waigani i no givim inap mani long Provinsel Foren Afeas opis long Vanimo na i moabeta long givim inap sapot long ol na ol bai karimaut gut ol wok taim ol hevi i kamap.

Em i bilip olsem Vanimo i mas gat mili-teri bareks bilong em. Nau Moem Bareks long Wewak i save salim ol soldia i go long Vanimo.

Em i tok i moabeta long ol atoriti i luk-luk, glasim na skelim ol samting na pasim Taurama Bareks long Mosbi na sanapim nupela bareks long Vanimo.

Em i tok ol iken muvim ol soldia long Taurama i go long Vanimo.

Em i tok sapos nogat ol i ken pasim Moem Bareks na muvim i go long Vanimo klostu long boda we planti hevi i save kamap long en we ol soldia i ken lukautim.

Kros long Sepik na Madang haiwe

ANNETTE SAMBAN SETE i raitim

OL pipel bilong Is Sepik na Madang i bung na toktok kros long dispela wok bai kamap long wokim wanpela rot long Bogia long Madang i go long Angoram long Is Sepik.

Ol i bin holim planti bung pinis long tupela provins wantaim long stopim dispela projek, stat long las mun taim Is Sepik Gavman, Arthur Somare i opim dispela projek.

Long dispela ol bung, ol pipel i toktok long as tingting bilong ol lida bilong ol long wokim rot ya, ol bus na diwai bilong ol long bihain taim nogut wok bilong rot i bagarapim na ol sosel hevi rot ya bai kisim i kam long ol pipel.

Man i go pas long ol grup ya, Alois Giamuru i tok long wanpela ripot pepa olsem ol Sepik i amamas long sevis Luteran Shipping i givim ol nau yet. Ol i tok ol i no laikim wanpela rot i bungim ol na Madang long tete.

Dispela pepa tu i tok Gavana bilong Sauten Hailens, Anderson Agiru i mas tok klia long as bilong givim K1.2 milien long is Sepi Gavman bilong wokim rot ya.

Pepa ya i tok ol sampela pipel bilong wanpela rijon long PNG

i save go stap long arapela provins we ol i no save tingim ol asples yet.

"Ol save go na mekim planti pasin i no gutpela tru olsem wantok pait, helt hevi, askim long bikpela kompensesen na wokim ol setelmen i go bikpela pepa ya i tok."

Em i tok tu olsem ol pipel bilong Bogia na Angoram i no laik lukim samting nau i wok long kamap long Mosbi, Lae na Madang long kamap long ol na ples bilong ol. Wanpela Sepik lida, Bruce Samban i tok ol pipel bilong em i no redi long dispela kain divelopmen, sapos em i divelopmen tru tru.

Em i tok ol pipel i no redi yet long yusim dispela rot na nogut ol konman i kam insait na yusim ol samting bilong ol pipel. Em i tok ol i ken bagarapim tu ol pipel.

Mista Samban i tok ol lidaman laik mekim nupela rot tasol ol i no stretim yet ol rot bilong provins.

Ol pipel bai putim wanpela protes mas long mun Januari yia 2001 na ol i tok sapos ol lida i no harim toktok bilong ol, orait ol bai stopim wok long rot projek ya.

Dispela Sepik na Madang haiwe projek we Mista Agiru i fandim bai lukim Angoram long is Sepik na Bogia long Madang i join long wanpela rot.

22 tieta grup memba long HIV/AIDS greduet long Madang

BEN TAUMAI i raitim

OL 22 Tieta Grup memba's long Madang husat bin holim tupela wik kos bilong ekt o bilong mekim drama bin pinisim skul bilong ol long las wik Fonde. Skul bilong ol ya em long ekt long karim aut awenes bilong sik HIV/AIDS insait long provins.

Dispela projek ya em UNICEF Nesenel Dipatmen bilong Helt na Madang Provinsel Gavman insait long Madang Provinsel HIV/AIDS komiti i fandim.

Long pasim bilong dispela kos we i kisim ol tieta memba's i pinisim tupela wik na nrapela tupela wik long go aut long olgeta 6-pela distrik bilong provins long mekim awenes long dispela sik nogut ya we i nogat marasin long em. Bung ya em ol holim long Riwo viles, we ekting Gavana bilong Madang Pengau Nengo wantaim ol provinsal eksekyutiv memba bilong em na ol sinia opisa bilong dipatmen bilong helt na tu ol sampela bikman olsem memba bilong Usino Bundi George Wan wantaim sinia stetmen Sir

Angmai Bilas tu bin kamap na witnessim. Ekting edvaisa bilong Helt Markus Katsau, Sief eksektiv Opisa bilong Modilon Jeneral Haus sik John Levi, wantaim Nesenel Kalsa Komisen opisa John Doa tu bin stap.

As tingting bilong dispela bung em long lainim ol dispela tieta memba ya bilong wanwan distrik bai ol gen go bek long distrik bilong ol na kamapim wanem kain tieta grup olsem long karimaut awenes bilong dispela sik nogut HIV/AIDS na skulim ol man-na meri long ples long rot we yu ken kisim dispela sik na arapela rot bilong abrusim dispela sik.

Man i go pas long dispela John Doa i tok, tieta i gat pawa long skulim ol man na meri bilong yumi long ples husat i no save gat sans long redio o niuspepa o i nogat save long rit na rait long lukim na klia long wanem samting ol lukim. Em gat eksen we yu ken lukim na ting olsem fani na lap tasol sapos yu sindaun gut na skelim bai yu save long mning bilong em na luksave long piksa.

Doa i tok ol kamap wantaim dispela tingting long yusim

tieta bikos em i no inap kostim ol man long ples mani na bai isi tu long ol luksave. Dispela kain samting olsem tu em ol wokim tu long Milen Be provins.

Ekting Gavana Nengo wantaim Doa, tupela bin givim aut tu ol setifiket i go long ol dispela tieta grup memba.

Mista Nengo husat em wanpela ekta tu bipo i tok, tieta em wanpela tul bilong komyunikesen long skulim ol man na meri long ples. Olsem na em tok, em amamas tru na askim ol tieta memba long go bek long ples na putim eksen wanem samting ol lainim pinis. Em tok, sik HIV/AIDS em sik nogut na em laikim olsem olgeta lain bilong ples mas save nau na i noken larim i go na bai kamap bikpela long provins tasol traime holim na daunim dispela namba i noken go bikpela long neks 5 pela yia.

- Nau yet long pinis bilong Jun long dispela yia i gat ripot long helt opis soim olsem i gat 33 rekot ol HIV positif, 8 ful blon ap tasol na sampela i dai pinis long Madang. Olsem na ol provinsel atoriti i no laikim dispela namba i mas i go antap.

Mista Nengo i tok olsem i no longtaim i go pinis Helt Minista Lodger Mond i tokaut olsem PNG nau i gat samting olsem 5 milien pipel na aut long dispela i gat samting olsem 10 na 15 tausen man na meri i gat pinis HIV/AIDS.

Dispela hevi em i no hevi bilong helt dipatmen wanpela nogat, em hevi bilong komyniti olsem na yumi olgeta mas joinim han long traime stopim o i no ken mekim na memba i go antap.

Em bai moa gutpela sapos olgeta papa na mama mas autim dispela hevi wantaim ol pikinini bilong ol long haus bilong ol yet tu long helpim na skulim ol pikinini bilong ol nogut bai tu let. Em i no samting bilong sem, nogat, Doa i tok.

Em tok sapos wanpela famili memba bilong yu kisim pinis orait yu mas kisim ol kam na lukautim ol gut i go inap ol lusim yu bikos em tu em man no meri ya.

Ol tieta grup memba ya bin putim kamap wanpela drama tu long soim hau o we ol ken kisim dispela sik nogut ya na i mekim tru planti man na meri i wari na i krai nabaut.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.
Acting Advertising Manager:
Jocko Oberleutter
Editor of Wantok:
Yakam Kelo

Papers distributed by air throughout PNG.
Available by air mail subscription within Papua New Guinea and overseas
Email address:
word@global.net.pg

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Baing i tok Sir Mekere i no strongpela lida

YAKAM KELO i raitim


MEMBA bilong Makam Andrew Baing i tok Praim Minista bilong Papua Niugini Sir Mekere Morauta em wanpela paul Praim Minista tru bikos em i nogat strong long sanap long ai bilong wanwan lida na tokim ol stret long em i laik rausim ol o long hevi ol i mekim.

Mista Baing i tok dispela i soim olsem Praim Minista i nogat strong long sanap strong na holim gut Gavman na em i soim tu olsem em i no inap lukautim gut kantri.

Mista Baing i mekim dispela toktok bihain long em i harim long nius olsem Praim Minista i rausim em long wok bilong em olsem Minista bilong Jastis long Tunde dispela wik.

Em i tok Praim Minista i bin rausim planti Minista tru insait long 17 mun Gavman i bin kamap. Na insait long taim tu, dispela Gavman bilong Sir Mekere i bin gat tripela Deputi Praim Minista. Ol dispela Deputi Praim Minista em John Pundari, Mao Zeming na nau Michael Ogio.

Mista Baing i tok em i lukim olsem ol hevi we i wok long kamap long kantri em olgeta asua i mas go long Sir Mekere Morauta bikos em i mekim planti senis klostu klostu tumas na ol wok i no kamap gut. Na dispela i soim olsem Sir Mekere Morauta i no go pas gut long kantri, em i tok.



• Sir Mekere.



• Mista Baing.

tingting na disisen bilong ol taim ol i laik vot o tok yesa long wanem kain bikpela senis o lo bilong kantri, na i noken wanpela man o pawa i kontrolim dispela pawa ol lida i gat, em i tok.

Mista Baing i tok em i lukim olsem dispela lo bilong Intagriti ov Politikel Pati na Kendidet em wanpela nogut lo tru na bai bringim planti bikpela hevi tru insait long politiks bilong kantri.

Membra bilong Makam i tok nau dispela Praim Minista i rausim em long wok, em i no inap moa long wok wantaim dispela Praim Minista gen. Mi no olsem ol arapela memba husat i save go bek gen long Praim Minista maski Praim Minista i rausim ol planti taim pinis. Bai mi wet long 2002 ileksen na sapos nupela Praim Minista i kamap, bai mi ken wok wantaim em. Tasol i no Sir Mekere Morauta o Bill Skate, Mista Baing i tokaut.

Krismas bin gutpela long olgeta provins

LYNNE MINIRU i raitim

EKTING plis komisina, Joseph Kupo i tok nogat planti trabel i kamap long Krismas.

Em i tok olgeta provins i lukim Krismas gut bilong wanem ol pipel i luksave long wok bilong ol plis na harim tok bilong ol.

Mista Kupo i tok amamas long ol manmeri long givim sapot bilong ol long ol plis manmeri long karimaut ol wok bilong ol we ol selebresen bilong Krismas i bin ron gut.

Dispela em i nambawan hap bilong operesen bilong ol plis long karimaut long Krismas na Nu Yia. Plis bai

mekim wankain wok long nupela yia 2001.

Plis i ripot olsem i gat 32 raskol pasin na eksiden i bin kamap insait long ol 20 provins. Dispela i soim olsem i gat tupela birua pasin i kamap long wan wan de long wanwan provins.

Bungim olgeta, Wes Nu Briten Provins i ripot olsem tupela man i dai na Westen Hailens i ripotim wanpela na Enga i ripotim wanpela.

As bilong ol man i dai em ol plis i no save na ol i wok yet long painaut.

Mista Kupo i tok ol plis i amamas long ol pablik long givim gutpela sapot long ol plis na ol i laik bai ol pablik i mekim wankain samting long Nu Yia.



Amamasim Krismas....

• Kainkain manmeri bin bihainim kainkain wei long amamasim Krismas. Planti i bin bung wantaim famili bilong ol long sios na makim bet de bilong Jisas Kraus husat ibin bon 2000 krismas i go pinis. Planti manmeri i bin malolo long wok na stretim bek-sait wantaim famili bilong ol long ples o haus. Wanwan manmeri bin raun long pati na dring wantaim. Nau em Krismas i go pinis na yumi wetim Niu Yia we bai kamap long neks wik Mande. Ol dispela pikinini i bin bung na singsing long haus lotu.

HEO givim wari long Helt Seketeri na DPM

BEN TAUMAI i raitim

OL eksekutiv bilong PNG Helt Ekstensen Ofises Asosiesen i givim pinis tupela sabmisen bilong ol i go pinis long Dipatmen bilong Helt Seketeri Dokta Raka Temu long Novemba 27.

Presiden bilong HEO asosiesen Joseph Zale i tokim Wantok olsem, ol tupela sabmisen ol givim long Helt Seketeri em long:

1. Riklasifikesen, o long impruvim tems na kondisen bilong olgeta HEO's insait long kantri. Sampela ol samting ol laikim na putim insait long dispela em long,

- apim ovatim alowens bilong ol
- apim onkol alowens na dispela bai karampim ol HEO's wokim ol klinikel duti tasol
- Domestik maket alowens
- Alowens bilong ol HEO's i tis long ol kolis na
- Risk o hai duti alowens.

Mista Zale i tok, nau yet ol save kisim tasol ol ovataim alowens na i no ol sampela olsem na asosiesen laikim olsem olgeta 500 HEO's long kantri mas kisim ol sampela ol alowens tu wantaim.

Em i go moa na tok tu olsem, narapela sabmisen bilong ol em bilong 'Medikal Sevises Act (Chapter 92), em bai karapim olgeta HEO woklain.

Long namba wan sabmisen ol tu givim kopi bilong em i go long dipatmen bilong Pesenel Menesmen.

Mista Zale i tok olsem, long nau yet em i no inap givim ol namba long hamas mak asosiesen i laikim, Tasol em tok em bai tokaut long dispela bihain long miting bilong ol wantaim Dokta Temu na Dipatmen bilong Pesenel Menesmen long mun Jun long neks yia. Em tok, "mi laik tokim olgeta memba bilong asosiesen long givim yet ol gutpela sevises bilong ol i go long ol pipel bilong dispela kantri long wanem hap yu stap long em. Long wanem asosiesen bai pait hat yet long stretim ol hevi yupela gat long em na noken ting olsem asosiesen i no mekim wok bilong nem".

"Mipela laik stretim ol dispela hevi long gutpela rot na i no long wokim ol kain pasin bilong straik nambaut".

Toktok bilong Presiden Zale i kisim gutpela bekim i kam tu long seketeri bilong Helt Dokta Temu insait long leta bilong em long stretim na gutpela rot dispela hevi na i no wankain olsem ol sampela ol asosiesen.


Sir Mekere tok em no paul lida

PRAIM Minista Sir Mekere Morauta i tok dispela toktok bilong Andrew Baing long tok olsem em i wanpela krangi lida i no sut stret long ol tok kros em i mekim. Sir Mekere i tok dispela tok hat egensim nupela lo bilong Intagriti ov Politikel Pati na Kendidet em i wanpela bikpela wok tru we planti man i putim bikpela strong na taim bilong ol igo insait long kamapim.


Sir Mekere i tok tu olsem em i laikim ol lida we i gat trupela bilip i stap long ol long wok klostu na sapot wantaim Praim Minista long ronim Gavman.

Em i tok em i no laikim tu pasin bilong wanwan lida i sanap na i nogat strong bilong pati bilong em i go wantaim. Long sait bilong Mista Baing, em yet i sanap na pati bilong em Pipels Progres Pati (PPP) i no save wantaim. Na dispela i mekim PPP i wanpela paul na longwe pati tru long wok klostu wantaim Gavman, Sir Mekere i mekim ol dispela toktok long bekim ol tok hat bilong Andrew Baing husat i raus long wok bilong em olsem Minista bilong Jastis.





NIUGINI AILAN NIUS



Politikel setelmen bai stretim hevi, Akotai i tok

POLITIKEL setemen tasol bai stretim Bogenvil hevi, Sentrel Bogenvil memba Sam Akoitai i tok.

Olsem na em i tok ol politisen i mas go pas long ol bikpela toktok i stu long ol samting long Bogenvil.

Mista Akoitai i tok em i pret olsem nau gen ol gavman opisa o ol biurokret i wok long go pas long ol politikel toktok na olsem hevi i wok long kamap long ol toktok bilong stretim ol trabel long Bogenvil.

"Mi pret olsem stat yet long 1988 taim hevi i bin stat inap long 1977, ol biurokret i bin go pas long ol Bogenvil pis na politikel toktok.

"Taim gavman i bin senis gen long 1999, mi lukim olsem ol biurokrat i tekova gen na hevi i wok long kamap gen na i wok long kisim longpela taim gen long kamap wantaim sampela gutpela samting, moa yuet long ol ki isu olsem gavman i gat moa pawa na independen vot.

"Ol samting i soim olsem Bogenvil isu i nitim politikel disisen long stretim hevi.

"Politiks i mas go pas long ol pis na politikel toktok," Mista Akoitai i tok.

Em i tok tu olsem Bogenvil i redi long holim ol pis na politikel toktok taim Nesenel Gavman i redi, Sentrel Bogenvil memba Sam Akoitai i tok.

Long dispela wik bipo Praim Minista Sir Mekere Morauta i rausim Sir Michael Somare olsem Bogenvil Afeas Minista, toktok i bin kamap olsem ol lida bai sindaun long ol toktok long Kokopo, Is Nu Briten long Desemba 27 na 28.

Bihain long tripela wik long Mosbi we ol i bin stap long toktok wantaim Nesenel Gavman long tupela bikpela samting em long gavman i gat moa pawa na independen vot, ol lida i bin go bek long ailan las wik.

Pret long prutflai bai bagarapim banana

Ripot i kamap olsem prutflai inap bagarap ol banana gaden na prut sapos ol atoriti i no mekim samting kwiktaim long stapim ol dispela binatang long bagarapim ol banana long Is Nu Briten.

Banana em i gutpela na bun kaikai tru bilong ol Is Nu Briten pipel.

Ol rises lain long Keravat Nesenel Agrikalsa Rises Institut (NARI) i painaut long dispela ol prutflai i kamap

planti long Is Nu Briten na sapos ol i no wokim samting kwiktaim long stapim ol long go planti, ol bai pulapim olgeta hap na bagarapim stret ol diwai bananana ol prut bilong ol.

NARI long las mun i bin kari-maut wanpela rises long ol dispela prutflai long ol eria long provins we i save kamapim planti ol banans.

I gat strongpela bilip olsem ol dispela pprutflai binatang

em ol i kisim ol i kam long Is Nu Briten long Lae taim bilong maunten paia long 1994 na long 1997 taim El Nino o bikpela san i b agarapim kantri. Long dispela tim namel long 40 inap long 60 prutflasi em ol bin karim i kam long Mosbi.

Tude ol prutflai ya i go planti na ol i stap long olgeta hap bilong Is Nu Briten olsem Keravat, Warangoi, Toma, Kokopo, Bitapaka, ol ples long

sautkos olsem Sikut na Gelagela setelmen, na ol blok long Vunapalading i go olsem long Lassul Be.

Ol ripot i tok ol prutflai ya i go pinis na sindaun long ol banana gaden long Pomio na ol Duk ov Yok Ailan i gat

Ol prutflai ya em ol liklik binatang flai olsem tasol ol flai yumi save lukim oleta de long en. tasol ol dispela ya i save kaikai long banana.



• Banana em bun kaikai tru bilong ol Tolai na narapela nambis pipel bilong PNG. Sapos binatang i bagarapim, planti manmeri bai kisim taim stret. Ol Tolai i save kaikai banana olsem bun kaikai olsem na ol banana i sanan na ol manmeri wantaim pikinini i kisim strong na i stap.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Biabia

BIABIA SO-OFF RAUN LONG KAR BILONG MINISTA !!!

MINISTA WETIM KAR LONG OPIS NA EM BELHAT NOGUT TRU !!!

DISPELA GK? DRIVA IGO WEZ? GK!!

EM RINGIM OL POLIS LONG TREKIM DAUN KAR !!!

YES, MI MINISTA.. PAI-NIM KAR BILONG MI NA LOKIM DISPELA DRIVA.

TAIM OL I PAINIM KAR, BIABIA I KISIM TAIM STRET !!!

Bogenvil bung bai kamap long Buka long Janueri 5

VERONICA HATUTASI i raitim

OL TOKTOK long Bogenvil bai i no inap kamap moa long Pot Mosbi, ol ripot i tok.

Ripot i tok insait long wanpela bung we ol bin holim long Sentrel Bogenvil, ol Bogenvil Revoluseneri Ami memba i bin tok strong olsem ol bung we ol nesenel na Bogenvil lida i holim long toktok long Bogenvil ken kamap long ol arapela provins tasol i no long Bogenvil. Na dispela we ol bin holim long Mosbi i no long taim i go pinis em laspela long en.

Dispela bung i no bin kamap wantaim wanpela kliapela agrimen we tupela sait i wanbel long en.

Long wankain taim tu, ol ripot we i wok long kamap long opis bilong Bogenvil Afeas Minista i no givim kliapela toktok long ples bung bai kamap.

Pastaim ol tok i go olsem bung namel long tupela grup bai i kamap long Kavieng long Nu Ailan provins long Desemba 27 na bihain gen, ol i tok long Kokopo na las long en i tok

ol bai holim ol toktok long Buka long Fraide Janueri 5, 2001.


Ripot long dispela i bin kamap long Sarere, Desemba 23 i kam long opis bilong Minista bilong Plening na Monitoring, Moi Avei.

Ripot i tok baipatisen Nesenel Komiti long Bogenvil bai wokabaut i go long Buka long Fraide Janueri 5 long bung na toktok wantaim ol Bogenvil lida.


Ripot i tok Gavana John Momis na Presiden bilong Bogenvil Pipels Kongres Joe Kabui bai go pas long dispela bung ya.

Bihainim ol politikel senis we Praim Minista i bin rausim Sir Michael Somare olsem Minista bilong Bogenvil Afeas, ol memba bilong Nesenel Komiti na ol Bogenvil lida i bin bung na pasim tok long ples bilong holim bung na ol arapela samting moa we ol bai tokrok long en long traim kamap wantaim politikel setelmen long bihain taim bilong Bogenvil.

Ripot i kam long Bogenvil i tok i bilip olsem long gavman bai tokaut long sanap bilong em.



SEPIK NIUS



Aitape len medieta laikim mani

FELIX RAMRAM i raitim

OL len medieta bilong Aitape Lumi ilektoret i singautim ol atoriti bilong Lens insait long provins long mekim ol samt- ing hariap na luksave long ol hevi ol len medieta i save bungim long wok ol i save mekim. Na stretim ol pepa wok na baim ol len medieta husat i wok long wetim alauens bilong ol inap 3-pela krismas olgeta.

Ol len medieta i tokim Wantok olsem planti taim ol i save bungim hevi bilong kros, belhat na pait i kam long ol tum- buna papagaun. Na gavman i mas luksave long ol dispela na planti arapela hevi i go wantaim wok ol i mekim. Na gavman i mas baim ol gut bihainim hevi na wok ol i mekim.

Mausman bilong ol len medieta Eddie Sani i bilong Aitape i tok. "Mi i singaut strong tru long Lens Atoriti long lukluk i go insait long hevi, bikpela tru long Aitape distrik. Na hariap long baim mipela. Mipela i no bin kisim ol alauens bilong mipela inap 3-pela krismas olgeta.

"Planti taim pinis mipela i traim long kisim gutpela bekim i kam long Provinsel Lens Opis long Vanimo. Tasol ol lens opisal tu i nogat gutpela ansa long givim mipela, na mipela i wet inap 3-pela yia olgeta long kisim ansa."

Mista Sani i go het na i tokaut tu olsem ol ripot i tokaut i gat mani long baim ol len medieta na ol viles kot mejistret. Na dispela ol mani ol atoriti i yusim pinis stat long 1998, 1999 na

2000. Tasol em i soim olsem ol len medieta i no kisim alauens bilong ol long ol dispela yia.

"Mipela ol len medieta i laik save wanem as na mipela i no kisim ol alauens bilong mipela sapos i gat mani long baim mipela. Olsem na mipela olgeta i sanap wantaim na singautim ol lens opisel bilong provins long tokim mipela wanem as na ol i no baim alauens bilong mipela ol len medieta.

"Mipela i sanap wantaim tu na singautim opis bilong provinsal edministreta long karimaut wanpela wok painimaut. Na tok klia long ol len medieta. Investigesen ya i mas painimaut wanem as na ol viles kot mejistret i no kisim alauens bilong ol", Eddie Sani i tokim Wantok.

Long dispela taim komyuniti lida bilong Aitape Is Kos Steven Holland i tok tu olsem. Wanem samtung Mista Sani i toktok long en i no tru bikos i bin longpela taim. Ol len medieta insait long Aitape distrik i stap long mekim wok bilong ol. Na bai i no stret long gavman i baim ol sapos ol i no save mekim wok bilong ol.

Em i go het na i tok olsem planti hevi bilong graun i stap yet. Na bai i gutpela samtung long ol lens opisel i mekim gut ol samtung na painimaut husat len medieta i mekim wok bilong eem? Orait ol lain husat i mekim wok tasol i ken kisim siaman bilong ol.

Wantok i no bin inap kisim sampela bekim i kam long ol lens opiesel long Vanimo bikos ol opis i pas long taim bilong Krismas na Niu Yia malolo.

Wes tenkim pipel bilong em long wokbung insait long yia 2000

VANIMO Green memba na Vais Minista bilong Tred na Industri Micah Wes i kisim dispela taim bilong krismas na Niu Yia malolo long tok amamas long olgeta lain husat i gat sampela samtung long mekim wantaim em olsem memba bilong ilektoret insait long Nesenel Palamen. Na tu long wanem kain ol wok ol i kamapim pinis insait long Yia 2000.

Memba bilong Vanimo Green i kisim taim tu long tenkim ol pipel bilong em husat i luksave long planti samtung. Na kamapim dispela wokbung wantaim em we i lukim Vanimo Green ilektoret i no bungim sampela bikpela hevi insait long Yia 2000.

Mista Wes i go het na i tok wanpela wok i bin kamap insait long Yia 2000, "tasol planti i no bin kamap bikos long sistem bilong gavman na ol lain ausait i wok insait long ronim dispela sistem". Em i go het na i tok ol projek we em i givim mani pinis long ol insait long Vanimo

Green ilektoret long Yia 1999 na 2000 i sampela piksa bilong lukluk na skelim long en. Ol projek olsem wokim rot na mentenens bilong ol rot na bris. Ol wok i slo o i no bin stat bikos i nogat masin na saveman bilong wokim ol dispela wok. Moa yet tu i gat saveman i stap long mekim wok, tasol ol i nogat haus long stap long Vanimo na karim aut ol dispela wok.

"Tasol ol lain husat i kisim pinis ol wok kamap o mani long helpim ol go hetim wok bilong ol em ol kisim pinis. Bikos long Yia 2001, ol lain husat i no kisim helpim yet bai kisim bilong ol."

Vais Minista bilong Tred na Industri i go het na i tok luksave bilong ol samtung na wokbung bilong olpela Yia i mas wankain long Yia 2001." Tasol Yia 2001 i mas kisim liklik namba moa antap long mak bilong Yia 2000, orait Yia 2001 i mas gutpela na winim Yia 2000, Mista Nes i tok.

Mista Wes i askim olgeta wanwan famili long lukautim ol yet long malolo bilong krismas

na Niu Yia. Em i tok long ol bikpela malolo na amamas i save kamapim hevi tu. Olsem na wanwan famili insait long taun na ol ples, olgeta i mas sindaun gut na holim liklik bung kaikai wantaim famili. Na noken go aut long dring spak na ron long ka bikos dispela kain amamas i save kamapim hevi long famili.

Long ol bikpela kampani insait long Vanimo, Mista Wes i tok tenkyu long wokbung wantaim em. Wanem ol wok sapos i no kamap gut long Yia 2000, long 2001 olgea i mas wok het long lukim olsem ol wok i go het na kamap gut. Olsem long pinis bilong wanwan de ol pipel i ken kisim gutpela sevis.

Ol sevis dipatmen na ejensis, Vanimo Green memba i askim ol long go het long givim gutpela sevis i go long pipel. Na wanem samtung ol i no bin inap mekim long Yia 2000, ol i mas redim ol yet long bungim salens bilong Yia 2001.

Tripela pawa jenereta long Wewak i bagarap

WEWAK taun i wok long bungim hevi long ol pawa jenereta long mun Oktoba i kam nau we tripela pawa jenereta long Wewak taun i bagarap pinis.

Insait long Elcom ripot long las mun, Eksekutiv Menesa bilong operesen Boga Tali i tokaut olsem long 7-pela jenereta, tripela i bagarap pinis. Na dispela i daunim namba bilong pawa we i save givim inap pawa saplai long Wewak taun.

Mista Boga i tok i gat bikpela wok nau long baim ol nupela pats bilong stretim ol dispela tripela pawa jenereta we i bungim hevi nau. Em i tok kos bilong baim ol dispela pats bai i olsem K800,000 olgeta.

Em i tok wanpela bikpela jenereta i gat bikpela hevi tru we krenk sap bilong em i mas kisim bikpela wok tru long stretim gut bai em i ken wok gut gen. I gat plen i stap pinis long senisim jenereta namba 8.

Vanimo Green memba bekim giaman ripot

I BIN gat ol ripot we i tok olsem pipel bilong Vanimo Green distrik i ronawe lusim asples bilong ol. Bikos long ol hevi na pait i stap namel long ol OPM paitman na soldia bilong Indonesia Gavman long boda bilong PNG na Indonesia long Wutung. Vanimo Green memba na Vais Minista bilong Tred na Industri Micah Wes i tokaut olsem dispela ripot i "wanpela giaman ripot."

Mista Wes i tokaut olsem ol pipel bilong em long distrik i sindaun yet long ples bilong ol na go kam mekim wok bilong ol. Na i tok sapos i gat hevi olsem i

kamap, em olsem memba bai i namba wan man long kisim dispela ripot i kam long ol opisa bilong em i stap long graun. Na em i autim tok long ol ausait man long mekim ol kain toktok we i no trupela.

"I gat tu ol gavman opisa i stap, bikpela tru ol opisa ausait i wok wantaim dispela boda hevi. Mi sutim tok long ol lain husat i raitim dispela giaman ripot. Ol i no toktok na kisim tingting bilong ol tu. Bikos ripot i toktok long ilektoret bilong ol na i stret olsem ol i mas toktok na kisim tingting bilong ol tu", Vais Minista Wes i tokaut.

Ripot i kam long Vanimo i tokaut tu olsem ripot bilong ol Wes Kos asples i ronawe lusim ples i no tru. Ol i wok long go kam na mekim bisnis bilong ol long taun na tu ol i go kam long Jayapura.


Wanpela pablik sevan asples i tokim Wantok long Vanimo olsem i nogat wanpela man bilong ol ples long Vanimo Wes Kos i ronawe lusim ples, olsem na dispela ripot i no tru na i wanpela giaman ripot we ol nius lain tu i helpim long giaman Papua Niugini.



• Planti hap long Sepik wara i save bagarapim ples. Lapun papa Kalitus i sanap arere long haus bilong em we wara i bin brukim. Planti hap bilong ol ples i save kisim taim long taim bilong tait wara.

Cat® IT28G

Integrated Toolcarrier



Performance You Can Feel

High horsepower and torque rise, greater rimpull, strong hydraulics and superior load control make the IT28G a solid and versatile performer. The best place you can evaluate this exceptional performance, of course, is from the operator's seat.

Value You Can See

A larger, intelligent-design operator station offers exceptional forward and peripheral visibility. Lower interior and exterior sound levels and larger fuel capacity make the IT28G easier to operate.

Reliability You Can Trust

Proven Cat power train and hydraulic components, exhaustive field testing and the world's best support system assures the IT28G will provide maximum uptime.

Check out the Cat IT28G at your nearest branch today!

Hastings Deering



PORT MORESBY Phone: 325 6422 Fax: 325 0774	TABUBIL Phone: 548 9045 Fax: 548 9155
LAE Phone: 472 2355 Fax: 472 1477	RABAUL Phone: 982 1244 Fax: 982 1129



SAUTEN



RIJON



Deputi seketeri bilong Leba na Emploimen i dai

LYNNE MINIRU i raitim

NAMBA tu seketeri bilong Dipatmen ov Leba na Emploimen, Emmanuel Abai i dai bihain long sampela spakman i paitim em nogut tru long hap stik.

Mista Abai husat i gat klostu long 45 krismas i bin stap long wanpela amamas bung long ples Siri long Yule Ailen taim em i painim dispela birua.

Provinsel Plis Komanda bilong Sentrel Provins, suprintenden Nema Mondia i tok dispela birua i kamap lond de 24 bilong Desemba we ol man long ples Siri long Yule Ailen i bin spak nogut tru na bihain long

wanpela kros toktok, pait i bin kirap na insait long dispela pait sampela man i kirap na paitim Mista Abai.

Ai witnes i bin tokim plis olsem ol man i bin paitim Mista Abai long wanpela hap stik na em i bin pundaun i go daun long graun.

Mista Mondia i tok ol i karim Mista Abai i kam long bikpela hausik long Mosbi tasol em i bin dai bihain long em i lusim planti blut.

Plis i wetim tasol ol dokta long mekim pos motem long luksave long dai bilong Mista Abai.

Mista Mondia i tok ol i no save sapos Mista Abai tu i dring na spak wantaim ol lain man ya.

Em i tok ol plis long Mande i bin holim

tupela saspek tasol wanpela bilong ol man husat i paitim Mista Abai i wok long hait yet.

Suprintenden Mondia i tok nogat planti trabel i bin kamap long Krismas wiken tasol dai bilong bikman bilong leba na employmen.

Ol plis long Sentrel Provins i ronim wankain operesen tasol olsem bipo.

Plis i pasim ol rot na sekim ol ka long kain samting olsem bia na ol arapela strongpela dring na ol gan na samting bilong pait.

Mista Mondia i tok ol i putim bikpela was long ol 18-pela strongpela ol raskol man husat i brukim Bomana Jel long Sarere na ronawe.

Plis i no kisim wanpela bilong ol man ya yet na ol i wok long blokim rot na sekim ol ples i

stap long ol haiwe bilong Hiritano na Magi.

Olgeta liklik distrik i gat plisman i stap long was long ol samting bilong Gavman.

Suprintenden Mondia i tok hap aste tasol em i bin salim wanpela mobail skwat i go antap long Tapini bikos i bin gat ripot olsem ol raskol i bin laik bagarapim ol samting bilong Gavman long hap.

Em i tok plis i raun long si tu long sekim sapos ol man i mekim sampela krangki bisnis antap long solwara.

Nogat planti samting olsem ol patrol ka na ol arapela samting long helpim ol plis tasol Mista Mondia i tok liklik ol i gat bai ol i yusim gut long mekim ol wok bilong ol long dispela taim i go inap long nu yia.

Oro Gavaman i no wan bel long 2001 baset

ORO Provinsel Gavman i no amamas long 2001 Nesenel Baset mani we Nesenel Gavman i katim long Oro Provins.

Ol memba bilong Oro asembli i mekim dispela toktok long taim ol i pasim K22 milien baset bilong ol na tok i no gat wanpela senis long baset bilong neks yia.

Praim Minista Sir Mekere Morauta i bin mekim promis long dispela yia long putim K5, 800,000 olsem gren mani insait long 2001 baset tasol Gavman i putim tasol K908,400 bihain long Sir Mekere yet i bin tok em bai putim K2,800,000 insait long baset.

Deputi Gavana na siaman bilong fainens na administresen, Wilson Wase i tok baset i go antap olsem 11 pesen tasol dispela 11 pesen em mani bilong ol tisa we Gavman i bin promisim ol Tising Sevis Komisin long dispela yia.

Mista Wase i tok wanem taim bai Gavman i apim baset bilong Oro Provins we provins i ken sanap long strong bilong em yet long sait bilong ekonomi bikos Oro em i wanpela provins we i no gat planti developmen i kamap.

Em i tok Gavman bilong em i bin kamapim wanpela baset we mak bilong mani i stap olsem K36 milien tasol Nesenel Gavman i bin katim i go long K20 milien na dispela i no gutpela long sait bilong ol senis i laik kamap long provins.


Bikpela sea long baset i go long pe bilong ol tisa we ol i kisim olsem K8, 065,000 na bihain long dispela em administresen gren we i kisim K1,526,600.

Mista Wase i tok provinsel gavman i plen long mekim olsem K2, 660, 700 olsem mani bilong provins yet.

Mista Wase i tok ol memba bilong asembli olsem maski Gavman i givim liklik mani bilong Baset 2001 long Oro, Gavman bilong Oro mas yusim gut dispela mani long pinisim yia 2001.

Em i mekim bikpela tok tenkyu i go long nupela administreta, Raphael Yibmaramba long kamapim progrem bilong baset.

Long wankain taim Oro Provinsel Gavman i pasim tok pinis long kisim Nesenel Gavman i go long kot sapos Nesenel Gavman i no givim gren ya bipo long dispela yia i pinis.



Kaikai bagarap nating

• Jatu Esawo, wanpela draiva bilong Sentrel Stoahaus na Saplai i wok long sekim ol bokis tin mit we i bin stap longpela taim tru na i bagarap. kaikai olsem rais, tin pis, piawa, suga na nara-pela kaikai i bin stap long hap inap long 1998 i kam inap nau. Ol dispela kaikai bilong Sentrel provins pipel husat kisim bagarap long El Nino o bikpela drai sisen. Nau kaikai bagarap pinis.

Lukaut long bikpela win wantaim ren

NESENEL Disasta Menesmen Opis (NDMO) wantaim PNG Nesenel Weda Sevis (PNGWS) i mekim strongpela tok lukaut long ol manmeri i silip arere long solwara bilong Nesenel Kapitel Distrik (NCD) na i go long Isten Milen Be olsem wanpela bikpela ren na win i kamap long Tores Streit long sait bilong Austrelia.

Ol traipela win i wok long kamap na dispela i ken bagarapim laip bilong ol pipel husat i save silip long ol dispela eria.

Dairekta Jenerel bilong NDMO, Henry Mokono i mekim dispela tok lukaut long ol pipel i stap long ol eria arere long nambis long lukautim ol gut bikos dispela strongpela win em i nogut na bai stap inap long narapela tripela de.

Em i toktok strong olsem i bai gutpela sapos olgeta manmeri i stap long haus bilong ol long dispela taim bilong Krismas na Nu Yia na no ken go aut long si long painim pis o raun nating inap ol lain long PNG Weda Sevis na NDMO i tok orait.

Mista Mokono i mekim wankain tok lukaut i go long ol bisnis haus bilong NCD na Sentrel Provins olsem traipela ren na win bai kamap long dispela taim olsem na ol bisnis manmeri bilong NCD na Sentrel i mas rausim ol samting i stap long eria bilong ol we ol i ting ren na win i ken yusim long bagarapim laip bilong ol pipel.

Em mekim bikpela tok lukaut tu long ol papama-long lukautim ol pikinini bilong ol long ol i no ken waswas long baret wara we bikpela ren i ken mekim wara i strong tumas na dispela i ken mekim pikinini i dringim wara na dai.

Bos bilong NDMO i tok lukaut tu long ol draiva bilong ol ka long draiv isi na no ken hariap tumas bikos ol rot long dispela taim i wet na i wel insait long siti.

BOROKO FOODWORLD AT GORDONS

Niu Yia

Spesols!

Fabulous Pork Luncheon 170gr	K1.42	Globe Curry Chicken 300gr	K2.30
Master Chef Coconut Milk 150gr	K3.21	Bluebird Sardines 425gr	K1.98
Maggi Noodles 85gr	K0.50t	Roots Rice 1kg	K1.55
Sanitarium Corn Flakes 250gr	K3.60	Power Rice 10kg	K16.38
Globe Corned Beef Round 300gr	K2.20	Dazzle Dishwash 375ml	K1.85
Diana Tuna 380gr	K2.15	Weet Bix 375gr	K4.06

Supa Spesol Prais!

Selebretim Niu Yia long Boroko Foodworld Supa Krismas Spesol!

EXTENDED TRADING HOURS
 Monday to Wednesday - 8.00am to 7.30pm
 Thursday / Friday - 8.00am to 8.00pm
 Saturday / Sunday - 8.00am to 7.00pm

Planti moa kaikai prais i go daun long en!
 Ph: 325 7566, 325 0863 Fax: 325 7096

 **HAILANS NUIS**

Ol nupela ambulens i ron long laik

LONG Isten Hailans planti lain man na meri i wok long kamap wantaim planti komplek bikos sampela samting ol i lukim i no stret na ol i no wanbel, tru long lukim planti ol samting em ol distrik sevises wokas i wok long mekim.

Ol samting em gavman i givim long yusim long helpim na givim sevis long ol pipel, tasol ol lain man na meri husat i go pas long ol distrik sevises opis i no yusim gut ol dispela samting.

"Dispela ol toktok em wanpela viles lida na kaunsila bilong Usire haus lain long Okapa Fenifa Sipi i mekim bihain long harim planti komplek i kamap long pasin bilong yusim nating nating ol helt sevis ka na ambulens em gavman i done-tim i go long givim sevis long wan-wan distrik insait long provins.

Mista Sipi i tok i no long taim i go pinis wanpela yangpela meri long haus lain bilong en bin dai bihain long em i bin kisim taim long karim pikinini.

Em i tok taim yangpela meri ya i wok long kisim taim i stap ol i bin

salim sampela yangpela man long i go daun long Okapa helt senta na kisim ambulens i kam antap na helpim dispela yangpela meri long kisim em i go daun long helt senta long karim pikinini.

Taim ol man ya i go daun long Okapa helt senta na askim long ambulens, ol helt wokas long hap i tok ambulens i go pinis long Goroka taun na i no inap kam bek long viles bilong ol. Taim ol i kamap long viles, ol i harim planti kra i na singaut long dispela yangpela meri. Bihain long sampela aua na meri ya i dai wantaim bebi insait long bel blong en," Mista Sipi i tok.

Em i tok nau yet planti manmeri na pikinini i wok long i dai yet long wanem taim ol i painim sik o ol meri i laik karim, i nogat gutpela trenspot sevis i stap long kisim ol dispela sik lain i go long ol helt senta na haus sik long kisim marasin. na tu planti taim ol i save harim olsem marasin i sot.

"Marasin na ol arapela samting bilong helpim na oraitim ol sikmanmeri i sot long wanem i nogat fans

long baim ol dispela samting we bai i ken helpim na givim laip long ol manmeri. Tasol i luk olsem i gat planti fans long baim ol nupela ekspensiv ka na ambulens. Watpo na Helt Dipatmen i lusim planti mani long baim ol dispela ekspensiv ka na ambulens na i no tingting long baim ol marasin. Long wanem kain rot bai dispela ol ekspensiv ka na ambulens bai givim laip na sevis long ol pipel? Mista Sipi i askim.

Em i tok Helt Dipatmen i ken baim ol ekspensiv ka na ambulens, tasol long sapatim long ronim ol helt senta na etpos bai hat tru. mekim olsem na planti ol helt senta na etpos i pas long wanem i nogat fans long ronim na givim sevis long trangu ol viles lain.

Kaunsila Sipi i tok planti lain i wok long komplek long wanem ol i wok long lukim ol dispela ekspensiv ka na ambulens i wok long karim ol man na meri na ron nating nating long laik i go i kam long taun. Ol i wok long yusim ol dispela ka na ambulens olsem praivet na PMV ka bilong ol.



• Ol pipel bilong Goroka i lukim wanpela nupela ambulens we man i makim opis bilong praim minista Koinbamong Wak (raithan) i givim wantaim ki i go lon gol Ikida bilong Goroka las wik. Foto: SAPE METTA

Dispela i soim olsem ol i no tingim trangu ol sikmanmeri na pikinini. Na we i stap sevis em Helt Dipatmen i ken mekim long ol pipel," Mista Sipi i askim

Nupela pri skul givim edukesen long ol pikinini

SKUL o edukesen bilong ol pikinini em i wanpela bikpela samting long wanem long pasin bilong lainim na kisim gutpela save bai i ken developim laip bilong ol wanwan long bihain. Na bihain long ol i pinisim edukesen bilong ol, ol i ken kisim gutpela wok o kirapim bisnis bilong ol yet na lukim gutpela sindaun.

Dispela em i sampela strongpela toktok Dairekta bilong Goroka Independent Pri-Skul (GIPS), Buckley Kaupa i bin mekim long taim 15-pela pri-skul pikirjini i pasim skul bilong ol tupela wik i go pinis.

GIPS em i wanpela pri-skul we i bin stat tasol long dispela ya na i bin ron long strong bilong en yet.

Em i no kisim sapat long provinsel edukesen dipatmen na ol arapela dipatmen na ol praivet sekta. Long dispela as ol i kolim dispela skul olsem Independent. Skul ya i sanap long strong bilong em yet.

Mista Kaupa i tok em i bin kamap wantaim dispela tingting bilong kamapim GIPS long wanem lukluk long ol arapela pri-skul, kos bilong ol i antap tumas na i nogat spes long kisim na putim trangu ol

pikinini long skul.

"As tingting bilong kamapim dispela pri-skul em long mekim moa spes na kisim moa pikinini i kam insait long lainim ol samting. Na mipela i no kisim ol yangpela pikinini i kam insait long lainim ol long rit na rait tasol. Mipela bai lainim ol tu long pasin bilong planim ol samting olsem kopi, sapis na ol arapela gaden kaikai. na dispela ol samting i ken helpim ol taim ol i go ap.

Ol i no inap long paul nabaut long wanem ol i lainim pinis pasin bilong groim ol dispela samting," Mista Kaupa i tok. Em i tok, "nau em i taim bilong yumi ol PNG long opim ai na wokim ol samting long strong bilong yumi (selp rilaiens).

Noken kamap olsem ol les man na meri na singaut tasol long pasin. Yumi mas stapim dispela sik nogut bilong singaut long kisim helpim na wokim ol samting long strong bilong yumi yet."

Mista Kaupa i tok GIPS bai op gen long Februari neks ya na husat mamapapa i laik enrolim ol pikinini bilong ol i welkam tasol. I gat planti spes na skul fi i no bikpela tumas.

Klinik op nau long givim helt sevis

SAPE METTA i raitim

BIHAIN long surikim planti taim long dispela ya, Not Goroka Eben Klinik i lukim opisel opening bilong en long Tunde, Disemba 12 we planti lain man, meri na pikinini tu i bin kamap long witnessim.

Minista bilong Helt na memba bilong Sinasina/Yongomugl Ludger Mond i bin opiseli opim dispela nupela klinik.

Long taim em i opim dispela klinik, Mista Mond i tok Goroka em i wanpela laki ilektoret long kamapim kain klinik. Planti ol arapela provins is ave askim long kisim fanding na sapat long kamapim kain klinik na ol helt senta, tasol ol i no save kisim long wanem i no gat mani na risos long helpim ol.

Em i tok sapos dispela kain nupela samting i kamap long givim gutpela helt sevis long ol manmeri na pikinini, em ol i mas lukautim gut.

Mista Mond i tok dispela klinik em i samting we gavman i kamapim long givim sevis long ol pipel, olsem na olgeta lain man meri husat bai i ken kisim sevis

long dispela klinik i mas lukautim gut dispela klinik, na i noken kisim ol tingting nogut long bagarapim.

Memba bilong Goroka na nupela Minista bilong Koreksenel Sevises, Henry Smith husat i bin kamap na stap insait tu long opim bilong dispela nupela klinik i sapatim toktok bilong wan wok na minista Mond.

Minista smith i tok klinik ya i kamap pinis long haus dua bilong planti lain manmeri na pikinini we i mekim isi long ol i ken i go long em na kisim sevis.

"Nau yupela ol lain long Not Goroka bai i no inap hatwok long i go i kam long ol arapela klinik long taun long wanem yupela i gat klinik bilong yupela yet em Not Goroka Eben Klinik we i op nau na bai givim sevis long yupela," Minista Smith i tok.

Em i tok klinik ya bai i no inap kamap sapos i nogat wokbung namel long oi papagraun na ol lida bilong provins.

"Mi laik tok amamas i go long papagraun long dispela graun em dispela klinik i sanap long en olsem na bai mi putim nem bilong dispela klinik ya olsem, Alekaizo Not Goroka Eben

Klinik," Mista Smith i tok.

Alekaizo em nem bilong wanpela bikman bilong Okiufa viles husat i papagraun bilong dispela graun we klinik ya i sanap long en.

Long sem taim minista Smith i bin givim wanpeal nupela Nissan Patrol Station Wagon A Wheel Drive ambulens we bai helpim Not Goroka Eben Klinik wantaim ol wok bilong en.

Ambulens ya i kos moa long K86,000 - na Mista Smith i tok tenk yu long PNG Board husat i fandim kos bilong dispela ambulens.

Mista Smith i tok tenkyu tu long tripela levul bilong gavman em Isten Hailans Provinsel Gavman, Goroka Eben Lokel Levul Gavman na opis bilong em yet long kamap wantaim ol fans bilong kamapim dispela nupela klinik we i kos samting olsem K431,000 olgeta.

Em i tok dispela em i wanpela pilot projek em dispela tripela levul bilong gavman i kamapim na ol i gat tingting long kamap wantaim plen bilong kamapim tupela moa nupela klinik we em i laik ol i mas sanapim long Is Goroka na Faniyufa.

WINIM K500 with HI-WAY



HI-WAY HARDMAN
Strongpela Bisket!
Paradise



HI-WAY Paradise BEEF
THE BIGGEST! 140g NET
4 BISKETS


Back to School with Hi-WAY Biscuits.
Your chance to win K500 towards 2001 school fee
There will be one (1) lucky winner in each province.

To enter, send in 3 empty wrappers of Hi-Way Beel or Hi-Way Hardman biscuits to:
Hi-Way Back to School Locked Mail Bag, Boroko, NCD, or drop your entry in box at participating stores.





MADANG NIUS



Madang plis fos i sot long plismanmeri, stesin komanda i tok

LYNNE MINIRU i raitim

PLIS dipatmen long Madang i redim ol plisman pinis long las mun yet long karimaut ol wok bilong ol long Krismas na Nu Yia.

Namba bilong ol plisman long Madang i no planti tumas bihain long ol helt atoriti i putim tambu long ol plis manmeri long silip long Kusbau Bareks.

Madang Provinsel Plis Komanda (PPC) i wok long sekim ol operesen bilong em long ol distriks long provins na i no bin stap long opis bilong em long toktok long krismas na nu yia operesen bilong ol plis.

Stesin komanda, Edgar Sebastine husat i makim maus bilong PPC i tok em i makim pinis 20 plisman long mekim ol wok bilong olsem wanpela spesel yunit long las mun yet na ol dispela plisman bai wok yet long krismas na nu yia.

Em i tok taim Kusbau bareks i bin pas, 53 plismanmeri i bin kisim taim stret long painim wanem hap long stap.

Sampela bilong ol i bin go long provins bilong ol, sampela i go stap wantaim ol wantok bilong ol long taun na setelmen na sampela asples yet i bin go long ples bilong ol.

Dispela i bin kamapim bikipela hevi tru long Madang plis fos olsem na ol plismanmeri nau i stap long Madang i wok long dabolim ol wok bilong tupela o tripela plisman.

Mista Sebastine i tok maski ol plismanmeri i mekim wok bilong arapela ol plismanmeri husat i go pinis, em i amamas long ol bikos ol i bihainim ol promis bilong ol olsem ol memba bilong plis fos.

Nau yet ol plis i mekim ol rot blok na sekim ol haus na ples long kisim ol raskolman husat i bin ronawe long Beon haus kalabus long dispela yia na long dispela operesen ol i kisim pinis tupela bilong ol rasol man na namba i go antap long faipela ol

raskolman ol i kisim pinis.

Ol i painaut tu olsem ol dispela stesin husat i bin go hensapim ol wokman long Malolo Plentesen Lods na kisim ol mani na samting em ol wanpela geng tasol husat i bin ronawe long Beon.

Stesin Komanda i tok ol dispela 20 plisman i statim operesen bilong ol long Sarere i go pinis long mekim bai ol pipel bilong Madang i ken amamas na stap gut long dispela krismas na nu yia.

"Mi raitim pinis wanpela leta i go long Madang provinsel gavman na ol bisnis haus insait long Madang long askim ol long helpim mipela long sait bilong mani na ol arapela samting long mipela long mekim ol wok bilong mipela long dispela taim bilong bikipela amamas na selebresen tasol nau yet nogat wanpela gutpela bekim i kam long mipela yet," Mista Sebastine i tok.

Em i tok ol Kopra Marketing Bod tasol i bin givim pinis tupela disel dram na wanpela petrol dram na dispela bai ol i yusim long krismas na nu yia.

Plis hetkwata long Mosbi i givim ol K2,000 long baim ol kaikai samting bilong ol plisman husat bai wok long krismas na nu yia.

Mista Sebastine i tok ol arapela i tok bai ol i helpim na ol i no soim wanpela han mak bilong ol yet.

Em i tok Madang i no olsem bipo bikos nau em namba bilong ol manmeri i go antap tru na olgeta de i gat ol liklik trabel.

"Planti ol manmeri i save ting olsem ol plismanmeri long Madang i planti tru tasol dispela i no stret.

Ol liklik lain tasol i wok long mekim wok bilong ol na mi laik toksave olsem ol plis dipatmen long hia i sot long ol plismanmeri."

Em i tok planti bisnis i wok long kamap long Madang na dispela i pulim planti manmeri long kam long Madang na taim ol i no painim wok, ol i mekim ol stil pasin.

Memba bilong Raikos i wetim Woks Dipatmen yet

BEN TAUMAI i raitim

MEMBA bilong Raikos, Stahl Musa i tok olsem em i katim pinis K2 milien na nau i stap wantaim Woks Dipatmen long Madang long stretim ol rot long ilektoret bilong em tasol em i no save wanem as na Woks Dipatmen i no karimaut ol wok.

Mista Musa i tok dispela K2 milien em i givim i kam long Ruul Eksen Program (RAP) bilong em we olgeta komiti i stap insait long Join Distrik Baset Praioriti komiti i tok orait long em.

Em i tok mani i stap pinis tasol Woks Dipatmen i kisim longpela taim tumas long statim wok.

Mista Musa i tok olsem taim em i bekim toktok bilong wanpela yut lida husat i bin autim wari bilong em long Redio Madang we em i bin tok memba bilong Raikos i mas stretim ol rot insait long ilektoret bilong em bikos olgeta rot i bagarap.

Mista Musa i tok sapos ol Woks Dipatmen i les long mekim wok orait em i ken kisim bek mani bilong em na givim long ol lokol kontrakta long stretim rot long hap bilong em.

Memba bilong Raikos i tok em i laik save we ol Woks Dipatmen i putim dispela K2 milien na sapos dispela mani i lus orait ol i mas bekim hariap.

Woks Dipatmen bai supavaisim olgeta wok long rot

na bihain bai ol i givim ripot long wanem kain rot ol i yusim dispela K2 milien.

Em i tok ol pipel bilong Raikos i mas amamas bikos long liklik taim tasol em i stap olsem memba bilong ol na em i givim planti helpim i go long olgeta hap we i no wankain olsem ol sampela memba bipo.

Sapos ol pipel bilong em i lukluk gut bai ol i luksave long olgeta liklik mani em i save yusim i save gat ripot bilong ol insait long Rai Nius Leta we memba yet i kamapim long toksave long ol pipel bilong em long ol wanem kain ol wok i save kamap long provins na ilektoret bilong em.



Redio Madang bai brodkas gut...

• OL liklik pikinini long Alemo Pri Skul long Bugati autsait long Madang taun i bin go raun lukluk long studio bilong Radio Madang. Wol Visen long Madang i bin helpim ol tisa bilong Alemo long mekim dispela raun. Ol pikinini i bin lukim ol nius man i wok long niusrum na ol i bin lukim tu studio we ol teknisen i bin putim nupela waia bilong brodkas. Piksa i soim Wol Visen opisa (werim kep) na wanpela olpela redio anaunsa bilong Redio Madang, Damien Boyagin insait long studio. *Poto na stori: Paulus Tali*



COCOA
BOARD
OF
PAPUA
NEW GUINEA

TOKSAVE

Dispela toksave em igo long ol papa bilong ol kakao fementri, ol kakao dealers na ol exporters. Kakao Bod bilong Papua Niugini i askim yupela long kam long ol Kakao Bod Opis na stretim ol nupela licenses bilong yupela bilong kakao yia 2000/2001.

Kakao Bod ilaik tok klia olsem ol licenses bilong 1999/2000 kakao yia em bilong wan yia tasol na taim bilong ol ibin pinis long namba 30 de long Septemba 2000.

Husat man/meri ino baem license bilong nupela yia (2000/2001), imas kamap hariap long Bod Opis na stretim long wanem Bod bai sasim penalti fi istat long namba 01 (wan) de long Januari 2001.

Plis toktok wantaim ol Operations Division Opisa long phone: 982 9083 / 982 8560 or long fax: 982 8712 sapos yu laik save moa.

TINGIM KAKAO, TOK KAKAO, WOKIM KAKAO NA DRINGIM KAKAO.

COCOA BOARD OF PAPUA NEW GUINEA

HEAD OFFICE: Cocoa Board of Papua New Guinea, P O Box 532, RABAU, East New Britain Province, Phone: 982 9083/982 8560 - Fax: 982 8712

BRANCHES:

Cocoa Board of Papua New Guinea, P O Box 1165, MADANG, Madang Province,

Cocoa Board of Papua New Guinea, P O Box 250, BUKA, N. S. Province,

Cocoa Board of Papua New Guinea, P O Box 356, KAVIENG, N. I. Province,

Cocoa Board of Papua New Guinea, P O Box 930, WEWAK, East Sepik Province,

Cocoa Board of Papua New Guinea, P O Box 142, POPONDETTA, Oro Province,

Phone: 852 3253

Phone: 973 9117

Phone: 984 1057

Phone: 856 1033

Phone: 329 7104

Fax: 852 2198

Fax: 973 9819

Fax: 984 1060

Fax: 856 1191

Lae Nius

Morobe Gavman tokaut gen long skul fi sabsidi

MOROBE Provinsel Gavman i tokaut gen long helpim olgeta skul pikinini wantaim skul fi sabsidi long neks yia 2001.

Taim Morobe Provinsal Gavman i brukim K86 milien baset bilong provins long las wik Tunde, Gavana Luther Wenge i tokaut long dispela taim bai Gavman bilong em i givim 60 pesen (%) helpim i go long ol skul insait long Morobe provins.

Dispela toktok bilong skul fi sabsidi long dispela yia 2000 i no bin kamap bikos i bin gat bikpela tok paul i kamap we i lukim olupela Provinsal Edministreta Ainea Sengero i lusim wok bilong em.

Morobe provinsal baset bilong neks yia em K85,618,700.

Dispela baset i gat K7 milien moa i go antap abrusim bilong dispela yia. Morobe Gavman i ting long kamapim K31 milien insait long provins yet long neks yia. Nesenel Gavman i givim K46 milien.

Namba wan taim Morobe Provinsal Gavman i bin kisim K638,800 i kam long wok bilong agrikalisa na dispela mani bai igo long ol wok bilong kirapim agrikalisa insait long provins.

Insait long mani i kam long Nesenel Gavman tu, bai ol Pablik Invesmen Progrem i kisim helpim tu. Ol kain progrem olsem Garaina Veli Intagreted Developmen Stadis we em bai kisim K500,000 na Finsafen Sialum na ol arapela rot tu bai kisim K500,000.

Wanwan distrik insait long provins bai kisim K300,000 bilong mekim ol wok bilong rot na bris na K150,000 bai i go long wok bilong helt o haus sik na narapela K150,000 bai i go long wok bilong edukesen o ol skul.

Wanwan distrik tu bai kisim K300,000 olsem distrik sapot grent na dispela mani bai i stap long opis bilong Rurel Developmen.

Gavana Luther Wenge i tokaut olsem Morobe Provinsal Gavman i bin ting olsem ol bai pulim K38 milien long dispela yia. Tasol dispela mak i no kamap stret na ol i kamapim tasol K31 milien.

Wok bilong stretim gut ol rot insait long Lae siti bai kisim K1.5 milien long dispela baset tu.

Raskol stilim Lae polis ka

ELLEN VAVITAN TIAMU i raitim

OL plis long Lae i kisim bek wanpela ka bilong ol we ol stilman i bin kisim long Mande nait.

Ka hia em wanpela Nissan Navara tupela nem bilong ol CID. Wanpela duti opisa long Mande nait i bin go olsem long Oleander strit na

tripela man wantaim bus naip i bin hensapim em na kisim dispela ka.

Long Tunde apinun ol plisemen i bin painim ka hia long Bumbu wara namel long Edmin Kompaun na Talair Kompoun. Olgeta samting insait long ka ol i bin rausim na bua bilong ka tasol na enjin i bin stap taim ol i painim.

Bos bilong plis long Lae, Awan Sete, i tok lukaut i go long ol wok-sap na man i save baim ol pats long was gut long ol man i laik salim pats bilong Nissan Navara long ol.

Em tok sapos plis i painim olsem ol i holim o baim ol dispela pats, ol i ken sasim ol.

Sete i tok tu olsem ol memba bilong pablik

husat i haitim ol stilman hia o ol pats insait long haus o banis bilong ol i ken kisim bikpela mekim save.

Ol plis long Lae i tok-save olsem husat man o meri i harim o lukim sampela samting long dispela birua i ken ringim ol long telefon 479 1068. Plis bai i no inap tokaut long nem bilong yu taim yu givim toksave long ol.

Pinat em gol bilong Makam

WATSON GABANA i raitim

GOL, kopa, nikel, sil na kainkain minirel we ol bikpela bikpela kampani wok long digim bai wanpela taim kam long arere bilong en. I no longtaim, bal bikpela OK Tedi Kopa main o Lahir gol main bai kam long arere blong en na pinis olgeta. I tru olsem ol dispela bikpela maining operesen i save kamapim planti wok na sem taim bringim planti moa mani i ken long kantri bilong yumi. Tasol, sapos ol pinis operesen, bai ol wokmanmeri mekim wanem wok. Husat bai givim ol wok gen long mekim.

Yes, taim mi save tingim dispela, planti taim, mi save tingting long go bek long asples bilong mi na lainim liklik wok agrikalisa pastaim. Mi gat strongpela bilip olsem, mani i stap long ples. Papa God i bin givim yumi graun long yumi ken wok na painim kaikai bilong hatwok bilong yumi.

I no long taim i go pinis, dispela tingting i bin kukim tru bel na tingting bilong mi na mi paul raun nating nating i go insait long ol ples klostu long Kasam Pass. Na mi bin kirap nogut tru long lukim sampela nupela ol gol projek i wok long kirap aninit long maunten Kassam Pass na ol arapela kunai maunten i raunim Makam Valley stat long Waterais i go inap long Leron plen. Planti manmeri na yangpela bilong Makam nau brukim skru tru long wok PINAT. Tru tumas, pinat em olsem gol bilong planti manmeri bilong Makam Vali. Taim mi lukim bikpela bikpela hap graun we trakta i bin digim, na tu lukim gaden, mi save tru olsem dispela em gol bilong Makam.

Wanpela tingting i bin kam kwiktaitim long tingting bilong mi taim mi bin lukim ol dispela pinat gaden em: "Ples we pinat

i groa, ol arapela samting tu i ken groa gut tu." Mi bin tingim dispela bikos, pinat i save kamapim moa gris long graun (legume planti). Dispela em tru o nogat, em i no bisnis bilong mi long toktok planti long em.

As tingting mi bin bel kirap long raitim dispela stori em long soim yupela arapela long wok em stap long ples. Long ples bilong mi long Makam Vali, pinat em wanpela isi rot bilong yu long kisim mani. I nogat bikpela hatwok bilong em.

Planti savemanmeri bilong planim pinat i bin stori long mi olsem: Taim ol laik planim pinat, ol save haiarim trakta inap long skel bilong graun we trakta bai katim. Namel long K30 i go inap K60 samting. Taim trakta i pinis planim graun, yu kisim aid pinat tasol long planim nabaut nabaut i go inap yu pinisim dispela graun olgeta. Em bai kisim klostu tri o foa mun samting long pinat bai redi long yu kamautim na pulumapim long ol bek na salim long maket.

Hey wantok, yu no inap tru westim taim long sanap long maket na wetim ol baia. Taim yu sanapim wanpela beg arere long rot, ol manmeri husat save go kam long Hailans haiwe bai kam baim hariap tru.

Wanpela stok-fid beg save kos olsem K50.00. Dispela i min olsem sapos yu wokim bikpela gaden pinat o spendim K60 long haiarim trakta long digim graun bilong yu, yu ken pulumapim klostu 20-beg pinat. Na taim yu salim wanwan beg long K50.00, yu ken kisim K1000 insait long tri mun tasol.

Dispela em i no wanpela mek-ap stori. Long Maritrian, ples mi nau wok long en, mi bin lukim planti manmeri i bin katim bikpela mani tru long pinat. Olgeta moning, ol manmeri i save go wok long pinat gaden bilong ol i go inap apinun. Na long taim bilong kamautim,

papa bilong gaden pinat i save givim liklik mani long yut grup o mama grup long kamautim. Ol save mekim sem samting tu long taim bilong pikim na pulumapim long beg.

"Mi save pulumapim klostu long 100 beg olgeta tri-man. Na taim mi salim olgeta, mi save kisim K5,000," Thomas Guni, wanpela pinat growa i bin tokim mi.

"I nogat bikpela hatwok bilong en. Yu planim tasol na widim tripela taim tasol. Bihain em redi long kamautim," Thomas tok wantaim lap.

"Wanpela gutpela samting em taim yu kamautim pinat pinis, yu ken go het long planim kaukau o narapela kaikai gen long dispela hap yu bin planim pinat. Kaikai bilong yu bai kamap gut tru," em tok.

Narapela pinat groa long Raglampun i bin tok olsem, gavman mas kirapim gen wanpela faktori bilong pinat long Makam bai ol groa i ken mekim pinat-bata.

"Gavman em wanpela pinat bata faktori we gavana i bin statim insait long makam Veli long helpim ol pinat groa. Tasol dispela faktori i bin bruk daun 20-pela krismas i go pinis.

"Mipela i save baim pinat bilong Makam na salim i go long Pot Mosbi. Long dispela rot mipela i save katim bikpela mani tru. Sapos gavman statim wanpela pinat bata faktori, bai ol bagarapim bisnis bilong mipela," jackie Kuk Nungga, wanpela bisnisan bilong Mt Hagen i bin tok.

Yes, tru tumas, pinat em wanpela gol bilong ol lain pipel bilong Makam Veli. Sapos yu no save long wanem samting mi toktok long em, yu ken raun long Hailans haiwe na askim ol selsmen long rot. Bai ol ruasim sampela lus long liklik bilum bilong ol na traime long grisim yu long baim pinat bilong ol tu ya.

Ankol ET i gat wan nem long Angau

ANNETTE SAMBAN SETE i raitim

OL i kolim wanpela namba wan bebi husat i bon long krismas de long Angau Haus sik "Yumi" bihainim redio stesen Yumi FM.

Mamapapa bilong bebi ya i bilong Maprik long is Sepik provins. Bebi ya i kamap long 2 kilok long moning bilong Desemba 25.

Emil Tenoa, wokman bilong Yumi FM, husat olgeta manmeri save kolim ankol ET i kolim nem bilong bebi ya taim em i makim Yumi FM na givim K250 kesmani olsem krismas presen long Yumi na mamapapa bilong em.

Ankol ET i tok amamas long dispela bebi long wanem em i namba wan bebi bon long dispela nupela yia na tu long spesel progrem Yumi FM i wokim.

Ol arapela 4-pela bebi i bon tu long Angau Haus sik i kisim krismas beg pulap long ol samting bilong bebi we ol bisnis haus long Lae i givim Pablik Rilesen Opisa bilong haus sik, Haiveta Kivia i tok ol samting ya i klostu long mani mak bilong K600 we i kam long Papindo, Brian Bells na Andersons Chemcaré phamasi i givim wanpela K50 Shopping Voucher o pepa bilong go baim ols amting long stua.

Margaret Samei, Sief Eksekutyuv Opisa bilong Haus Sik i tok amamas

long ol kampani ya bilong wanem ol samting ya bai helpim tru ol mama na bebi bilong ol. Em i tok sampela ol mama ya i nogat inap mani long baim olgeta samting bebi mas i gat.

Ankol ET na Fada krismas i go lukim tu ol pikinini long Wod bilong ol pikinini long Sarere na ol arapela sikmanmeri long Sande. Ol i toktok wantaim ol na givim ol presen.

Ankol ET i tok Yumi FM i wok long traime long kirapim gen trupela as tingting bilong krismas long wanem insait long PNG em i dai pinis.

"Krismas em taim ol pikinini save wetim Santa klos long kam givim ol presen."

em i tok Yumi FM i amamas long wokim dispela wok. Na Lae haus sik em namba wan em i kam lukim.

Ankol ET i tok tu olsem olgeta taim olgeta samting save kamap long Mosbi olsem na nau ol i kam long Lae.

Em i tok dispela wok ol i mekim, em long givim bek sampela samting long ol lisenas bilong ol long Yumi FM.

Ol bai wokim wanpela long Modilon haus sik long Madang long neks krismas.

Bosmeri bilong Angau Haus Sik i tok amamas tru long olgeta kampani i helpim na Yumi FM long kam long Angau. Em i tok ol pikinini bai tingim dispela kamap bilong ol.

trukai.
RICE



SAPOS NAMBA BILONG YU ISTAP LONG HIA. YU WINIM K200

F00887768 C00203656 A00415905 A00735820
C00754018 B00677267 E01179793
E00894517 E01077512 F00040743

LONG KISIM PRAIS BILONG YU. GO LONG TRUKAI DISTRIBUTION CENTRE.

Erima Katolik Peris i gat gutpela Krismas nait

VERONICA HATUTASI i raitim

ERIMA Katolik Peris insait long Nesenel Kapitel i bin gat gutpela sios sevis long makim betde bilong Jisas long Sande biknait, Desemba 24.

Bikos long sait bilong sefti na sekuriti, dispela em nambawan taim bihain long planti ya we Erima Peris i wokim lotu long mitnait, 12 kilok. Long ol arapela ya, peris i save holim Krismas Misa lotu long 8 kilok nait long wanem ol pipel i save pret long wokabaut na stap long dispela eria long nait long wanem planti raskol pasin i save kamap.

Pater Paul Liwun husat i peris pris bilong Sen Peter Chanel Peris long Erima i tok em i amamas tru long gutpela sios sevis na selebren bilong Krismas i bin kamap gut stret long biknait long Erima long dispela ya.

Olgeta samting i bin go gut tasol bikos ol plis i patrolim ol strit na tu nau i gat wanpela get tasol we ol perisina i ken go long sios long en.

Narapela samting tu we i narakain na i bin mekim ol pikinini i amamas em Fada Krismas i bin stap long givim presen long ol. Mekim na sampela pikinini tu i bin go ol yet long sios tasol laki na ol arapela perisina i kisim ol i go slip long haus bilong ol na lusim ol wantaim ol famili bilong ol tru long neks moning.

"Insait long tripela ya bilong mi long Erima peris, dispela em naispela na gutpela Krismas mi gat long hia.

"Mi amamas tru long sevis, ol

wan wan grup i redim liteji na ol krismas singsing na pilai dramana Fada Krismas tu i bin stap long amamasim ol pikinini. Mi painim hat long tokaut long amamas bilong mi long dispela de bikos mi bin pilim tru spirit bilong Krismas long dispela nait.

"Mi amamas long lukim sios i pulap tru bikos pastaim mipela i putim toksave olsem sios sevis long Erima bai kamap long 12 kilok biknait, mi bin pret olsem nogut nogat planti manmeri bai kamap. Tasol em i narakain na samting i kamap gut tru," Pater Paul i tok.

Em i tok long dispela mun tasol Peris Kaunsil i bin bung na Pater Paul i bin autim dispela tingting long ol kaunsil memba sapos Krismas nait Misa lotu i ken kamap long 12 kilok biknait.

Selebrenen i bin stat long 8 kilok nait we ol wan wan grup long peris i bin kamapim ol Krismas Kerol singsing na ol pilai drama tu. Em ol grup olsem ol meri grup long peris, God's Lav, Jisas kavanen, Erima setelmen na ol arapela grup moa.

Pater Paul i tok bipo long 8 kilok yet, ol manmeri na pikinini i bin stat long go kamap long sios.

Long ol wan wan hap bilong liteji olsem stat, ofa, komyunio na pinis, ol wan wan grup olsem Momase, Niuginin Ailan, Hailans na Sauten grup i bin redim ol samting.

Pater Paul i tok ol perisina i bin gat gutpela selebrenen tru na ol i amamas long en.

Em i tok wanpela samting we i narakain long dispela ya tu em insait long peris komiti miting, ol i bin autim tingting long askim Fada Krismas long kam amamasim ol



• Ol yangpela Katolik pikinini i putim Krismas pilai taim Mama Maria i karim Jisas long Betelem. Ol dispela pikinini i kamap olsem ol ensel husat i singsing na liptimamim nem bilong God na tokim ol wasman bilong sipsip olsem wanpela king i bon long Betelem. I bin gat planti kaint pilai olsem i bin kamap long planti hap peris insait long kantri. *File piksa.*

pikinini long dispela nait. Olsem na Pater Paul i bin askim ol papamama long givim nem bilong ol pikinini i go long pater na ol peris komiti na tu askim ol papamama sapos ol i ken baim ol liklik presen bilong mekim ol pikinini i amamas.

Peris tu i bin yusim K100 long baim ol presen olsem hap kontribusen bilong em.

Em i tok Fada Krismas i bin amamasim planti pikinini tru husat olgeta i bin kisim ol presen long en. Na em i tok tu sampela pikinini i

bin lusim ol papamama na go ol yet long dispela selebrenen tasol ol perisina i kisim ol i go long haus bilong ol na bringim ol i go long wan wan famili long neks moning.

Sios sevis i bin stat long 12 kilok mitnait na i bin naispela tru. Ol Niugini Ailans liteji i bin go pas long stat bilong lotu na ol pikinini i bin danis long foapela dua i go long sios long kisim pater i go insait na em i bin naispela tru.

Misa sevis i bin pinis long 1.30 am. Laspela grup i lusim sios long

2 kilok moning em ol lain long 8 Mail.

Pater Paul i amamas long sios i pulap na Krismas selebrenen long Erima i bin go gut tru.

Em i tok tenkyu long olgeta perisinas, ol peris komiti, ol wanwan liteji na grup na plis husat i bin wok bung wantaim long mekim sios selebrenen long Erima Peris long dispela Krismas i namba wan stret.

Andrea yusim Tok bilong Bikpela long skulim ol meri

WATSON GABANA i raitim

ANDREA Anos em wanpela meri husat i go pas long grup long yusim Gutnius long toksave long ol meri long raits bilong ol.

Olsem Presiden bilong Lutertan Rivaivel Sios stat yet long 1997, em i save ogenaisem ol semina, ol rivaivel kruset na ol woksop long skulim ol meri long rait bilong ol na long wankain taim tu, tokaut long wok we God i gat long ol wan wan meri insait long famili na komyuniti.

Long las wik long ples Sialum insait long Morobe provins, Mis Anos i bin holim wanpela woksop long skruim wok bilong skulim ol meri long save long raits bilong ol na long plen bilong God long ol.

Em na lain bilong "Bodi ov Krai" ministri long Wes Taraka we i gat long en ol meri, ol pasto, ol yut na ol bikpela man long tripela sios grup olsem Lutertan Rivaival, Asembli ov God na Foa Skwea Sios i bin stap insait long dispela woksop long Sialum.

Andrea i tok em bin tingting long sampela rot we em i ken bihainim long promotim ol rait bilong ol meri long ol ruel ples insait long kantri na em bin lukim olsme yusim Gutnius long skulim ol ruel mama na meri long as we God i wokim yumi na long dispela rot, yumi ken save long ol rait we God yet i givim yumi.

Em bin tok long dispela as na grup bilong em i bin stap long Sialum long holim woksop, semina, trening na mini kruset bilong promotim ol rait bilong ol meri long ruel komyuniti.

Andrea i bin tok long ruel PNG, ol man i save lukim ol meri olsem ol i stap daunbilo long ol na mekim ol i wok long lukautim haus, ol pikinini na gaden.

Olsem na em i yusim Tok bilong Bikpela long skulim ol asples mama na meri long plen bilong God long wan wan long ol.

Em i tok wanpela plen bilong em em long lukim olsem moa long ol yangpela meri i groap strong long spirituel sait na ol bai go insait na strongim ol wok long ministri bilong ol meri.

Odinesen long maunten peris bilong Daru-Kiunga daiosis

DESEMBA 17 i bin wanpela spesel de bilong Daru-Kiunga Daiosis bikos wanpela pikinini bilong ol i bin kisim blesing long kamap pater.

Long dispela de, Bisop Giles Cote SMM i bin givim blesing long Dikon Andrew Moses long kamap pater.

Pater Andrew Moses i bilong Angiyak long Min wanpisin long Bolivip eria we i stap long is bilong Ok Tedi Kopa main, na ol i save kisim tripela de long wokabaut i go long dispela ples Angiyak.

Bipo long bikpela de i kamap, Pater Andrew i bin mekim ol wok redi na long tripela de, em i no bin kisim kaikai. Em i bin wok long preia tasol long wanpela liklik haus long maunten klostu long ples bilong em long Bolivip wantaim sevenpela yangpela man husat i hauslain bilong em.

Long tripela de ya, Pater i bin bihainim, i no pasin bilong preia na lotu tasol pasin kastam tu. Long sait bilong pasin kastam, ol i bin bihainim wanpela long ol sevenpela rot long kamap man long pasin kastam bilong ol Min wanpisin. Pater i no bin kisim wara na kaikai insait long dispela tripela de. Ol man na tu sampela meri i bin joinim em long preia long dispela taim. Ol lain bilong peris na Bisop Cote i bin go long liklik haus long maunten bilong selebrenen Misa lotu na Komyunio wantaim Pater Andrew bipo long bikde bilong em i kamap.

Long 3 kilok bikmoning bilong Desemba 17 mumu kaikai i redi na ples i kirap wantaim samting olsem 600 pipel long ol ples klostu i bung pinis long amamasim bikde bilong Pater Andrew. Sampela long ol dispela pipel i bin wokabaut long tripela de long kam antap long ples ya, sampela i satarim helikopta na go. Las long en long samting olsem 9 kilok moning, tupela helikopta i bin go long Bolivip wantaim ol fainel grup bilong ol ges bilong Kiunga na Tabubil.

Lotu bilong odinesen seremoni i bin stat long 10 kilok. Planti pipel i bin stap long en na ol wan wan grup i bin stap insait long liteji bilong sios sevis ya.

Wanpela bikpela samting we i bin kamap na sevis i bin luknais tru em taim ol man long ples i putim ol naispela bilas na ol i singsing na danis taim Pater Andrew i wokabaut long namel bilong ol na ol i kisim em i kam insait. Ol meri tu i bin wokim bilong ol na singsing danis na kisim Pater Andrew i go long famili bilong em na i go long dua bilong sios. Wanpela ankel bilong em i bin wokim pasin kastam long rausim ol spirit nogut long helpim strongim Pater Andrew long karimaut wok pater long nupela laip bilong em. Bilong pinisim taim bilong em i no kaikai na dring wara, ankel ya i bin kapsaitim wara long banana lip na spesel kontena i na givim long Pater Andrew long dring long en.

Bihain long ol dispela pasin kastam i pinis, ol i putim klos



• Ol pikinini wantaim mama i kisim Baibel wantaim ol presen i go ofaim long alta long taim bilong misa.

bilong dikon long Andrew na Bisop Cote i bin karimaut odinesen long pasin bilong Katoki Sios wantaim ol preia na blesing bilong mekim Andrew i kamap pater. Bihain em i putim klos bilong pater na Pater Andrew i joinim ol arapela pater long skruim Misa lotu. Bisop Cote long toktok bilong em i bin tok wok bilong pater em i sevis we ol i wokim bihainim rot na pasin bilong Jisas taim em i stap long graun.

Pater Andrew em i namba foa nesenel daiosis pater long Daru-Kiunga daiosis na em i namba tri pater bilong ol faiwol pipel. Ol i makim em long kamap olsem asisten peris pris long Daru.

Pawa bagarap long planti ol provins

PLANTI pawa jenereta insait long ol provins na ol distrik i no wok moa long givim pawa long ol stesin, skul na haus sik na ol arapela gavman sevis na ol komyuniti projek bikos PNG Electricity Commission (Elcom) i gat bikipela hevi long mani long stretim ol dispela pawa jenereta.

Insait long nius ripot bilong Elcom, Enjiniaring Sevis Dipatmen i tokaut olsem bikos long dispela hevi bilong mani, ol ino inap stretim olgeta pawa jenereta long ol aut-stesin na ol provins.

Ol bai stretim tasol ol bikipela wok mentenens long lukim olsem wok bilong ol i bihainim baset bilong Elcom. Ol bai karimaut tasol ol wok mentenens long ol jenereta we i mekim bikipela wok tru long wanwan distrik o provins tasol.

Deputi Jenerel Menesa na Sief Enjiniaring Sevis Joe Bariamu i tokim bod miting long Oktoba 26, 2000 olsem sampela pawa stesin i mas gat ol saveman tru bilong luk-save sapos masin i gat hevi na ol i ken stretim pastaim long masin i bagarap tru bihain.

Mista Bariamu i tokaut tu olsem narapela bikipela hevi em long sait bilong trenspot we i ken kisim ol wokman i go long ol hap we i gat hevi long en. Planti ol ka bilong Elcom long banis i olpela ka tru na long senisim na kisim nupela i no kamap hariap tumas we i holim bek planti wok bilong ol tu.

Planti taim sampela ka bilong Elcom i no moa ron long rot bikos ol i bagarap na stap long woksop, em i tok.

Mista Bariamu i tok Saplai na Trenspot Divisen i wok long luksave long ol ka we i olpela na bai i gat hevi long ol. Ol dispela ka i stap long ol ples o hap we i gat bikipela wok i stap long en.

Tasol ol dispela wok bai kamap taim i gat mani long kamapim.

Mista Bariamu i mekim bikipela tok amamas i go long ol Elcom woklain long ol provins na distrik husat i wok hat tru long karimaut wok bilong ol gut maski ol i gat hevi long ol trenspot na ol samting bilong wok wantaim tasol ol i wok gut tasol.

Numapo kamap siaman bilong Plis Promosen Bod

BIKNEM PNG Ragbi siaman John Numapo i kamap siaman bilong Plis Promosen Bod long las wik Fraide Desemba 22, 2000 long plis hetkwa-ta long Konedobu. Mista Numapo em ekting Sief Mejistret.

Mista Numapo i bin wok olsem mejjistret bilong harim ol kot insait long Papua Niugini inap 16 krismas olgeta.

Em i holim pepa bilong Besela ov Lo wantaim Honas long Yunivesiti ov Papua Niugini na tu Masta ov Lo long Yunivesiti ov Melbon long Australia.

Ol nupela bod memba aninit long siaman John Numapo em, Asisten

Komisina Alfred Reu MBe, QPM na Jim Andrew QPM.

Mista Numapo i tok bod bai wok strong long sanap namel long ol wok na disisen bilong em long sevim gutpela olgeta lain long plis fos. Ol bai wok gut na sanap namel long harim ol toktok na skelim gut taim ol i laik mekim disisen long givim promosen-long ol plis lain.

Mista Numapo i tok bod bai lukluk klostu long taim bilong givim promosen long ol plis opisa bihainim wok bilong ol, gutpela rekot bilong ol, pasin bilong ol long karimaut wok na hatwok wantaim eksperiens bilong ol long sevis i kam.

Em i mekim tok amamas i go long Plis Komisina John Wakon long i gat bilip long em na makim em i kam long sia bilong dispela bod.

Mista Numapo i tok em yet i nogat save long wok bilong plis, tasol em i bin groa insait long banis bilong plis fos bikos papa bilong em i bin wanpela plisman husat i sevim plis fos long 32 krismas olgeta. Olsem na em i gat laikim i stap wantaim plis.

Mista Numapo i tok em i lukluk fowet long wok klostu wantaim ol bod memba bilong em na ol bai traim long wok strong na mekim gut wok bilong ol.



• (lephan) Asisten Komisina Jim Andrew, John Numapo siaman bilong Plis Promosen Bod na Asisten Komisina Alfred Reu. Foto: IVAN BAYAGAU.




Spesol Ofa



Coaster

30 SITA BAS

Harim olgeta PMV ona, kam na lukim mipela long Coaster Bas spesol dil nau. Hariap tupela tasol i stap ex-stok long Ela Motors Lae. Long kisim moa toksave fon 4722322 o fax 4722463



Niu Yia Hamamas igo long olgeta kastoma bilong mipela long olgeta hap long Papua Niugini.

Ela Motors
TOYOTA

Wils Bilong Nesen

YAKAM KELO i glasim politiks bilong yia 2000

Mekere Gavman i traिम long stretim na kirapim

... tasol lait i no kisim rot yet

TAIM Gavman bilong Sir Mekere Morauta i bin kamap long 1999 Julai, planti manmeri long Papua Niugini i tok dispela bai wanpela gutpela Gavman bilong kantri bihain long ol i luksave long wanem kain Gavman olpela Praim Minista Bill Skate i bin kamapim.

Long taim bilong Skate Gavman, prais bilong planti samting long stua i bin go antap na ol toktok i kamap olsem Papua Niugini i sot long mani. Olsem na taim Gavman strong bilong mani (Kina) i go daun egensim strong bilong mani bilong Australia na Amerika na ol arapela ovasis kantri.

Ol pipel i bin luksave na pilim tru olsem prais bilong olgeta samting long stua i go antap bikos long dispela as.

Bikpela as tru em bikos bikpela beng bilong Papua Niugini ol i kolim Sentrel Beng o Beng ov PNG i sot long mani long risev akaun bilong em. Dispela em bikos Gavman bilong Bill Skate i bin kisim planti dinau mani long Sentrel Beng long karimaut ol wok bilong kantri na i nogat mani long risev akaun. Risev akaun i save stap long holim strong bilong Kina taim kantri i laik baim ol samting olsem kago na sevis i kam long ovasis.

Taim Gavman bilong Sir Mekere i kamap na tekova long Gavman bilong Bill Skate long Julai las yia insait long taim bilong vot i nogat bilip, planti pipel i tok nau bai ol prais na ol hevi bilong mani o ekonomi bai i go gutpela bikos Gavman i senis. (I bin nogat vot i nogat bilip bikos Bill Skate i bin risain olsem Praim Minista. Olsem na vot i kamap long makim nupela Praim Minista we Sir Mekere i kamap na kisim ples)

Nogat senis long mani (Kina)

Long dispela yia 2000 i kam, mipela i ken lukim olsem i nogat wanpela bikpela senis i kamap long hevi bilong mani. Prais bilong ol kaikai na ol samting long stua i stap wankain yet. Tasol prais bilong kerosin, disel na bensin tasol i wok long go antap moa we planti bisnis lain husat i gat ol ka na ol kampani we i save wok long masin i pilim pen long dispela.

Mak bilong mani (Kina) i sanap tude em: K1.00 i wankain olsem US\$ 0.3270 Amerika cents na A\$ 0.5919 Australia cents. Dispela i min olsem insait long wanpela stua

long Australia, K1.00 i ken baim wanpela samting we prais bilong em i olsem A\$0.5919 cents.

Strong bilong mani i no go antap gut maski Gavman i senis na em i stap wankain yet namel long olpela Gavman na nupela Gavman bilong tude. Olsem na prais bilong ol kaikai na ol samting i wok long stap antap yet na sampela i wok long go antap yet.

Taim prais i save go antap, dispela i save givim hevi long sait bilong ekonomi o ol wok bisnis. Planti kampani i save painim hat bikos ol bai tromoi bikpela mani moa long baim ol kago na ol samting bilong mekim wok wantaim i kam long ovasis. Olsem na long mekim kampani o bisnis i ron yet, em i gat tupela rot long bihainim. Wanpela em long daunim wok bilong em i kam daun liklik bai em i ken yusim liklik saplai tasol o em i mas rausim sampela wokmanmeri long sevim sampela mani bilong putim i go long sait bilong wok bai wok i ken ron yet. I tru olsem planti kampani na ol bisnis i no laik mekim olsem. Olsem na sampela taim ol ino save laik kirapim ol nupela wok yet o surukim bisnis i go bikpela yet inap hevi bilong mani i kamap gut sampela taim bihain.

Mekere i mekim wankain olsem Skate

Long pastaim tu, olpela Gavman bilong Bill Skate i save rausim na mekim senis long planti Minista bilong Gavman. Na tu ol i save senisim planti bosman bilong ol Dipatmen. Long dispela as, ol planti saveman i save tok dispela i kamapim guria long Gavman na kantri (instability). Na taim i gat dispela kain guria, bisnis o ekonomi bilong kantri bai i pundaun, Gavman bai i gat bilip moa long ol pipel na ol ovasis kantri na beng we i save helpim Gavman oltaim, hevi bilong lo na oda bai i go antap na planti arapela hevi moa bai kamap insait long komyuniti.

Olsem na taim Gavman bilong Mekere i kamap em i tokaut long stretim dispela guria na mekim Gavman i sanap strong gen. Bikos dispela kain guria tasol i save mekim na kantri i bungim planti bikpela hevi.

Mekere traिम nupela Lo

Wanpela bikpela Lo Gavman bilong Sir Mekere i kamapim na

stapim dispela guria pasin insait long Gavman em nupela Lo bilong Intagriti ov Politikel Pati na Kendidet. Dispela lo em bilong stapim ol memba bilong palamen long i no ken kalap kalap nabaut i go kam long ol pati. Ol i mas gat nem long wanpela pati tasol na sapos ol i laik kalap, bai ol i go bek long bai ileksen. Gavman i tok taim ol memba i save sanap long wanpela pati tasol, Gavman i save ron gut na planti Gavman disisen na polisi i save karim kaikai we wok i save kamap tru.

Tasol insait long Gavman, ol tu i wok long mekim wankain pasin bilong senisim ol lida klostu klostu olsem olpela Gavman bilong Skate long bipo.

Insait long Mekere Gavman, ol i gat tripela Deputi Praim Minista. Namba wan em ol i bin gat John Pundari husat em lida bilong Edvens PNG Pati (APP). Tasol i no longtaim, Praim Minista i rausim John Pundari wantaim APP na ol i sindaun long namel sia. Orait Gavman i makim Mao Zeming memba bilong Tewae Siassi olsem Deputi Praim Minista long dispela yia. Em i memba bilong Pipels Demokratik Muvmen (PDM) we Praim Minista Sir Mekere Morauta yet i lida bilong ol. PDM em bikpela pati we i go pas long Gavman tude. Tasol i no longtaim, Praim Minista i rausim Mao Zeming long sia bilong Deputi Praim Minista wantaim foapela arapela PDM memba tu. Ol dispela memba em Mathias Karani, Peter Waieng na Dokta Fabin Pok na Alfred Pogo.

I no longtaim i go gen, mipela i lukim Praim Minista i rausim Tommy Tomscoll na Gabia Gagarimabu long wok Minista tupela i holim. I no longtaim long las wik tasol, Praim Minista i rausim Andrew Baing na Sir Michael Somare long wok Minista tupela i holim long Gavman.

Praim Minista i holim yet toktok bilong em olsem ol dispela senis i kamap bikos long stapim wanem kain guria pasin i laik kamap long Gavman. Olsem na em i rausim ol Minisat na Pati we i laik kamapim seksek long Gavman.

Praim Minista i rausim Pipel Progres Pati (PPP) pinis na em rausim gen Yunaitet Pati na Nesenel Alaiens Pati. Maski em i no rausim pati na em i rausim lida bilong pati, dispela i soim olsem em i rausim pati o i laik brukim pati.

Olsem na wanem em i rot tru o mining tru bilong kamapim na



• Liklik mangi ya long setelmen i no sindaun nating. Em i salim ol kulau long painim liklik mani.

sanapim gutpela strongpela Gavman (stability). Olgeta Gavman long bipo i wok long mekim kainkain senis long ol Minista na ol het bilong ol Dipatmen. Wanem rot tru bai ol i painim gutpela strong Gavman we i no inap mekim kantri i guria, strong bilong mani (Kina) bai kamap gut gen na ol bisinsi o ekonomi bai kamap strong gen. Taim i gat gutpela ekonomi o wok, planti wok i save kamap, planti manmeri i gat mani long lukautim na sapotim sindaun bilong ol na famili gut na prais bilong ol samting long stua i kam daun na olgeta hevi bilong skul, haus sik, rot na bris, potnait pe bilong ol wokman na planti arapela moa bai i kamap gut.


Gavman long dispela yia i pasim klostu K3 bilien baset bilong yia 2001 long neks yia. Hap bilong dispela baset mani bai i kam long Wol Beng olsem dinau. Na nau Gavman i wok long traिम salim olgeta bisnis bilong Gavman olsem Air Niugini balus kampani, PNGBC beng, Telikom, PNG Harbours Board, Elcom na arapela moa. Gavman taim em i kisim mani long ol dispela bai em i ken bekim ol dinau em i gat wantaim Wol Beng. Em i orait yumi ol pipel i ken lukim na skelim na autim planti tingting bilong yumi long en, tasol bai i hat long yumi i ken senisim o stapim wanpela samting

long dispela eksen bilong Gavman. Bikos sapos wanpela memba bilong yumi husat i stap long Gavman tude i laik egensim Gavman long dispela samting, bai Praim Minista i rausim em wantu tasol olsem em i mekim pinis long ol sampela lida.

Dispela Gavman i no stretim yet hevi bilong Bogenvil na dispela hevi i stap longpela taim i kam na nau kantri bai igo insait long yia 2001. Planti miting i kamap pinis na yumi bai putim was long lukim wanem eksen bai Gavman i mekim long hevi bilong Begenvil bihain long em i rausim Sir Michael Somare, man husat i go pas long toktok wantaim ol Bogenvil lida long dispela hevi.

Narapela hevi i kamap gen long boda bilong PNG na Indonesia we ol Wes Papua i ronawe i kam pulap long Vanimo na Westen provins. Dispela em hevi bilong Gavman na mipela bai putim was tu long harim na lukim gutpela eksen bilong Gavman i go insait long dispela hevi.

Nau gutpela pasin em long yumi wet isi inap 2002 we yumi ken mekim nupela disisen gen bihainim wanem samting yumi skelim long ol wanwan lida na Gavman bilong yumi na yumi laik rausim husat na makim husat long 2002 nesenel ileksen long kamap makim yumi long haus palamen na Gavman long dispela taim.



• Dispela liklik meri i lainim long wok didiman we em wantaim famili bilong em i save lukautim kakaruk na salim long maket.



• Ol skul sumatin bilong Ward Steet Primeri Skul i paitim dram na mas long 25 independens de. Foto: IVAN BAYAGAU.

Lukluk bek long yia 2000 na ol senis PNG i bungim Ekonomi (bisnis) i bin gutpela o nogat?

...skelim wantaim poket bilong yu

YAKAM KELO i raitim

PAPUA Niugini em i wanpela kantri we i pulap long planti samting i stap long graun na wara. Na ol dispela samting i save i gat wok bilong ol we mani i kamap long en. Taim mani i kamap, planti samting i kamap na ron gut.

Wok bisnis o ekonomi bilong Papua Niugini long dispela yia 2000 i hat liklik long luksave sapos bisnis i groa o wok long pundaun.

Praivetaisesen

Gavman bilong Sir Mekere Morauta taim em i kisim opis long Julai 1999, em i kamap wantaim wanpela bikpela tingting bilong salim olgeta bisnis wok bilong Gavman. Ol bisnis olsem Telikom we i save pulim olgeta telefon sevis insait long Papua Niugini, Elcom we i save lukautim olgeta pawa saplai bilong lait insait long kantri, PNG Habas Bod we i save lukautim olgeta wok bilong ol bikpela kago sip long kantri, Air Niugini we i lukautim balus kampani insait long kantri, PNGBC beng we i bikpela haus mani bilong PNG na ol arapela Gavman bisnis tu.

Dispela bikpela wok bilong salim ol Gavman bisnis em ol i kolim Praivetaisesen. Sotpela mining em olsem, salim ol i go bai ol praivet bisnis lain i ken baim na kamap papa long ol. Toktok bilong Praim Minista Sir Mekere Morauta i tok, ol dispela Gavman bisnis i kaikaim bikpela mani bilong kantri tasol ol i no mekim wanpela gutpela profit o win mani. Olsem na Gavman i mas salim ol na Gavman i mas sanap tasol long lukautim na givim sevis olsem rot, edukesen, haus sik na ol arapela sevis i go long ol pipel na i no ken mekim bisnis.

Dispela Praivetaisesen i gat planti tok pait i stap long en tasol Gavman i sanap strong yet olsem dispela wok bai i go het yet maski ol yunion na ol kain kain grup i egensim. Praim Minista Sir Mekere Morauta i tokaut tu olsem PNG i gat bikpela dinau long Wol Beng na Intanesenel Monitori Fan (IMF). Olsem na Gavman i mas salim ol dispela bisnis na stat bekim bek sampela dinau mani pastaim.


Praivetaisesen wok i stat pinis we Gavman i tokaut long Air Niugini balus kampani em namba wan bisnis long ol ausait lain i ken baim. Olsem na ating ol ovasis bisnis lain i putim ai pinis long baim Air Niugini. Bihain bai yumi i harim. Gavman i salim tu 50 pesen (%) sea bilong em long bikpela simen kampani ol i kolim Halla Cement long bipo na nau ol i kolim Taiheyo Cement Ltd. Gavman i lusim han na stap longwe na salim dispela bisnis i go long praivet Japan kampani. Nau Air Niugini balus kampani i stap pinis long maket, namba tu ating bai Telikom o PNGBC beng. Gavman i tok em inap kamapim K1 o K2 bilien long dispela wok bilong salim ol Gavman bisnis na dispela em mani bilong bekim dinau bilong Wol Beng na IMF.

Wol Beng na IMF

Long dispela yia yumi harim na lukim planti ripot i kamap olsem



• Nupela sistem bilong BSP beng we yu ken ring tasol long telepon i go long BSP beng na askim long pasbuk bilong yu.



• Ka ya i karim toktok we i soim ol groas ino laik gavman i senisim lo long kopi indastri. Foto: YAMES KAY.

Wol Beng na IMF bai helpim PNG long hevi bilong mani em i stap long en. Mani bilong Wol Beng long helpim PNG i no kam yet tasol mipela i lukim ol sampela kantri i helpim PNG wantaim mani. Australai i kam wantaim klostu K50 milien, Japan i kam wantaim klostu K10 milien na Saina tu i kam wantaim sampela milien Kina tu long helpim PNG. Na Praim Minista Sir Mekere Morauta i bin tokaut olsem ol pren kantri bilong PNG bai helpim PNG olsem na i tru mipela i lukim ol dispela tripela bikpela kantri i givim bikpela mani i kam long helpim PNG. I gat bikpela as Australia i mas helpim PNG bikos long bikpela ges projek we bai i ron long paip aninit long solwara na i go daun long Kwinslen long Australia. Dispela ges projek bai mekim bikpela wok tru long Australia na Australia i ken ron strong yet long ol bisnis wok bilong em. Olsem na na maski liklik mani helpim Australia i givim long PNG, em bai kisim bikpela samting long bihain. Japan na Saina i save was tu long helpim PNG bikos long ol bikpela samting PNG i save kamautim long graun olsem timba, gol, kopa, kopra, kakao, pis na ol arapela moa. Ol i mas helpim PNG yet bikos ol dispela samting i mas go yet long ol bai faktori bilong ol i ken brukim na mekim i kamap gut bilong yusim o kaikai.

Esia Developmen Beng (ADB) tu i givim bikpela dinau sapot long PNG long ol wok bilong stretim gut ol rot insait long kantri. Ol dispela helpim PNG i kisim i kam long ol pren kantri na ADB i mekim

Gavman i kamapim 2001 nesene baset bilong kantri. Baset i olsem K3 bilien na hap mani i no yet we Wol Beng bai givim i kam bihain.

Ol Bisnis i kamap

Long dispela yia 2000 i bin gat planti bikpela projek i bin kamap insait long kantri we Gavman i oraitim na sainim pepa long ol i ken go het. Ol bikpela projek olsem Ramu Nikel maining long Apa Ramu. Dispela bai wanpela bikpela maining we Gavman i bilip bai pulim bikpela mani i kam long kantri insait long narapela 20 o moa krismas i kam bihain.

Kamap bilong Vanimo Fri Tred Jon we ol bikpela wok tred o bisnis namel long PNG na ol Esia kantri i ken ron gut long dispela hap rot bilong solwara i kam insait long PNG. Em nau planti kampani na bisnis long Esia bai i kam long baim ol samting long PNG na mekim bisnis wantaim ol manmeri long hia. Dispela bai mekim ol manmeri i ken kamapim planti liklik samting ol i ken kamapim na salim long ol bisnis o kampani i kam long Esia bihainim dispela fri tred jon. Dispela fri tred jon i stapim ol sas we gavman i save sasim long solwara mak bilong em. Nogat ol sas nabaut long solwara mak bilong PNG. Olsem na bisnis wok i ken ron isi.

Kamap bilong nupela rais faktori long Lae siti we ol manmeri long PNG yet i ken stat long planim rais na salim long dispela rais faktori o rais mil long Lae. Dispela faktori

bai brukim skin na klinim rais i go kamap klin na gutpela we yumi ken baim long stua na karim i go kukim long haus. Dispela em wanpela gutpela rot tru bilong ol pipel i ken planim rais na mekim mani na tu inap stapim Gavman long noken baim tumas rais long ovasis na sevim sampela mani i stap bek long mekim ol sampela bikpela wok wantaim.

Ol Bisnis hevi

Kopra Marketing Bod (CMB) long dispela yia i bungim bikpela salens na hevi long sait bilong mani bilong karimaut ol wok bilong em. Kopra i gat hevi tu long wol maket bikos prais bilong kopra i pundaun. Taim prais bilong kopra i pundaun, ol manmeri long ples i no laik katim kopra inap ol i luksave prais i go antap gen. Olsem na sampela depo long provins i no wok gut. CMB tu i gat planti tok pait namel long menesmen na ol groas asosiesen we ol i go kamap long mak bilong kot. Na dispela mekim sanap bilong CMB i no gutpela o i no strong. Kopra em bun bilong planti manmeri bilong ples bikos ol i save katim kopra long mekim mani bilong baim rais, sol, kolos, skul fi na ol arapela samting moa. CMB i sot long mani mak olsem K5 milien bilong kirapim gen wok bilong em na strongim ol groas long go het yet long katim kopra inap wanem taim wol maket prais i kirap gut gen. Gavman i bin oraitim CMB pinis long em i ken kisim K5 milien dinau long beng long traim kirapim gut wok bilong em. Kopra em i olsem bun bilong planti ples manmeri husat i sanap strong long agrikalsa kes krop wok.

Kopi long dispela yia i bin kisim planti bikpela tok pait tru namel long Gavman na ol kopi groas insait long kantri. I bin gat wanpela lo i laik senis we Kopi Indastri Kopresen (CIC) bai i kam aninit long nupela lo we i karamapim ol kaikai. Ol kopi groas i ting dispela em pasin bilong politiks i laik pusim han bilong em i go insait long wok na ron bilong kopi indastri olsem na bikpela straik i kamap long hailans na nambis tu wantaim. Dispela straik bilong ol kopi groas i mekim na wok bilong senisim lo we i menesim wok bilong kopi i no kamap.

Kutubu oil projek na ol nupela projek Moran na Hides i wok long bungim planti hevi yet long toktok bilong ol papagraun we Gavman i no stretim gut yet. I tru Gavman i ting em i traim long stretim hevi bilong ol papagraun, tasol i save gat ol toktok o komplek i kamap long hap tumoro gen. Na dispela em i wanpela bikpela salens we Gavman i karim long stretim gut.

I gat ol toktok i kamap bikpela olsem Ok Tedi gol maining bai pas sampela taim bihain na Gavman i wok long stap insait long planti bikpela toktok wantaim kampani husat i go pas long dispela projek. Ol asples o papagraun tu i wok long stap klostu wantaim kampani long givim sapot na tu stap klostu long ol i mas kisim gut wanem kain pemen em i mas kisim long graun o ol bagarag we i kamap long graun bilong ol.

Ol lain bilong timba indastri i no amamas long las yia i kam inap

dispela yia bikos long takis bilong diwai we ol timba kampani i mas baim taim ol i laik salim diwai i go long ovasis maket. Asosiesen bilong ol timba kampani oltaim i wok long toktok strong long dispela takis na i askim Gavman long traim daunim takis long ol diwai we i laik i go long ovasis maket. Dispela toktok i hangamap yet wantaim Gavman bikos takis em i bikpela samting Gavman i mas kisim mani long en olsem na en.

Gavman Takis

Wanpela bikpela rot tasol bilong Gavman long mekim mani na lukautim kantri em long kisim takis long olgeta wok bisnis, wantaim kain liklik samting we i save mekim mani olsem potnait pe bilong ol wokman, baim ol kaikai long stua o sampela pepa yu laik kisim long wok bilong yu.

Takis em bun tru bilong Gavman long mekim mani na dispela em stap insait long strongpela lo bilong kantri olsem olgeta wok na ol manmeri i mas baim takis. Olsem na taim Gavman i bungim mani long takis, em i kirapim ol sevis gen long kantri we ol pipel i ken kisim na yusim. Takis long dispela yia i go insait long wanpela bikpela wok glasim gen we Sir Nagora Bogan wantaim komiti bilong em i laik stretim gut wok bilong takis long kantri. Ol i laik kamapim takis rifom. I gat wanpela nupela takis ol i kolim Veliu Eded Takis (VAT) i bin kamap pinis we yumi bai baim 10% takis i go long Gavman long olgeta bisnis o wok yumi mekim. Nau dispela VAT bai i bung wantaim takis rifom lain bilong Sir Nagora Bogan bai kamapim na mipela bai i gat nupela kain takis insait long kantri. Ating bai i no inap 10% VAT moa tasol VAT na sampela moa mani i go antap. Bikos Gavman i laik salim olgeta Gavman bisnis long Praivetaisesen, em bai putim was tasol long kisim takis olsem na lo bilong takis bai i senis liklik long neks yia. Gavman i tokaut pinis olsem ol woklain husat i save kisim potnait pe aninit long K5,000 long wanpela yia bai i no inap baim takis long potnait bilong ol. Dispela senis tu i ken mekim lo bilong takis i mas senis liklik long neks yia. Ol maining na timba indastri i laikim Gavman i daunim impot takis long ol bai ol i ken mekim gut wok bilong ol. Olsem na taim Gavman i daunim takis long ol, takis lo i mas senis liklik long neks yia bai wok bilong ol dispela bisnis indastri i ken ron gut.

Gavman bilong Sir Mekere Morauta i kamap wantaim planti bikpela disisen na eksen. Strong bilong mani (Kina) i no senis yet tasol yumi lukluk sapos ol dispela plen bilong Gavman bai wok gut long strongim na kirapim wok bisnis na ekonomi bilong kantri i go antap long neks yia i go. Taim i gat gutpela ekonomi, ol wok bisnis tu bai i ron gut na planti manmeri bai i gat wok long mekim, bai i gat mani long kamapim ol gutpela samting long laip na sindaun bilong wanwan insait long kantri. Na planti hevi bilong lo na oda tu i ken pundaun bikos olgeta manmeri i gat wok na i gat mani.



PLEN BILONG NESENEL PROVIDEN FAN (NPF) LONG STRETIM OL AKAUNT BILONG OL MEMBA

EKSEN

Bihainim toktok i stap long NPF (Fainensel Rikonstraksen) Bil we Palamen i bin pasim, Gavman na NPF Bod ov Trastis i bin wok hat long kamap wantaim rot bilong stretim ol hevi we i bin stap insait long ol aset bilong Fan long 31 Desemba, 1999.

1. Taim ol odita husat em Odita Jenerel i bin makim long stretim akaunt bilong 1998, ol i lukim olsem K20.1 milien i bin krangki long go long akaunt bilong ol memba. Dispela em i wanpela intres we ol i tokaut long en tasol i no save kamap, taim ol i stretim gen akaunt bilong ol memba long 31 Desemba, 1998, dispela toktok i bin kamap nating. Nau bai ol i tanim dispela K20.1 milien i go long ol memba we akaunt bilong ol i stap yet wantaim Fan olsem nambawan step. Bod i mekim dispela disisen wantaim helpim bilong ol saveman bilong lo na akaunting.
2. Long dispela nupela Bil we Gavman i pasim bai i gat sampela halivim mani i kam long Gavman na tu long ol employa o kampani. Mani we Gavman bai kontributim long narapela 15 yia wantaim sampela moa mani ol kampani bai i givim long narapela tripela moa yia bai daunim mak bilong katim mani long ol akaun bilong ol memba i kam daun olsem long 15 pesen long mak bilong mani long wanwan memba akaun i kam inap long 31 Desemba 2000. Long dispela kain rot, bai inap long stretim olgeta akaun bilong ol memba istap stret wantaim mak bilong ol aset bilong Fan long wankain taim.

OL AS TINGTING

Ol mani we i bin lus long Fan olsem ol i toktok long Komisn ov Inkwari o kot bilong askim na painaut i bin kamap bikos long ol dispela samting:

- Menesmen i no ronim gut Fan
- Menesmen i yusim mani long kirapim ol bisnis we i no karim kaikai
- Ol man husat i lukautim Fan i mekim planti stil pasin

Inkwari i toktok pinis olsem Stet i mas karim sampela bilong ol dispela hevi we mani i lus long Fan tasol Stet bai i no inap karim dispela hevi long em yet. Olgeta tripela sosel patna husat i bin makim maus bilong ol memba na stap long Bod bipo bai karim dispela hevi bihainim toktok i stap insait long Rikonstraksen Bil. Ol dispela tripela pati i karim hevi pinis long stretim dispela problem.

OL SAMTING BAI KAMAP

Ol bai bihainim tasol wanem taim memba i bin jonim Fan na long dispela bai ol i katim mani bilong ol.

- Sapos ol lain i putim mani long Fan i kamap memba long 31 Desemba, 1998, bai ol i stretim gen ol akaunt bilong ol we ol lain bilong Fan i bin kranki long putim sampela mani long akaunt bilong ol long 31 Desemba.
- Ol lain husat i save putim mani long Fan wantaim ol nupela memba husat i jonim Fan bihain long 31 Desemba 1998 na sapos ol i stap memba yet long 31 Desemba, 1999, bai ol i stretim akaunt bilong ol i go daun long 15%.
- Akaunt bilong ol memba husat i jonim Fan long 1 Januəri, 2000 bai i no inap kisim taim long ol dispela nupela senis long Fan.

OL MANMERI NA OL BIKPELA KOPORESEN BAI GO LONG SIVEL KOT BOD


Menesmen bilong NPF i kamapim planti sivel kes o rot bilong bihainim lo long kisim bek olgeta mani i bin lus long taim we Komisn ov Inkwari i bin makim. Sapos ol i kisim mani bek na bihain long ol i stretim bai ol i putim i go insait long akaunt bilong ol memba we ol i bin stretim wantaim 15%.

TAIM

NPF bai opim Fan long helpim ol memba i laikim helpim long sait bilong edukesen long 1 Januəri, 2001. NPF bai opim Fan long sait bilong kisim mani long baim haus na ol narapela tingting bilong kisim mani long Fan long 1 Februəri, 2001. Ol menesmen i tingting long salim olgeta stetmen bilong ol memba i go long ol long 31 Desemba na ol employa husat i save putim mani long Fan sampela taim long 15 Februəri, 2001.

TOKTOK I GO PAS


NPF i luksave long ol belhevi bilong komyuniti long dispela samting we ol bai katim mani bilong ol memba na i save pinis olsem ol memba bai i no amamas long ol long katim ol mani bilong ol. Bikpela blesing i kam long Gavman bilong Sir Mekere Morauta we Gavman i katim sampela mani long stapim bai ol i no katim bikpela hap mani bilong ol memba. Praim Minista Sir Mekere Morauta i kirapim wanpela Komisn ov Inkwari we i wok long kamautim ol stil pasin na ol narapela krangki samting i bin kamap long Fan long bipo. Nupela Bod na Menesmen i wok long bihainim tasol dispela rot long kirapim gen dispela bikpela Nesanel Institusesn.




• (lephan) Gavana bilong Enga Peter Ipatas na Gavana bilong Simbu Pater Louis Ambane i wokabaut namel long ol plisman i go long bikpela bung bilong ol Hailens Gavana long hagen siti long mun Oktoba. Long sait sait em ol kopi groas bilong hailens i holim ol pepa long soim kros bilong ol long gavman wantaim lo em i laik kamapim long wok bilong kopi.



• Ol pipel bilong Ungai Bena i amamas long ol nupela helpim memba bilong ol Damson Lafana i givim ol. Ol arapela nesanel lida tu i bin kamap long witnessim dispela seremoni. *Poto: SAPE METTA.*




• Kamera man bilong Wantok niuspepa i bin ai op taim em i lukim ol dispela yangpela meri i sindaun na skul long Waigani Trening Koles. Oisem na em i stilim wanpela piksa bilong ol.



• Antap raithan: Dispela em ol sampela ples lain insait long Simbu provins husat i bung long taim ol wokman bilong Kopi Industri Kopresen (CIC) i go long kisim bek ol dinau mani ol ples lain i bin kisim bipo long karimaut kopi bisnis bilong ol wantaim. *Poto: JAMES KILA.*

• Lephon: Wanpela kain miks stail bilong wokim gutpela tolet insait long ples. Gutpela tolet i ken kamapim gutpela helt na abrusim ol sik nogut.

• Raithan: Ol sumatin long Simbu Engliken Vokesenel Trening Koles i wok long wokim simen raunim wanpela wara teng bilong wanpela tisa bilong ol long ol skul. Lokol level gavman long Simbu i laikim dispela stail tu long wara teng long hap bikos teng bai sanap strong na wara tu bai kol gut na i stap.



Hevi i wok long kamap bikpela long Sandaun boda

• Hevi long Sandaun boda i wok long go bikpela we ol manmeri na pikinini long Wes Papua i wok long ronawe i kam planti na stap long Sandaun na Westen provins sait. Ol i ronawe long pait namel long ol OPM paitman na ol Indonesia ami namel long boda bilong tupela kantri wantaim.

Papua Niugini Gavman i tok em i no inap sapatim ol lain i ronawe i kam bikos ol i no refi-uji. Australia Gavman tu i tok dispela em hevi bilong Indonesia na ol yet i mas stret bihainim lo bilong ol yet long kantri bilong ol. Ripot i tok Yunaitet Nesenel i no luksave long ol olsem refi-uji na i no inap givim helpim long ol long sait bilong kaikai, ol samting bilong slip na ol marasin nabaut.

Wanpela grup tasol em Katolik sios i wok long mekim bikpela wok tru long helpim ol dispela lain manmeri na pikinini wantaim kaikai na ol samting slip na werim. Planti bilong ol dispela Wes Papua manmeri i ronawe lusim ples, haus na ol samting bilong ol bikos long

pait na i kam stap long hap sait bilong Papua Niugini we i nogat pait long en. Namba bilong ol i wok long groa bikpela olgeta taim klostu 300 nau.

• Plis Komisina John Wakon i gat nem long opis bilong Pablik Prosekyuta long sampela asua we i bin kamap long mani bilong ka alawens aninit long nem we i no stret.

Pablik Prosekyuta Panuel Mogish i tok em i kism pinis ol ripot i kam long Omudsmen Komisn long wok painimaut bilong ol. Olsem na em i bai lukluk insait long dispela ripot na sapos i gat as bilong kamapim kot, em bai askim long kamapim kot bilong Lidasip Traibunel. Dispela i save wankair long olgeta arapela kot bilong ol lida.

Mista Wakon tu i gat wanpela kot oda i stap yet long kism bek olpela Deputi Plis Komisina Garry Baki long wok bilong em. Mista Wakon i bin rausim Garry Baki long wok las yia taim Gavman i bin makim em olsem Plis Komisina.

Tasol Mista Baki i bin kot na kot i mekim disisen long em i mas go bek long wok bilong em wantaim plis fos.

• Ol Hailans Gavana i holim gen bung bilong ol long Simbu provins tupela wik i go pinis na strongim ol bikpela toktok ol i bin kamapim bipo long bringim ol sevis na developmen i go insait long Hailans rijon. Ol i mekim bikpela askim i go long Nesenel Gavman long dispela bung bilong ol olsem olgeta yia ol i laik lukim Nesenel Gavman i mas putim mani i go long wok developmen na stretim bilong hailans haiwe long olgeta yia.

Ol i tok hailans haiwe em wanpela bikpela sevis tru we planti bikpela wok na senis i kamap long en olsem na Nesenel Gavman, i mas oltaim putim was long stret rot ya long olgeta yia.

• Elcom i tokaut pinis olsem planti pawa jenereta bilong ol insait long ol provins na ol

OL HAP HAP
nius

distrik i bagarap pinis na i hat long stretim ol bikos i nogat mani bilong stretim. Mani em bikpela hevi long ol na ol i no inap stretim dispela olgeta hevi bilong ol pawa jenereta insait long ol provins na ol distrik.

Elcom ripot long mun Oktoba i tokaut olsem ol bai putim was tasol long stretim ol bikpela jenereta we i gat bikpela wok tru long ol manmeri na komyuniti we i save kism strong long wok bilong pawa jenereta.



STAP ISI LONG FESTIV SISEN

Papua Niugini Benking Koperesen i putim moa long 1000 EFTPOS masin long ol stua insait long kantri long mekim Krismas Shopping bilong yu i moa isi, sef na gutpela long dispela taim bilong hamamas.

Wantaim PNGBC SaveCard, yu ken kism mani long wanem taim yu laik, long ol PNGBC EFTPOS masin.

Papua Niugini Benking Koperesen i tok Meri Krismas na Hepi Niu Ya long olgeta man, meri na pikinini long PNG.



WANTOK

NIUSPEPA BILONG YUMI OL PAPUA NIUGINI STRET

Kalabus lain ronawe long Krismas

SAMPELA biknem kalabus lain i bin ronawe long Bomanā haus kalabus long Krismas wiken long las wik i wanpela kirap nogut nius tru long harim bikos namba bilong ol i bikpela tumas. Namba olsem 18 kalabus lain olgeta i ronawe long haus kalabus long las wiken taim olgeta hap bilong Papua Niugini i wok long amamasim Krismas i stap.

Bikpela askim tru em ol woda i stap we na ol kalabus lain i ronawe. Ol i brukim banis olsem wanem na ronawe i kam ausait. Dispela i no gutpela tumas bikos wanem rot ol dispela 18 kalabus lain i yusim em bai ol lain i stap bek i save pinis na ol tu bai bihainim wankain rot bihain. Ol bai wet inap sans bilong ol i kamap na ol tu bai tekov lusim banis na ronawe.

Banis kalabus i mas lok strong bai i no ken gat wanpela sans long ol kalabus lain i ronawe.


Rekot i soim olsem ol dispela 18 kalabus lain em ol hatpela lain tru we ol i gat nem long ol bikpela trabel na bikhet pasin. Ol i gat nem long ol bikpela stil, kilim man i dai, holim na bagarapim ol meri, sut long sotgan na arapela trabel moa. Nau em i wok bilong ol gutpela manmeri long komyuniti long lukaut gut na was gut long ol yet bikos ol dispela lain i ken mekim moa trabel taim ol i raun fri long ausait.

I tru bai ol plisman i mekim bikpela hat wok nau long traim painim na holim ol dispela lain na kism ol i go bek long haus kalabus. Tasol ol plisman tu i gat planti wok i stap pinis long han bilong ol long mekim long lukautim lo na oda insait long kantri long mekim kamap gutpela komyuniti we ol manmeri pikinini i ken raun gut na sindaun gut long en. Nau em ekstra wok i kamap bai ol i mas pulim taitim strong bilong ol i go moa long dispela hevi gen.

Komyuniti tu i gat wok long helpim ol plisman na toksave long wanem hap ol i lukim ol dispela kalabus lain i hait i stap. Ol kalabus lain long Sentrel provins bai isi long ronawe kwik i go long asples bilong ol. Tasol ol lain long narapela provins bai paul hait i stap yet long Mosbi siti. Olsem na em i no hat long luksave na ripot long plis long holim ol na kism ol i go bek long kalabus.

Olgeta krismas Praim Minista bilong Papua Niugini i gat wok bilong givim sampela kain marimari long ol wanwan kalabus lain na lusim ol i kam aut. Tasol long dispela yia, Praim Minista Sir Mekere Morauta i no bin mekim dispela.

Craft Works 0919



PNG bai holim OFC klab sempionsip

SOKA RIPOT

RIJONEL soka bodi, Osenia Futbol Konfederesen (OFC) i makim Pot Mosbi olsem ples we bai holim OFC klab sempionsip bilong 2001.

Dispela tonamen bai pulim ol sempion klab insait long wanwan kantri long Osenia rijen we i karamapim Australia na Nu Silan.

Sempion tim bilong Australia Wollongong Wolves bai kamap long dispela tonamen. Biknem pilaia bilong PNG bipo Manis Lamond i bin pilai lik-

lik taim wantaim dispela tim na bihain em i pinis.

Komiti bilong OFC i makim Pot Mosbi bihainim wanpela ripot bilong David Wells bilong Nu Silan Turf Institute.

Wells i bin kam long kantri long mekim wok na sekim graun bilong soka we bai redi bipo long namba wan gem namel long PNG Unitech na Napier City Rover bilong Nu Silan.

Dispela graun we i redi bai inap long holim 29 gem olgeta long dispela tonamen.

Papua Niugini Futbol Asosiesen (PNGFA) i tromoi \$A24,000 pinis long stretim ples pilai, lait na ples sindaun na toilet samting.

Dispela sempionsip i pulim 11-pela tim olgeta we wanpela grup bai i gat 6-pela tim na arapela em 5-pela tim tasol. Tupela win bilong wanwan pul bai salens long kwata fainel.

Long Grup A em: Wollongong Wolves (Australia), Foodtown Warriors (Fiji), Napier City Rovers (Nu Silan), Unitech FC (PNG),

Laugu United FC (Solomon Island) na Lotoha'pai FC (Tonga).

Long Grup B em: Pansa FC (Amerika Samoa), Tupapa FC (Cook Island), Titavi FC (Samoa), AS Venus (Tahiti) na Tafea FC (Vanuatu).

Unitech bilong Lae i winim PNGFA nesanel klab sempionsip olsem na ol bai makim kantri long dispela tonamen.

Wanem tim i winim dispela sempionsip bai makim OFC long FIFA World Club championship long Spain long Julai 30 i go long August 12.

Hebamo winim Tatana fainel

OP-SISEN LIG RIPOT

MAINA primia Hebamo Eels i winim Maltin Sharks 18-16 long autim Tatana Viles Op-sisen ragbi lig gren fainel las wiken. Dispela pilai ya i bin kamap long Sir Hubert Murray stadium long Konedobu long wik Sarere.

Eels i brukim kiau taim faiv-et Gaigo Sam i wel namel long difens bilong Sharks na skoa. Konvesen i no gutpela na skoa i sanap 4-0.

Sharks i bekim wantaim gutpela trai i kam long ol fowat. Ol fowat pilaia olsem Peter Willie, Martin Daure na Daure Veidiho i wok hat stret long setim bikpela prop Daure Patrick long skoa.

Diatau Bill Raho i kikim konvesen na skoa bilong Sharks i go 6-4.

Bihain long dispela konvesen, Sharks i statim paia stret na ol i setim senta bilong ol Baru Gaudi long skoa. Dispela i surikim skoa bilong boi Sharks i go long 10-4.

Riserv bilong Eels Jim Jones i setim Ume Nou long putim wanpela trai we i kirapim bek laip bilong tim. Konvesen i go insait na long hap taim tupela tim wantaim i sanap olsem 10-10.

Insait long namba tu hap, nupela fowat Sogo Siai i skorim wanpela trai gen na surkim skoa i go long 16-10.

Orait, referi i painim aut olsem ol lain Sharks i

opsait, orait ol i kikim penalti gol ya n skoa nau i sanap 18-10

Ol Sharks i pasim tingting tasol wantaim wanpela konsolosen trai i kam long wanpela fowat na skoa i sanap long fultaim 18-16

Ol lain i pilai strong long Hebamo Eels em Gaigo Sama, Diatan Ai, Ume Nou na Mero Geua na long sait bilong Sharks em Peter Willie, Baru Gaudi, Daure Patrick, Diatan Raho na Vicky Kila.

Na long ol arapela gem, Maltin Sharks i bekim dianu long nekim United Tigers 12-8 long B gret. Na Islander Bullets i dro wantaim Dakanamo Storms 4-4 long fultaim. Ol i larim golen rul, na Bullets i skorim namba wan trai long win.

Basil i winim OFC presiden

BOSS bilong Soka Australia (SA) Basil Scarsella i winim wok olsem nupela presiden bilong Osenia Futbol Konfederesen (OFC).

Scarsella i autim strongpela kandidate na namba tu ekting presiden Tinsley Lulu long kisim dispela wok. Dispela ileksen bilong Scarsella i kamap insait long wanpela miting long Pot Vila, Vanuatu.

Resis namel long Scarsella na Lulu i strong bihain long tupela arapela kandidate Tautufu Roebeck bilong Samoa na Adrian Wickham i pul aut long resis bilong presiden.

Ileksen bilong presiden i kaap bihain long olpela presiden Charles Dempsey i risain. Em i risain long i no bihainim toktok bilong OFC Kongress long makim Saut Afrika long holim 2002 Wol Kap we Jemani i winim. Dempsey i no vot na ol araplea mamba kantri i vot na Jemani i win.


Presiden bilong PNGFA Madiu Andrew na Kisakiu Posman i makim PNG long dispela miting bilong OFC.

Posman i tokim Wantok olsem ol bai lukluk tasol long mekim wok wantaim nupela presiden maski ol i no sapatim em long taim bilong kempen long kisim wok OFC presiden.

Scarsella bai holim wok inap 2002 we OFC bai holim bikpela kibung bilong em long makim nupela presiden we bai ran inap 4-pela yia olgeta.

Liklik histori bilong OFC

Tingting bilong kirapim konfederesen i stat long wanpela miting namel long presiden



• Basil Scarsella.

bilong FIFA Sir Stanley Rous, Jim Bayutti bilong Australia na Sid Guppy bilong Nu Silan long Olympik Gems long Tokyo, Japan.

Nu Silan Futbol Asosiesen i askim Charles Dempsey long wok wantaim Bayutti bilong Australia long traime wokim konstitutsen na lo bilong OFC.

Tupela wantaim i wok hat tru long kisim sapat bilong ol kantri long arapela hap bilong wol. Na long 1996, FIFA i oraitim OFC long kamap.

Ol lain i statim OFC em Australia, Fiji, Nu Silan na PNG.

Mosbi boksing i makim ol pilaia

IVAN BAYAGAU i raitim

MOSBI Amata Boksing union i makim 12-pela boksa long makim Mosbi long Nesanel Sempionsip long mun Februari 2001 long Goroka, Isten Hailens provins.

Yunion i bin makim dispela ol 12-pela pilaia bihain long ol i bin gat wanpela resis we yunion i bin kamapim long makim ol gutpela pilaia long makim Mosbi.

Tripela boksing klab insait long Mosbi em, Jack & Jill, Defens na Gerehu i bin putim 36-pela pilaia bilong ol long dispela resis we i bin kamap long boksing de Desemba 26, 2000 long Se John Guise stadiem.

Long dispela resis yunion tu i bin givim sans long ol nupela boksa husat i stat nau tasol long givim ol sampela kain skul long ring. Tasol samting tru i bin kamap namel long ol sinia pilaia.

Presiden bilong yunion Sam Paulus i tok long dispela resis, ol i bai lukim husat bai makim Mosbi long sempionsip long Goroka, Isten Hailens provins na bihain long sempionsip, ol i bai kisim ol pilaia long makim Papua Niugini long Arafura gems, Australia na tu bilong Mini SP gems long Fiji.

Em i tok olsem boksing i gat nem long intenesenel gem tasol nau yet i luk olsem dispela pilai i wok long dai isi isi.

Paulus i tok olsem ol resis olsem dispela we i kamap long Mosbi i ken bringim bek dispela intres long bilong ol pipel. Long dispela kompetsem long wiken i bin gat biknem boksa olsem Eddie Dai, John Deklam na Peter Raphael i bin stap long dispela resis.

Wanpela biknem ragbi pilaia nau i kamap boksa, James Miviri i bin stap long dispela resis i bin kontes long 91 kilogram divisen webai em i bin bungim Petrus Powa.

BOKSING RIPOT

Refri i bin stopim dispela pait insait long tu minit bihain em i bin skelim olsem Miviri i strong tumas long birua bilong em, refri i givim dispela pait i go long Miviri.

Long narapela pait long 51 kilogram Tony Waisa i bin autim Jack Willie husat i junia long dispela divisen na bikos em i nogat narapela pilaia long pait wantaim ol jas i bin putim em long pait wantaim Waisa. Waisa i go het long pait gen wantaim Dominic Bauai na Waisa autim Bauai na em i winim 51 kilogram divisen taitel.

Long 57 kilogram Paul Lare i nekim Issac Saliki na Lare gen i nekim Francis Oa long winim taitel.

Ricky Berua husat i bin gat planti sapota long dispela de i bin winim tupela pait bilong em taim em i winim Michael Mondo na Rodney Jackson long 60 kilogram divisen.

Refri i bin stopim pait hariap tru long 63.5 kilogram na givim skoa i go long Steven Elias long pilai namel long em na Alphonse Kalai bikos em i skelim olsem Elias i bin strong tumas long Kalai.

Long 67 kilogram kosa bilong Simon Nakson i bin tromoi tawel go insait long ring long stopim pait namel long em na Emmanuel Kaoka bikos kosa ya i lukim olsem pilaia bilong em (Nakson) i no luk fit long pait. Kaoka i bin go het pait gen na pait wantaim Victor Siun na autim tiket bilong Siun.

John Deklam husat i het kosa bilong Gerehu boksing klab i winim taitel long 75 kilogram taim em i winim David Tasig na Kevin Ragu. Na long 85 kilogram Eddie Dai i bin wilwilim yu bilong Peter Raphael bihain long wanpela gutpela pilai i bin kamap namel long tupela. Ol jas i mekim disisen olsem tupela ya bai makim Mosbi yet long sempionsip we i bai kamap long Goroka. Ol wina bilong narapela divisen tu bai makim Mosbi.



IKEN WOKIM GUTPELA SAMTING LONG YU




• Ol susa bilong Not basketbal tim, husat i bin traim strong na stall bilong ol insait long Andrew Baing Spot tonamen. Foto: WATSON GABANA.




• Ol susa long Bara i kisim win na kisim poto long Lae soka resis.



• Sentrel ampaia Andrew Moe i lindaun long stretim hom bes plet long gem namel long Manalos na MSC.



• Lephon: Beta Simon Manet bilong Manalos i redi tasol long paitim insait long gem egensim MSC long Pot Mosbi mens sofbal resis. Manalos i win 2-1.



• Raithan: Straika bilong Yunited long Goroka soka gren fainel. Yunaited i autim Kalibobo na winim sil.



IKEN WOKIM GUTPELA SAMTING LONG YU

Kapari pinisim 2000 wantim ragbi nains

RAGBI NAINS RIPOT

WANPELA viles insait long Sentral provins, Kapari bai pinisim 2000 sisen wantaim bikipela ragbi nains tonamen long dispela wiken.

Dispela tas bai stat tude na pinis tumora. Ol fainel bilong dispela nains kompetisen bai kamap long niu yia stret, Januari 1, 2001.

Bai i gat 9-pela tim i putim tim. Ol pilaia long dispela tim bai kam long

Kapari/Virola viles, Kupiano na Moreguina Gavman stesin.

Sampela ol klab o ol viles pipel bilong Kapari insait long Pot Mosbi i gat tingting tu long putim tim ya.

Dispela tonamen bai pulim bikipela sapot tru long Kapari viles yet na tu ol ples klostu long Kapari.

Bai i gat tripela pul we wantaim pul bai i gat tripela tim. Olgeta semi fainel bilong dispela kompetisen bai kamap long tumora (Disemba 29).

Kyokushin karate i givim bek long komyuniti

KARATE RIPOT

DAIREKTA bilong Kyokushin Karate Walter Schnaubelt i givim K500 j go long Maternity Ward bilong Namatanai Hospital.

Ol opisel bilong Namatanai bai yusim dispela mani long baim ultrasound masin long harim o glasim bel bilong ol mama i gat bel.

Wally i givim dispela mani we em i kisim long namba wan provinsal tonamen bilong em i kamap long Namatanai las mun. Dispela ol mani em i mekim long ol man i baim get na kam long Kyokushin karate.

Schnaubelt i tok olsem dispela em wanpela we bilong Kyokushin karate long givim samting i go bek long komyuniti. Dispela helpim bai sapotim tru ol mama husat em ol bikipela samting tru long sosaiti bilong yumi.

"Mipela olgeta i ken mekim senis long komyuniti sapos mipela wanwan i mekim wok bilong mipela," Schnaubelt i tok.

Insait long wankain stori; NCD Taekwando United bai holim namba wan skul bilong ol long Mosbi Saut, Mosbi Is na Mosbi Wes long Januari 25.

Ol lain i laik lainim skul bilong taekwando i ken kamap. Ol pikinini krismas bilong ol i abrusim 8 i ken kamap long kisim skul.

Hetman bilong Taekwando skul Edward Kassman i tok olsem dispela skul bai gat fitness, self-difens, olimpik fri-stail, sperring na mental trening.

Kassman i bin holim wanpela kos bilong tisim na trening taekwando long ol nupela studen. Em i tok nau em i painim isi tru long lukautim ol nupela studen bilong em.

Em i tok wanem ol lain i laik save moa i ken ringim em long 310 8277 o 325 1449.

Em i laik kisim dispela taim tu long toktok amamas i go long Ledi Carol Kidu, Steamships, PNG Sports Federesen na PNG Taekwando long givim sapot long ol wok bilong em.

Mani bilong sofbal i stap gut

SOFBAL RIPOT

OL SOFBAL klab insait long Pot Mosbi mens kompetisen i amamas long ripot bilong tresera Francis Dakenny taim em i ritim long bikipela Anuel Jenerel Miting (AGM) las wiken long Elcom klab.

Dakenny i bihainim gut lo bilong akauns long tokaut long wanwan risit we em i tromoi mani na tu em i kisim mani long we. Na em i toktok long mani, em i mekim sampela toktok we i ken helpim long kamapim gut dispela ripot bilong mani long bihain taim.

AGM i oraitim na welkamim ripot we i

tokaut olsem K30,000 em ol i tromoi las sisen.

Dispela mani em ol i yusim long edministresen, salim Pot Mosbi tim na bekim sampela dinau.

Total mani i go aut em K29,917.87 long risit bilong K30, 763,62 long 1999-2000 sofbal sisen.

Pot Mosbi Mens sofbal asosiesen i mekim mani long ol klab, get teking na fanraising na apil. Long nominesen fi em K9,255, get teking em K14,480, fanraising K6,968.62 na K60 long apil.

Asosiesen i tromoi mani (K10,126.55) long edministresen, wokabaut bilong ol eksekutiv na

kos bilong holim gren fainel.

Narapela K6,766.80 em ol i givim long helpim ol pilaia long go long nesenel sempionsip long Rabaul we i bin kamap long Epril.

Dakenny i tok ol i tromoi K3,352.82 long bekim ol dinau Pot Mosbi sofbal i gat long ol lain insait long siti long las sisen 1998-1999. Em i bekim dispela ol dinau long daunim tingting bilong kamapim kot namel long ol lain na Pot Mosbi mens sofbal.

Em i lusim K3,583.70 long stretim Daimon One, pe bilong ampaia,

skora na ol asisten i sanap olsem K4,917.00.

Pot Mosbi Mens sofbal Asosiesen i tromoi K600 long baim ol nupela bai bilong Pot Mosbi tim

Dakenny i tok em i kisim wok tresera las sisen we akaun bilong Pot Mosbi i nogat wanpela mani i stap.

Em i tok olsem em i no kisim yet ripot bilong 1998/99 we ol i ken tokaut long we ol i tromoi mani.

Tresera i tok nau asosiesen i gat sampela mani na em i bikipela samting tru sapos ol klab i ken helpim long traime painim wanpela mesa sponsa ya.



• Pilaia bilong Elcom (wantaim helmet) i traime hat tru long winim fes bes namel long Elcom na MSC insait long Pot Mosbi sofbal kompetisen. Elcom i win 7-2. Foto: HENRY MORABANG.

Arafura i gat liklik taim stap

ARAFURA GEMS RIPOT

WANEM ol spot i laik go resis long Arafura Gems i mas pinisim olgeta wok redi bilong ol long pinis bilong mun Januari 2001.

Namel long nau na mun Me i gat 5-pela mun tasol i stap long ol spots i redim tim bilong ol.

Siaman bilong Arafura Gems Plening Komiti Thomas Kahai i tok Arafura Gems i save kamap bihain long olgeta tupela yia. Arafura Gems bilong 2001 bai ran long May 19 na pinis long May 26.

Mista Kahai i tok em i no amamas tru long wanem planti ol spot i

slo tru long salim lista bilong ol pilaia na tu ol levi fi.

Em i tok planti ol wok redi i mas pinis long mun Disemba, na sapos nogat Januari 2001. Olgeta levi fi i mas kamap long wanwan spot na ol i ken toksave long Plening Komiti hamas ol spotman na meri ol bai salim.

Siaman i tok planti ol spot i go malolo, na i no min ol tim i mas malolo sapos ol i laik go pilai long Darwin. Ol i mas wok strong long redim tim.

"Bikipela samting tru Plening Komiti i laikim em long K800 levi fi. Olgeta spot i mas hariapim wanem ol pilaia ol i makim.

"Mipela kamap long pinis bilong Disemba, na planti ol lain spot i no bai yet dispela levi fi bilong ol, maskim Plening Komiti i givim aut toksave long mun Oktoba," Kahai i tokim Wantok.

Ol wanwan spot i mas makim fainel tim na salim lista bilong ol i kam long komiti we ol i ken bukim balus tiket na tu save long hamas namba bilong ol yunifom ol i ken baim bilong ol spotman na meri.

"Sapos ol tim i stretim tim bilong ol hariap, em bai gutpela tru. Dispela bai givim gutpela helpim long komiti long mekim wok bilong em," Kahai i tok.

Hawks na Norths i bung

..... ol sot long pilaia long Pot Mosbi ya

TUPELA sofbal klab bilong ol man insait long Pot Mosbi, Norths na Hawks, i kamapim histori na laik bung wantaim.

Hawks i gat A gret tim tasol, na Norths i gat tim insait long B na C gret.

Ol eksekutiv bilong tupela klab, Alois Puipui (Hawks) na Titus Kabui (Norths) i tok dispela bung bilong tupela klab i bihain agrimen ol i sainim i no longtaim i go.

Toktok bilong bung bilong tupela klab i bin kamap long anuel jenerel miting bilong Pot Mosbi mens sofbal las wiken. Olgeta klab eksekutiv i sapotim tingting bilong dispela tupela klab.

Ol bai tokaut long dispela agrimen taim ol i sainim nupela ol pilaia long Januari 1, 2001. Dispela bung gen bilong tupela klab bai sevim tru nem bilong Hawks bikos em wanpela strongpela na olupela klab bilong Pot Mosbi.

Aninit long dispela agrimen, ol sinia pilaia bilong Norths bai trenfer na register long Hawks long pilai long A gret.

Norths nau bai surik i go long A gret, na Hawks bai go daun long B na C gret.

Insait long AGM, eksekutiv bilong Tigers Francis Diap i askim ol lain opisel bilong arapela klab long sapotim tingting bilong Hawks na Norths long bung long helpim Hawks long stap yet long kompetisen.

Em i tok sapos mipela i gat kankain ol krangki tingting, em bai bagarapim tasol nem bilong mens sofbal long Pot Mosbi. Na dispela i no gutpela long ol arapela sofbal klab long kantri i lukim.

"Nau em wanpela hatpela taim tru long ranim o lukautim wanpela sinia klab insait long Pot Mosbi kompetisen we yu mas painim ol pilaia. Planti ol pilaia i no gat tingting long pilai ya.

Dispela bung bilong tupela klab bai helpim tru Hawks long pilai gen long wanpela yia moa wantaim helpim i kam long ol Norths.

"Em bai sore stret long lukim Hawks i aut long Pot Mosbi mens sofbal kompetisen," Puipui i tokim Wantok.

Kabui i tok dispela bung i gutpela long lukim Hawks i stap yet olsem wanpela sinia klab long kompetisen bilong Pot Mosbi.

Dispela bung em bilong nau tasol na bai skelim sapos olgeta samting i wok gut o nogat.

"Mipela ol (Hawks na Norths) bai sindaun long lukluk na stretim ol samting ol op-sisen ya."

Ol 5-pela sinia pilaia bilong Hawks olsem Sialia Taman, Sydney Wesley, Albert Baiiai, Long Kauba na Alois Puipui bai stap yet. Ol bai kisim sapos i kam long ol pilaia olsem Titus Kabui, Eugene Lavatul, Sinai Kiliu na Joe Anton.



IKEN WOKIM GUTPELA SAMTING LONG YU

Singaut long PNGRFL helpim Mt Hagen

RAGBI LIG RIPOT

BIKPELA singaut nau i go long PNG Ragbi Futbal Lig long stretim hevi nau i karamapim Mt Hagen Ragbi Lig insait long Westen Hailens provins.

Olpele tim menesa bilong Mt Hagen Eagles Paul Morris i mekim dispela singaut bihain long ol klab na pilai na no soim laik long pilai.

Mista Morris i tok ol pilai na klab i gat laik tasol ol i no wanbel long ol administreta bilong Mt Hagen Lig i wok long stap nau. Em i tok sapos i gat senis, ating ol klab na pilai bai kambek gen.

Em i singaut long PNGRFL long helpim Mt Hagen Lig bikos em wanpela bikpela ragbi lig senta we i save kamapim bikpela mani bilong ol.

Mista Morris i tok watpo ol bikpela kampani i les long sponsarim tim na tu Mt Hagen Eagles em bikos ol i no gat bilip long ol lain i

holim wok olsem administreta bilong ragbi lig.

Long bipo, planti ol kampani i save givim mani long ragbi lig na tu save sapotim Mt Hagen Eagles olsem ko-sponsa. Tasol long dispela las tri yia, nogat wanpela helpim i kam long ol kampani.

Olsem na Mista Morris i singaut i go long nesanel bodi long skelim na traim helpim Mt Hagen Lig. Dispela lig i sapotim nesanel tim wantaim sampela ol gutpela pilai olsem Max Tiri, David Gomia, James Kops, Peter Dun, Andrew Norman na tu Michael Angra husat i dai pinis.

Em i tok em i yet i staitim wanpela tim, Nebilyer Brothers, na em i save singautim ol hauslain long kam sapotim tim bilong em.

Pilai graun long Rebiamaul i nogat hevi. Ol hevi bilong brukim kapa bilong banis, na tu gren sten i kamap bikos nogat gutpela sekyuriti long lukautim dispela ol

hap eria. Bikpela toktok nau i kamap watpo? i nogat mani ya.

"Mipela mas stat lukautim ol pilai bilong mipela na noken tingim mipela. Olsem na administresen i mas stat long lukautim ol pilai na divelopim ragbi lig insait long Mt Hagen. Em i taim nau mipela i ken pulim ol sponsa i kambek na mekim ol i gat bilip long mipela," Morris i tok.

Morris i stap olsem tim menesa 6-pela yia olgeta. Em i tok Mt Hagen Eagles i save karim nem bilong Westen Hailens tasol em i no kisim wanpela gutpela sponsa long las tri yia.

Em bai wari tru sapos Mt Hagen Eagles i aut long SP Kap resis.

Olsem tim menesa em i no kisim wanpela gutpela sapot tru ya. Planti ol pilai i no save kisim pe long pilai, na ol i save taitim bun long pilai bikos ol i laik pilai ragbi lig long nem bilong ol na bilong provins.

Alotau holim 2001 Papua Dat sempionsip

DART RIPOT

SEKRETARI Jenerel bilong Papua Rijnonel Dat Federesen (PRDF) Mojech Selsel i tokaut olsem Alotau, biktaun bilong Milen Be provins, bai holim 2001 Papua Dat sempionsip.

Mista Selsel i autim dispela nius taim em i toktok wantaim ogenaising komiti bilong PDS las wik.

Em i tok PRDF i makim Alotau insait long las minit bilong ol i kamap long Pot Mosbi long Septemba 1999. Insait long dis-

pela miting, olgeta eksekutiv i makim biktaun bilong Milen Be olsem ples bilong holim sempionsip.

Selsel i askim ol wanwan asosiesen na klab insait long Papua rijn husat i laik resis i mas afiliet wantaim rijnonel bodi pastaim na ken sapt insait long sempionsip. Em i askim ol klab olsem noken resis o trening nating sapos ol i no afiliet wantaim rijnonel bodi.

Mista Selsel o arapela nem Jackie Chan i stap nau long Alotau long stretim wok redi

bilong dispela Papua Rijnonel Dat sempionsip.

Ol ogenaising komiti i stap pinis, na bikpela wok bilong ol em long painim mani long holim dispela sempionsip.

Komiti i singaut i go long ol bikpela kampani insait long rijn na tu insait long Alotau yet long traim givim han long sapotim dat. Em i tok taim ol tim i kam long Milen Be, ol bai karim gutnem bilong Alotau i go bek long asples bilong ol.

Selsel i tok ol em ol sampela biknem

long Alotau taun. Em i gat bilip olsem wantaim ol dispela lain, em i ken kamapim gut tru gutpela komiti long strongim wok bilong painim sponsasip.

Nem bilong ol komiti em: Toto Geruwaga (siaman), Barbara Abel, Peter Fong, Marion Elliot, Gahusi Geruwaga, Badaea Sepa, Ms Modie Rheen, Chris Meltem na Jack Sakias.

Nau yet Selsel i tingting long bringim ol eksekutiv memba bilong PRDF long Alotau long sekim ol ples pilai.

Kikboksing bai go het long Erave

KIKBOKSING RIPOT

KIKBOKSING trial sempionsip bai kamap yet long Erave insait long Sauten Hailens long neks wik.

Sempion kikboksa Stanley Nandex yet i go pas long redi dispela sempionsip. Dispela kikboksing tonamen i pulim ol paitman i kam long olples olsem Gobe, Samberigi, yanguri, Marorogo, Erave, Mendi (SHP), Simbu, Lae na Pot Mosbi.

Nandex husat i gat wanpela kikboksing skul long Pot Mosbi i tokaut olsem olgeta studen bilong em i go bek pinis long ples na statim trening bilong ol long winim dispela resis ya.


Rul bilong pait ya bai olsek kikboksing, ful kontak (ring karate). Long redim ol paitman long dispela tonamen, Nandex i stap pinis long Erave long holim sampela skul long pasin bilong pait.

Long Januari 2-4, Nandex bai holim wanpela semina long skul bilong kikboksing. Dispela semina na sempionsip em hap plen bilong PNG Kikboksing Asosiesen Developmen plen long painim ol lain long rurel na provinsal level.

Na dispela tonamen tu em long kamapim sans bilong ol yangpela man i no wok long traim pait strong long kisim sans long pait long provinsal, rijnonel na to nesanel kikboksing sempionsip long bihain taim.

Ol lain i win bai go pait insait long Hailens Rijnonel Kikboksing sempionsip we bai kamap long Mas 30-31 long Mendi.

Insait long dispela pait, Nandex bai traim difendim taitel bilong Nu Saut Wels, Australia, we em i winim. I luk olsem ol wanples bilong em bai les long salensim em bikos em i biknem paitman ya.



• Kikboksa Stanley Nandex i givim CCP tropi bilong em i go long John Wagambie bilong Chevron.

Nandex i tok kikboksing em i no long bagarapim narapela man. Kikboksing em wanpela spot tu long lainim ol man long pasin bilong bel-isi na lukautim narapela.

"Mipela long Gobe eria i gat planti ol kainkain lain we i kros long graun. Dispela kikboksing

em bilong helpim ol yangpela long noken tingting long kamapim hevi tasol stretim hevi long gutpela rot," em i tok.

Nandex i laik tok tenk yu long Chevron Niugini, Memba bilong Kagua David Basua long helpim em i holim dispela tonamen.

PMSA putim tambu long PNGFA long yusim Bisini

HENRY MORABANG i raitim

POT MOSBI Soka Asosiesen (PMSA) i putim strongpela tambu stret long PNGFA Futbal Asosiesen (PNGFA) long noken yusim soka fil bilong em long holim ol trening bilong en.

PMSA i autim dispela belhevi bihain long PNGFA i no givim sampela helpim mani long stretim ples pilai long traim holim Osenia Futbal Konfederesen (OFC) klab sempionsip we bai kamap long neks mun.

Ekting presiden bilong PMSA Mark Kelep i sutim tok long PNGFA long i no save mekim gut wok bilong em.

Mista Kelep i tok toktok bilong kisim OFC Klab sempionsip i kam long Pot Mosbi i kamap longpela taim pinis, na watpo PNGFA i guria tasol nau long painim ples bilong holim dispela pilai.

Em i tok em i ting ol i ken yusim mani i kam long OFC long kamapim gut Bisini Soka Graun long holim dispela tonamen na tu putim klab haus, lait na wokim wanpela soka fil.

Kelep i sutim tok tu olsem kain pasin PNGFA i mekim i no helpim tru soka. Nau ol PNGFA i givim mani i go long Pot Mosbi Ragbi Lig, na soka bai lusim bikpela mani tru long helpim narapela spot.

Em i tok PNGFA i gat fultaim sekretari Ivan Ngahan tasol em i no skelim wok we nau ol i paul olgeta na givim mani long ragbi lig. Em i tok dispela helpim bilong PNGFA i go long ragbi lig, em olsem wanpela krismas present ya.

Siaman bilong PNGFA Teknikel Komiti Kisaku Posman i tok Mista

SOKA RIPOT

Kelep i gat rait long autim tingting bilong em.

Em i laik toktok strong olsem PNGFA i skelim olgeta rot bilong holim tonamen, na i painim olsem em bai dia tumas. Olsem na ol i makim PRL olsem ples bilong holim OFC tonamen.

Posman i tok Bisini soka oval i gutpela. Tasol namba wan samting em, ol i nogat gutpela lait, mak bilong tupela fil i no kisim intanesenel stendad na sapos ol i brukim fil, Bisini bai gat wanpela fil tasol.

Em i min olsem sapos wok i kamap long Bisini, em bai kosim PNGFA bikpela mani tru long stretim ol dispela wok.

Arapela hap em Sir Hubert Murray stedium. PNGFA i no laik yusim bikos long hevi bilong husat i papa bilong stedium. Na arapela samting tu, Sir Hubert Murray i no gat gutpela banis.

Sir Ignatius Kilage stedium long Lae i gutpela tasol planti ol kantri i no laik long go long Lae. OFC tu i no laik kisim tim i go long Lae bikos em bai kosim ol ekstra mani long putim long Pot Mosbi na bihain salim ol i go long Lae.


Posman i tok PNGFA i skelim olgeta rot na i ting, PRL em i gutpela bikos olgeta samting i stap pinis. Ol bai stretim tasol graun na tu putim sampela moa lait na stretim ples sindaun, na toilet na was rum.

Siaman bilong PNGFA Teknikel Komiti i ting toktok bilong Kelep i no gutpela tumas long sapotim soka. Bikpela samting, mipela i no givim mani long arapela ol bisnis, mipela i helpim tasol arapela spot.



IKEN WOKIM GUTPELA SAMTING LONG YU

Apim glas wain bilong pis!



• Nau tasol i lusim sia olsem lida bilong Amerika, Presiden Bill Clinton i drigim glas wain wantaim Praim Minista Bertie Ahern bilong Ailan long apim wok bilong painim gutpela sindaun long hap. *Piksa i kam long The Australian niuspepa.*

Amerika:

Presdien Clinton long wanpela wokabaut bilong em i go long Dublin, Belfas na London i bin salensim ol strongpela sapota long Noten Ailan hevi bilong lusim ol samting bilong pait na go insait long wok bilong painim gutpela sindaun.

Wari long kos bilong ol zoo tasol

Australia:

Tru ol zu i save pulim planti visita long en, em i wok long kostim bikpela mani long ranim ol.


Dairekta bilong Nu Saut Wels Zulojikel Paks Bot Guy Cooper i wokim dispela toktok taim em i tokaut long AusD 6.7 milien dinau bilong Taronga Zoo long Sidni na Westen Pleins Zoo long Dubbo.

Tasol Mista Cooper i tok dispela dinau mani i bin kamap bikos ol i kamapim ol nupela konsevesen program, rises na edukesen wok na tu kos

bilong peim ol woklain long zoo i go antap insait long las faivpela krismas.

Long amamasim na pulim moa visita, ol bin kamapim Skai Safari kebel ka bikos zoo i save kamapim bikpela hap mani long pe we ol visita i peim long go insait.

Namel long 1999 na 2000, Taronga Westen Plains zoo i pulim 1.6 milien visita, melbon na Werribee Zo long Victoria i pulim 1.16 milien pipel long en, Adelaide Zoo i pulim 323,045 na Perth Zoo i pulim 548,468 visita long en.



Gorila Kibabu i no wari!

• Gorila Kibabu long Taronga Pak, Nu Saut Wels i no bisi long hevi we i wok long kamap longh lukautim ol zoo o ples bilong lukautim ol animel. *Piksa i kam long The Australian niuspepa.*

Wo kriminel Kalejs wetim kot



• Plis i taitim han bilong Kalejs wantaim henkaf na kisim i go long plis sel. *Piksa i kam long The Australian niuspepa.*

Australia:

Konrad Kalejs husat i gat 87 krismas i stap nau long han bilong ol plis bilong Australia bihain long ol samting we em bin wokim taim em bin bos long wanpela konsentresen kem long Gemeni moa long 50 krismas i go pinis.

Kalejs bilong kantri Latvia, wanpela lsten Yuropien kantri i kisim sas olsem taim em i stap olsem komanda bilong Salaspils konsentresen kem long Jun 1942 inap long Julai 1943 taim ol Gemen Nazi i bin bosim Latvia. Na ol i bin save putim ol kalabus Jews na kilim dai ol long dispela kem.

Ol atoriti long Latvia long planti krismas i bin laikim Kalejs bihain long ol i bungim wantaim ol evidens egens long en i kam long sikspele kantri.

Lapun Kalejs i save stap long nening hom na ol plis i bin holim pasim na kisim em long nening hom long Melbon. Em bai kamap long ai bilong Melbon Majistret kot long Janueri 22, 2001.

Ol prosekyuta loya bilong Latvia i tok planti Jew (Israel) na Rasia pipel i bin dai long taim Kalejs i binbos long wo kem.

Siaman bilong Latvian Rilif Sosaiti Alvars Saultitis i wari olsem Mista Kalejs i lapun na i nogat strong long lukautim em yet na wokim ol stretplea toktok long makim em yet long kot.

Mista Kalejs i bin kamap long Australia olsem wanpela refuji long 1950 na em i kamap olsem sitisen long 1957. Long 1959 em bin go long Amerika we em bin wok olsem wanpela propeti developa tasol long 1994 ol bin rausim em long hap na long Kanada long 1997 bikos long ol wok bilong em long taim bilong pait long Gemeni.



NOTIS I GO LONG OLGETA EMPLOYA HUSAT I SAVE PUTIM MANI LONG NESENEL PROVIDEN FAND (NPF): REMITENS O GIVIM BEK TOKSAVE LONG 2 % LEVI

Ol Sapot Toktok

Gavman i kamapim wanpela plen bilong em long ol i no inap katim hap mani (50%) bilong ol wokmanmeri husat i putim mani long NPF bikos Gavman bai yusim sampela kain wei long skelim dispela hevi na dipela bai kamap long Janueri 1, 2001. Aninit long dispela nupela bil ol i kolim NPF Fainensi Rikonstraksen Bil 2000, olgeta stekholdas (Employa, Employi na Stet) bai givim mani i go insait long helpim ol memba.

Toksave bilong ol Employa

Aninit long rikonstraksen bil,

- Ol employa wantaim ol employi o wokmanmeri bilong ol husat i no memba long NPF long 31 de bilong mun Disemba o bipo long 31 de bilong mun Disemba, 1999, bai i no inap putim dispela 2 % mani bilong employa. Ol employa bai wok yet long tromoi dispela 7% ol i makim bilong ol na wokmanmeri bilong ol bai putim 5% bilong ol.
- Ol employa husat i kamap olsem ol memba long 31 Disemba, 1999 bai putim dispela ekstra 2 % long sait bilong ol wokmanmeri bilong ol husat i putim mani long NPF long 31 Disemba o bipo long 31 Disemba, 1999 long pe bilong wanpela mun we ol i save peim ol long olgeta de, wanpela wik, fotnait o long wanpela mun. Sapos employa i save givim mani long fand we i stap antap long 7 % olsem bihainim toktok i stap long Ekt, ol employa husat i kisim taim bai givim olsem 9%.

Givim bek toksave

Long go wantaim ol senis insait long mani employa i save givim, ol wokmanmeri bai pinisim tupela SF8 givim bek plen.

Kopi 1

Dispela bai bihainim wankain pasin bilong putim mani olsem i kamap nau we employa i putim 7% na wokmanmeri i putim 5 % bilong ol wokmanmeri i putim mani long fand na bilong ol nupela wokmanmeri husat i statim wok nau tasol.

Kopi 2

Arapela kopi bai ol i pinisim bilong olgeta ol wokmanmeri husat i memba bilong Fand long 31 Disemba 1999. Ol employa bai luksave na givim bek narapela 2% olsem ol i bin askim insait long Rikonstraksen Bil.

Pe

Ol employa bai givim tasol wanpela sek mani we namba bilong mani bai kam taim ol i bungim olgeta mani olsem ol i soim long Kopi 1 na Kopi 2.

Sapos yu wanpela employa husat i save givim mani long Fand na yu gat planti tingting na laik save moa, yu ken ringim Jenerel Menesa, Mista Ian Tarutia long telefon namba 323 5595 o salim e-mail long NPF long iant@daltron.com.pg

Rod Mitchel
Ekting Menesing Dairekta

Wol pablik helt sot long ol nes na mitwaif

Geneva, Swiselan: Bikos pe i stap daun-bilo tumas, ol kondisen i no gutpela na nogat gutpela futja long wok bilong ol long bihain taim, wol i wok long bungim hevi long sot long ol nes na ol mid-waif, ripot bilong Yunaitet Nesens i tok.

Na sapos pablik helt komyuniti long wol i no wokim samting kwik-taim long stretim dispela, wok bilong pablik helt sistem bai bungim hevi, ol UN saveman i tok.

Wol Helt Ogenaisesen han bilong UN i tok krismas

bilong ol nes long Briten, Amerika na Kanada i stap namel long 43 n 45 na dispela i soim olsem ol yang-pela pipel i no wok long go insait long wok bilong nes.

Ripot in tok long Briten, ol helt sevis manesa i wok long kisim ol ovasis nes na long las 12 mun, mak long ol i kisim ol ovasis nes woklain i go antap long 48 pesen.

Ripot i tok diuspela i wok long kamapim hevi long ol developing kantri we ol woklain bilong ol i aplai long go long ol bikpela kantri long kisim ol wok.

Tokpiksa em long Zambia long Afrika we long wanpela haus sik ol i likim 1,500 nes tasol nau ol i gat 500. Na long Chile long Saut Amerika ol i laikim 18,000 kwalifait nes tasol ol i gat 8,000.

Ripot i tok ol liklik na trangu kantri em ol namba wan lain long bungim hevi long taim samting olsem i kamap.

Ripot i tok ol nes na mitwaif i gat bikpela wok long mekim long karim sevis i go long ol trangu na planti pipel long ol liklik na trangu kantri long developing wol.

Grup stilim ol pikinini long kamap bega

Bangkok, Tailan: Plis long Tailan i painim faivpela kitnep pikinini we wanpela grup we i wok long ranim wanpela bega ring o askim long ol samting long ol narapela, ripot i tok.

Ripot i tok plis i painaut long dispela samting bihain long

wanpela mama i luksave long pikinini meri bilong em husat i gat sevenpela krismas long dispela grup. Grup i bin stilim pikinini bilong em tripela krismas i go pinis.

Rot we maam i painim pikinini em taim mama Huad Suksaeng husat i gat 34 krismas i

wokabaut i go long haus bilong em bihain long wok olsem wanpela klina long ba long Phuket taun na wanpela bun nating bega i werim ol pipia klos i askim em long mani. Misis Suksaeng i givim em mani na meri i lukluk long en na singaut mama long en.

Plis ripot i tok pastaim em ino luksave long gel tasol ol mak long bodi na pes i soim olsem tru em pikinini bilong en.

Plis i bin holim sevenpela grup memba bilong dispela ol lain we i save stilim ol pikinini long en na mekim ol wokim ol kain pasin nogut long en.

Komisin bilong lukautim ol refuji i amamasim 50 krismas

Yunaitet Nesens: Komisin bilong Yunaitet Nesens we i lukuatim ol refuji (UNHCR) i abrusim 50 krismas long wok stat yet long taim em i karimaut namba wan wok bihain long 1951.

Ogenaisesen ya 139 kantri i memba long UNHCR na wok bilong en em long go pas long kodinetim intenesenel eksen bilong bilong lukautim ol refuji long wol. Aninit long dispela, em i lukautim ol rait na gutpela sindaun bilong ol refuji na lukim olsem ol refuji i gat rait long painim ples bilong stap long narapela kantri na go bek long ples long laik yet bilong ol na i nogat wanpela lain i fosim ol.

Hetkota bilong ejensi i stap long Geneva, Swiselan. Em i gat moa long 5,000 wok man-meri long 121 kantri



• Yunaitet Nesens Komisin for Haia Refujis (UNHCR) i karimaut bikpela wok long lukautim ol refuji. Petron o man i go pas long han bilong UNHCR long Australia Tim Fischer wantaim wanpela is Timor refuji famili. Piksa i kam long THE AUSTRALIAN OPINION nius-papa.

long wol. Em i lukautim moa long 22 milien pipel we hevi na, pait i mekim ol i lusim ol asples bilong ol. Samting olsem 7.5 milien em ol i stap long Wsia Pasifik rijen.

Taim em i bin kirapim wok bilong em 50 krismas i go pinis, em i bin stat wantaim 33 woklain na baset bilong US300,000. Tude wantaim moa long 5,000

woklain, em i gat US1bilien baset insait long wanpela, yia tasol em i save abrusim dispela mak taim moa hevi i kamap na moa pipel i kamap refuji.

Strong yet long bruk lus!!

Wes Papua, Indonesia: Ol indipenden lida bilong Wes Papua husat i kalabus i les long ol atoriti long Indonesia i larim ol i go fri hariap.


Faivpela indipenden lida bilong Wes Papua i stap nau kalabus em long Siaman bilong Presidium Theys Eluay, Seketeri Jenerel Thaha Al Hamid na ol memba olsem Don Flassy na John Mambor.

Plis i bin holim pasim na kalabusim ol long bipo long Desemba 1 aniveseri we Wes Papua i tokaut long indipenden we Indonesia i no luksave long en. namba faiv bilong ol, Reveren Herman Awom em ol i bin holim pasim em long Desemba 4.

Ol ripot i tok faivpela man i tok strong olsem ol bai stap long kalabus inap ol atoriti i pinisim ol ligel wok.

Long ol ripot, Presiden Abdurrahman Wahid i laikim ol atoriti long larim fri faivpela indipenden lida

bilong Wes Papua kwiktaim long dispela krismas taim.



• Wes Papua bruk lus lida Theys Eluay em wanpela long ol faivpela i stap long kalabus.

Pismeka Perez bilong Israel i sanap long resis bilong Prais Minista

Jerusalem: Man bilong laikim na kamapim gutpela sindaun na bikpela long ol arapela kendidet, Shimon Perez bai go insait long resis bilong Israel Prais Minista.

Mista Perez husat i gat 77 krismas i bin ron long resis bilong praim minista faivpela taim na i no save win tasol em i bin holim posisen olsem lida bilong Israel long tripela taim taim ol lida i aut na tem (o taim) bilong ol i no ova yet.

Tasol pastaim em i go insait long resis, em i mas gat signesa bilong 10-pela Palamen memba. Olsem na em i wok long toktok wantaim Meretz Pati husat i gat 10-pela memba long kisim sapot bilong ol.

Ileksen bai stat long Februeri 6 neks yia.

Narapela tupela biknem man we i stap insait long resis bilong Prais Minista em nau Prais Minista na memba bilong pati we Mista Perez i stap long en em Ehud Barak. Narapela em strongpela oposisen na pati lida Ariel Sharon.

Pol sevei i soim olsem bai nogat wanpela long tripela kendidet i kisim majoriti vot long Februeri ileksen na olsem, resis bai stap long tupela top fainalis em long Mista Sharon na wanpela long Nista Barak na Perez.

Go insait long resis bilong Mista Perez i bagarapim sans bilong Mista Barak husat i givim sans long ol

Palestain pipel tasol em i no bin inap long kamapim wanpela pis agrimen.

Mista Perez i tingting long pulim ol vot long ol sapota husat i bilip olsem Mista Barak i no go pas gut long ol negosiesen we i wokim na Palestain lida Yasser Arafat i kros long Mista Barak. Na tu Mista Barak i lusim majoriti sapot long palamen, bihainim ol sans we i givim long ol Palestain. Na tripela mun pait na hevi i go bikpela moa namel long ol Palestain na Israel i mekim na namba na sapot long Mista Barak i pondau.

Long wankain taim, ol ripot i tok ami bilong Israel i wok long yusim nupela stail long traim daunim hevi namel long ol na Palestain we i go bikpela long laspela tripela mun.

Ripot i tok Israel ami i tagetim ol militen paitman bilong Palestain na bihainim ol na hait taim ol i klia long ol na sutim dai ol. Toktok bilong wanpela bikman bilong Israel ami i konfemim dispela.

Ol Palestain lida i kolim dispela olsem "polisi bilong kilim dai man" long en. Bihainim dispela, ol Palestain lida i tok Israel ami i kilim dai pinis 19 paitman lida. Tasol bikman bilong Israel ami i tok ol i wokim dispela long stapim wok na plen bilong o, paitman long atekim Israel. Long ol ripot, bikman i tok plen bilong Israel ami i no tagetim ol politisen. Em i tok sampela long ol Palestain paitman we Israel ami i kilim dai em ol i laik karimaut ol teroris bom long Israel.



• Wanpela is Timor famili i redi long go bek long ples. Long las yia, bikpela hevi i bin kamap long is Timor taim ailan provins i kisim indipendens long Indonesia. Planti tausen pipel i bin dai, planti i kisim bagarap na planti tausen moa i bin kamap olsem ol refuji. Long daunbilo, ol refuji bilong Ethiopia long Sudan. Ol piksa i kam long Australian nius-papa.



1980s Refugees from Ethiopia in Sudan

Asua i stap wantaim husat tru

PEKU PILIMBO i raitim

Pat tu bilong stori

Liklik Neli i gat sik AIDS na Susi kisim em i go stap wantaim papamama bilong em long ples. Ol man long ples save les long tupela na pret olem ol bai kisim AIDS tu. Susi save kisim bikpela belhevi tru tasol em stap. Joe i stap na sekim blut bilong em na painim aut olsem em nogat sik AIDS.

Joe i sindaun singsing stap i go tulait. Moning tru em givim siksti i go daun long bas stap na wetim ka i stap. Em moning yet na ol bas i wok long kam long ples na sampela i no go long ples. Em stap tulait bruk olsem na em slip long bas stap inap apinun taim ol PMV ka bilong ples i laik go bek.

Taim apinun na em save olsem ol PMV bai kam, em go insait long stua na baim ol stua kaikai olsem kakaruk, rais, tin pis, bisket na loli bilong Neli na putim long wanpela bikpela plastik bek na sindaun wetim ka i stap.

Em kalap na go sindaun gut tru na amamas long gutpela nius em bai tokim Susi wantaim Neli. Taim Joe i painim aut olsem em nogat HIV o binatang bilong kamapim AIDS long bodi bilong em, em amamas nogut tru. Em ting olsem Susi na bebi Neli mas nogat tu. Ating ol dokta na nes i no bin mekim tes gut na i no klia taim ol i tok Neli i gat AIDS.

Joe i tingting olsem em bai kisim Neli na mama bilong em i kam na tupela wantaim bai traim na sekim blut bilong tupela gen.

Joe i go kamap long haus ples bilong ol lain bilong Susi. Ples bilong em i stap longwe liklik na em kalap i kam daun na i go kamap long dua bilong haus bilong tupela tambu bilong em.

Taim Susi lukim Joe i kam, em kisim Neli na tupela i go sindaun beksait long haus na i no mekim wanpela nois.

Susi i stil sutim toktok long Joe olsem Joe bin givim sik AIDS long liklik Neli wantaim em yet. Susi bin stap gut wantaim papamama bilong em bipo long em marit olsem na olgeta asua bilong tupela kisim sik i go antap long Joe.

Joe i go sanap long dua na tok: "Helo Neli, mi ya. Dedi bilong yu. Yu stap we?"

Liklik Neli harim nek bilong papa na laik singaut tasol Susi pasim maus bilong em na tupela stap isi tru long haus beksait. Tupela lapun tambu i stap yet long gaden na Joe ting ating ol famili wantaim bin go long gaden. Em sindaun long fran bilong haus na rausim sampela spia long plastik wantaim niupepa na rolim smok na smok sindaun i stap.

Apinun nau tupela lapun bilong haus i kamap, lapun mama i kam kros nogut tru long lukim Joe bikos Susi bin stori long wanem samting em ting i tru. Susi bin tokim mama olsem Joe paul raun na givim sik nogut long em wantaim Neli na mama bilong Susi i bin behat nogut tru long Joe. Nau em lukim ej sindaun long fran bilong haus na em singaut:

"Yu painim wanem kam long hia. Yu no laik larim ol man yu kilim pinis i dai wantaim bel isi. Nau yu laik mekim wanem na i kam, mama bilong Susi i krosim.

"Mi les long lukim yu. Yu givim sik AIDS long pikinini meri bilong mi wantaim tumbuna pikinini. Nau yu laikim wanem na yu kam long hia? lapun mama i wok long kros.

Joe laik stretim toktok tasol



lapun mama ya, yu save ol i lain bilong toktok stret ya. Joe nogat toktok na klostu ai wara i kam. Em bin amamas nogut tru na karim gut nius i kam long tokim Susi tupela Neli na nau mama biong em kros.

"Hei, yu kros planti long wanem? Yu tingting em asua bilong Joe a? Mi ting yumi no kisim stori long sait bilong em na ating i gutpela em i kam long lukim tupela sik mama pikinini." lapun tambu man i sarapim meri na i tok.

"I gutpela long Joe kam tu. Ol lain long ples save semim yumi na mi ting nau ol famili i mas go bek wantaim Joe na stap wantaim em long taun.

"Ol planti manmeri i tok pikinini bilong dispela man i olsem kain meri ya mi les pinis." Lapun tambu man i tokim Joe.

"Joe, ating tupela mama pikinini i mas i go wantaim yu na yupela i stap long taun. Long ples, planti kaikain toktok i stap na mi les pinis," lapun i tok.

Lapun mama i kros na i go insait long haus. Em i no toktok. Lapun tambu man i kisim mat na putim long haus win na tupela sindaun stori i stap.

Susi tupela Neli i sindaun beksait long haus na wok long putim yau i stap na harim Joe i tok: "Mi painim aut olsem mi nogat sik AIDS. Mi go sekim tupela taim wantaim dokat na tupela taim wantaim ol dokat na nes i sekim blut bilong mi na tokim mi olsem mi nogat sik," em tokim tambu man bilong em.

"Mi kam long kisim tupela mama pikinini i go bek bai mipela i ken sekim blut gen. Ating ol dokta i bin asua taim ol i sekim blut bipo," Joe i tok.

Susi harim na lewa bilong em pampam na em amamas nogut tru tasol narapela tingting i tok bogut Joe giaman long kisim em na Neli i go bek gen wantaim em.

"Yumi toktok na tupela Neli na Susi we?" em asin tambu bilong em.

"Tupela mas go waswas long wara. Taim mitupela tambu mama bilong yu i go long gaden, tupela i sindaun yet long haus na mitupela i go. Tupela bai ating raun i kam long haus klostu," Susi harim papa bilong em tok.

Susi isi tasol lusim Neli na tokim em long ron i go long papa bilong em.

"Dedi, mitupela go hait long beksait i stap na yu kam ya," em tok olsem na kam i go holim pasim papa bilong em.

Joe kisim pikinini bilong em na holi pasim em gut tru. Susi wok-about isi kam ausait na sanap lukluk i stap. Em i no go sekanim Joe o samting.

"Yu laik kisim wanem na yu bihainim mitupela kam long ples? Yu wanpela paul man bipo long mi maritim yu na dispela paul pasin bilong yu mekim na mi kisim bikpela hevi tru.

"Ol manmeri long ples i save lukim mitupela Neli olsem lepa manmeri na mi sik na save tingting long hangamapim mi yet. Nau yu kamap na bulsit olsem mipela nogat sik," Susi i tok.

"Yu laik trikim husat? Mipela longlong bilong yu. Mi go tokim ol brata bilong mi kam na ol bai paitim yu na rausim yu go. Yu go dai long narapela hap. Mitupela Neli laik i dai long hia na mitupela lusim yu na kam, wai na yu bihainim mitupela i kam," Susi krosim Joe nogut tru.

Joe laik stretim toktok tasol Susi i ting em giaman na les long harim toktok. Em go insait long rum bilong em na krai i stap. Liklik Neli i go sekim plastik na rausim ol loli i stap insait long karim i go insait long haus.

"Dedi, mami krai long rum i stap na mi les na kam aut. Mi givim loli long em na em tokim mi long noken kaikai na mi karim i kam aut gen," Neli kam aut na tokim Joe.

Lapun man tambu bilong Joe i tokim lapun mama long stretim ol kaikai Joe i karim na em kisim ol kaikai go insait na stat long kukim.

Joe i sindaun ausait na stori na kaikai buai wantaim lapun tambu bilong em. Joe tokim klia long lapun olsem Joe nogat sik AIDS. Ol dokta sekim blut bilong em tupela taim na em nogat. Lapun tumbuna i harim na bilipim olgeta toktok Joe i tok na taim bilong kaikai long apinun, lapun man i tokim pikinini meri bilong em olsem olgeta famili i mas i go bek long taun na bai ol dokta na nes i ken sekim blut bilong ol gen.

Joe i amamas nogut tru na neks moning em kisim tupela Susi wantaim Neli na i go bek long taun.

Taim ol i kalap long ka, Susi i no tru tru bilipim Joe tasol lapun papa i bin askim em long kisim Neli na ol mas go bek wantaim Joe olsem na tupela Neli i kam wantaim Joe. Susi i no toktok wantaim Joe. Joe holim Neli long ka na soim em ol samting inap ol i kamap long taun.

Ol i slip wan nait na neks moning, olgeta i nambawan lain long sanap long haus sik get na nam-

bawan famili long lukim dokta.

Joe i kisim olgeta haus sik ripot pepa bilong famili na i go insait long lukim dokta. Ol i stori long dokta long wanem samting i bin kamap na dokta i singautim wanpela nes long kisim blut bilong olgeta famili na sekim sapos ol i gat AIDS.

Dokta i tokim ol famili long kam bek long wan wik bihain na sekim. Ol famili i go long haus na wet inap wan wik bipo long ol i go bek long haus sik wanpela moning na sekim risal bilong tes ol dokta i mekim.

"Gut moning, mi gat gut nius na nius nogut wantaim," dokta i tok taim ol i kamap long haus sik.

"Nius nogut i olsem Neli i gat sik AIDS na gutpela nius olsem yutupela papamama nogat," dokta tok.

Joe tupela Susi i amamas olsem tupela i nogat sik nogut tasol bel bilong tupela i hevi tru olsem bebi bilong tupela i gat sik nogut.

Ol famili lusim haus sik na kam bek long haus bilong ol yet. Susi tupela Joe sindaun na traim painim aut wanem rot Neli i kisim dispela sik AIDS. Tupela skelim olgeta we i go na nogat. Tupela i save olsem Neli i bin kisim sik long blut taim em bin slip long haus sik wantaim malaria. Ating ol manmeri husat i save sekim blut bipo long ol i givim i kam aut long ol haus sik i ken yusim i no bin sekim gut dispela blut na edispela blut bin gat sik AIDS i stap insait. Taim Neli bin sik na slip long haus sik, em bin kisim dispela sik long blut.

Joe i tingting i go na tingting i sot. Em tingting long kisim gan bilong ol stil man na go sutim olgeta nes na dokta insait long haus sik. Bilong wanem na ol i no sekim blut gut na wanpela pikinini kisim dispela sik. Wanem asua bilong pikinini? Pikinini bin mekim wanem rong na nau bai em i dai taim em yangpela yet?

Kainkain askim na nogat bekim bilong em i pulap long tingting bilong Joe tupela Susi. Tupela i ting olsem sapos wanpela bikpela o lapun i dai orait tasol sampela lain i no bin mekim wok bilong ol gut long stretim nas sekim gut blut bipo long ol i givim ol sik manmeri i mekim na nau wanpela pikinini wantaim nogat asua bilong em yet bai dai.

Tupela papamama bilong Neli i tingting i go na wari kilim tupela. Joe i go na lukim wanpela wantok loya bilong em. Em tingting long kotim haus sik husat bin givim dispela sik long Neli. Joe wantaim loya i putim ol pepa i go insait wan-

taim na givim tok save long haus sik bos olsem tupela i laik kotim haus long wanem ol wok manmeri i no mekim wok bilong ol gut.

Dokta husat i go pas long haus sik i traim tok ol i no inap save sapos Neli kisim sik long haus sik o narapela hap tasol bihain long olgeta haus sik ripot i soim olsem Neli i no inap kisim sik long narapela rot. Ating ol lain long sekim blut bipo long blut i go long ol sik man i no bin stretim blut gut na dispela blut wantaim AIDS binatang (HIV) i bin stap wantaim taim Neli i kam long haus sik wantaim malaria. Ol nes i bin givim dispela blut nogut long Neli.

Kot i tok orait long haus sik bai baim kompensesen long Neli na narapela ol hevi famili i gat insait long taim ol manmeri i sutim toktok long ol olsem ol i gat sik AIDS.

Haus sik i givim bikpela mani na bos bilong haus sik i go bek na em givimoda long ol manmeri bin sekim blut olsem ol i no mekim wok bilong ol. Em rausim sampela wantaim ripot nogu na putim sampela gutpela manmeri bilong wok husat inap sekim blut gut.

Joe na Susi kisim kompensesen mani bilong Neli. Tupela save olsem mani i no inap baim wanpela pikinini olsem Neli tasol tupela bai mekim wanem. Sik i stap long bodi pinis na i hat long tupela i stretim o mekim wanpela samting.

Tupela i putim olgeta mani bilong Neli bai amamas long wanem sotpela taim em i gat long dispela graun. Tupela i save givim em wanem kaikai, klos, toi na narapela samting em save askim long em. Tupela i tingting olsem Neli mas amamas bipo long em i dai na lusim tupela.

Joe tupela bin lukautim em gut tru tasol pikinini i lusim skin planti. Em pekpek wara, olgeta gras long het bilong em i pundaun na wok long painim sampela sik. Ol sua long bodi bilong em tu i no drai hariap. Em mekim olsem i go na neli i bin dai wanpela de. Em i no kisim wanpela bikpela sik tasol liklik kus i mekim na em sotwin na bin dai long bet bilong em wanpela moning.

Lewa bilong Joe tupela Susi i bin bruk stret long lukim em olsem. Nogat wanpela asua tasol em dai. Ating em mas plen bilong God olsem Neli bai stap sotpela taim wantaim tupela na bihain em bai dai na go bek long stap wantaim God long heven.

Tupela kisim bodi bilong liklik Neli na karim i go planim bodi bilong em long ples bilong Joe. Hap mani tupela kisim olsem kompensesen i go long wokim bikpela kaikai bilong ol manmeri husat i kam sindaun long haus krai.

Tupela tokim ol manmeri long poles wanem samting AIDS inap mekim long ol manmeri na tupela i save kempen long tude tu long wabnem samting bin kamap long laip bilong tupela na hau Neli bin dai. Tupela save skelim ol manmeri long ples bilong Joe tupela Susi wantaim long sik AIDS.

Joe tupela Susi i karim narapela tupela pikinini moa na nau olgeta i save sindaun i stap wantaim em long taun. Wanem w taim i fri insait long laip bilong tupela, tupela i save go sindaun wantaim ol manmeri i gat sik AIDS na stori wantaim ol.

Tupela i save kempen long ol manmeri i no save long AIDS bikos wanpela de i go pinis, tupela tu bin gat AIDS tasol nau nogat. Na tupela i save gut tru long pasin ol manmeri bai mekim save ol i save olsem yu gat AIDS.

Wantok painim Wantok

dispela pes em bilong yupela ol
man na meri husat i laik salim
tok save i go long ol:-

**BUBU KANDERE BRATA SUSA
MISIS PREN PIKININI NA HUSAT
MOA YU GAT LAIK LONG SALIM
TOK HAMAMAS TOK SORI O TOK PILAI.**

Toktok nating i go long lewa. Wanpela samting tasol toktok i kam long dispela Wantok painim Wantok em i mas sotpela ino inap longpela olsem tel bilong kapul dispela toktok nogat pei long en tasol sapos igo antap long tripela lain olsem →

Brata pls kam long Port
Moresby long dispela wik
wantaim tambu lewa bilong yu


en nau bai i gat pei olsem foapela Kina (K4.00)

long wanpela hap olsem →

Brata pls kam long Port
Moresby long dispela wik
wantaim tambu lewa bilong
yu na pikinini wantaim dog.

Salim dispela toktok i kam long mipela long Wantok Nius na hamamasim husat yu laik long hamamasim. Tingim dispela ino Kanage stori. Makim skin pas olsem -

**Wantok Painim Wantok,
PO Box 1982,
Boroko, NCD**



Asua bilong mama



LONG bipo tru, tupela manemri i stap na tupela i gat wanpela pikinini man. Dispela pikinini man i kamap bikpela pinis na em i save wokabaut. Papa i wokim liklik bunara bilong liklik pikinini i ken pilai long en. Orait wanpela de ol i go long nupela yam gaden bilong ol long stretim na klinim na sanapim stik bai yam i ken bihainim stik na gro.

Tupela papamama i taitim bun long klinim as bilong yam i stap na pikinini i go sutim kru bilong yam wantaim nupela bunara bilong em. Em wok long sutim kru bilong yam na taim ol pundaun bruk nabaut em singaut bikmaus na lap amamas nogut tru. Pikinini singaut mekim nois nabaut na mama i ting em i pilai nabaut i stap na em i go het na klinim gras long yam i stap.

Papa i kirap na lukim pikinini i no pilai, i wok long brukim olgeta kru bilong yam i go i kam na bagarapim olgeta na lip yam i slip nabaut long olgeta hap bilong graun.

Papa kirap singautim meri bilong em na tok "lukim pikinini bilong yu. Em i klinim gras na i winim mitupela tru ya."

Meri i ting man i tok tru na kirap lukim ya nogat, kru

bilong yam i bagarap olgeta na slip nabaut long olgeta hap bilong graun.

Pikinini i ting tupela papamama i no lukim em na em i sutim ol kru bilong yam na singaut lap na bikmaus wantaim i stap.

Mama bilong em i kirap bikmaus na krosim na paitim pikinini nogut tru. Meri tanim na sutim toktok long man bilong em olsem em i bin wokim bunara na givim long pikinini na pikinini i bagarap kru bilong yam na em tok em bai no inap kukim kaikai na givim tupela.

Em i tokim tupela long painim kaikai bilong tupela yet na em i go pas long haus, kukim kaikai na kaikaim em yet. Papa i tokim pikinini olsem mama i kros na tupela i mas

go stap long wanpela hap nogat man i stap long en.

Orait tupela papa wantaim pikinini i taitim wokabaut i go insait tru long wanpela bik bus stret.

Mama i stap long haus i go na ting tupela papa na pikinini bai kamap long haus tasol nogat wanpela man i kamap. Mama wet i go inap apinun tasol nogat wanpela man i kam. Mama i ting tupela i stap long gaden na em i go singaut na sekim tasol nogat. Em i go sekim tek mak bilong tupela na lukim olsem tupela i bin wokabaut i go insait tru long bik bus. Mama i singaut krai bikmaus wantaim bihainim tupela papa pikinini. Em i singaut krai wantaim i kam na tupela i harim tasol tupela i no bekim singaut bilong em. Papa i

harim mama i kam klostu liklik na em i tokim pikinini long tanim kamap olsem wanpela diwai na em yet bai kamap olsem wanpela snek. Taim tupela harim mama i krai wantaim i kamap klostu long tupela i stap long en, hariap tru tupela papa pikinini i tanim kamap diwai na snek. Pikinini i sanap arere long rot na lukim mama bilong em i krai wantaim wokabaut i kam kamap. Man i tanim kamap snek na i go hait insait long hul bilong ston.

Em bikpela nait pinis na mama i slip klostu long as bilong diwai we pikinini man i sanap na moning em i krai wantaim i go beklong ples bilong em.

**Dopenu sawiembe
LC Boana.**

Mi bai mekim wanem bihain long skul

Plantu i gat wari olsem bilong yu. Ol i les long go bek long ples bihain long ol i pinisim skul. Edukesen i kamap dispela kain tingting na i tspa long ologeta manmeri. Yumi save ting olsem olgeta manmeri husat nogat spes long longkoles i feil, dispeal i no tru. Dispela em wanpela pipia tingting stret. Sapos olgeta save manmeri i stap long taun tasol, husat bai kamap developmen long ples. Narapela samting plantu yangpela i save kiam long taun tasol i nogat inap wok na plantu i save painim hat taim stret long stap long taun.

Mipela bai traim tokim yu sampela samting yu inap mekim. Long taun, gret ten setifiset bilong yu i no inap givim wanpela wok long yu. Plantu arapela gret 10 na 12 i pulap long taun na traim painim wok olsem em bai hat tru long yu.

Yu bai laki tru sapos yu painim wanpela wok tasol pe bilong dispela wok bai i no inap long lukautim yu o pe bilong yu inap long lukautim yu wan tasol na i no inap helpim ol manmeri long ples husat i bin hatwok tru long salim yu i kam long skul. Sapos yu no painim wok bai yu stap klong wanem hap stret? Husat bai givim kaikai long yu? Husat bai luakutim yu sapos yu painim sik? Yubaiw anpela namet long plantu arapela hanret manmeri husat i painim hat

taim na wok long raun long ol siti na taun i stap tude.

Sapos yu stap long ples, plantu manmeri i no klia yet na ol bai tok yu feil long skul tasol b9ihain bai oli painim aut olsem dispela i no tru taim yu helpim long kamapim sampela senis long ples wantaim save bilong yu. Ol manmeri long ples bai laikim yu moa na soim rispek long yu. Long ples bai yu no inap sot long wanpela samting bikos ol lain pipel bilong yu yet bai stap na lukautim yu long taim yu painim wanpela hevi insait long laip.

Long ples em yu gat graun. graun em wanpela bikpela samting tru bilong kisim mani. Sapos yu heloim ol wantok bilong yu na yusim save bilong yu long helpim ol manmeri long ples wantaim gaden wok.

Ating nau yet em yu no inap save long wokim toilet, gaden, wokim bisnis, wara saplai na anrapela samting tasol yu save long rit na rait na dispela em bikpela samting tru. Edukesen i givim yu save long rit na rait na dispela em bikpela samting tru.

Yu inap rait i go long gavman na narapela dipatmen husat inap helpim yu long kamapim ol samting long helpim yu taim yu stap na traim kamapim sampela samting long ples.

LAIPLAIN bai amamas tasol long helpim yu. Rait tasol i

kam na bai mipela traim helpim yu long wpainim husat manmeri inap helpim yu long wanem kain wok kamap yu mekim olong ples bilong yu.

Laip long taun inap luk gutpela tru nau na yu bai tighting long traim p[ainim] sampela gutpela samting na laip long taun tasol dispela i no gutpela tumas.

Plantu gutpela manmeri i kamap raskol na i no save helpim komyuniti bihain long ol i kam long taun na painim olsem ol i nogat wanpela wok.

Mipela tingolsem yu bai i no laik long westim dispeal edukesen yu kisim pinis long skul. Yu bin wok hat tru long kisim dispela save na nau sapos yu kamap raskol long taun em i no gutpela tumas.

Laip long ples i no gutpela tumas na plantu manmeri tru i bin les na kam long taun tasol sapos wanpeal o tupela i ekn putim save bilong skul i go insait long wok, ating plantu senis inap kamap long laip bilong wanwan manmeri long ples.

Yu gat gutpela save long rit na rait na wantaim dispela ol samting, yu ken helpim komyuniti bilong yu long kisim helpim ol kain manmeri bai yu inap helpim dispela ples bilong yu senis. Nohut yu go long taun na painim wok bai, yu westim laip bilong yu.

LAIPLAIN



Nem: Daniel Sebi

Krismas: 19 (man)

Adres: P.O. Box 517, Madang.

Save laikim: Harim 93 FM, kaikai buai, tok pilai na rait i go long pen pren.

Nem: Zelyna Annel

Krismas: 22(meri)

Adres: KTS Camp, P.O. Box 143, Aitape, Sandaun Province.

Save laikim: Tok pilai, raun lukim pren na mekim pen pren long narapela provins.

Nem: Petrus Kasmir

Krismas: 19 (man)

Adres: AVTC, P.O. 34, Aitape.

Save laikim: Pilaim ol spots, harim musik, senisim poto na raun wantaim arapela.

Nem: Pius Tapemo

Krismas: 16 (man)

Adres: AVTC, P.O. Box 34, Aitape.

Save laikim: Lukim TV, pilai ol kainkain gem, harim musik, senisim poto wantaim ol arapela man o meri.

Nem: Tuida Kainton

Krismas: 13 (man)

Adres: C/ - Salvator Kainton, Aitape Police Station, P.O. Box 138, Aitape.

Save laikim: Pilai spoka, harim musik na save laikim long mekim pren wantaim ol arapela boi na gel.

Nem: Huklyn Wan

Krismas: 19 (man)

Adres: AVTC, P.O. Box 34, Aitape ESP.

Save laikim: Lukim TV, pilai soka, volibal, harim musik, raun lukim ples na mekim pren wantaim ol arapela.

Nem: Ryan Nakison

Krismas: 19 (man)

Adres: AVTC, P.O. Box 34, Aitape, WSP.

Save laikim: Harim musik, pilaim ol kain spot, swim long solwara na senisim poto.

Nem: Mel Moroka

Krismas: 16 (man)

Adres: AVTI, Box 34, Sandaun Province.

Save laikim: Watchim TV, pilai ragbi, harim ol stori, harim musik na laikim long mekim pren wantaim ol arapela boi na gel.

Nem: Nelson Dadar Labun

Krismas: 25 (man)

Adres: P.O. Box 1157, Mt Hagen, WHP.

Save laikim: Go lotu long Sabbath, go long skul, pilai soka, volibal, basketbal na watchim TV na harim musik.

Nem: John Anis

Krismas: 25 (man)

Adres: Kavui Community Centre, Portion No. 1696, Section 7, P.O. Box 626, Kimbe.

Save laikim: Pilai ragbi, soka na volibal, harim gospol musik, pilai gita singim singsing, serim idia, go raun, huk, edventurim ples na mitim pren.

Nem: Stenley Kenny

Krismas: 18 (man)

Adres: Gango U.O.P, P.O. Box 567, Kimbe.

Save laikim: Pilai ragbi tas na pilai soka na raun wantaim ol tonamen na tok pilai wantaim ol meri na painim wanpela gutpela meri bilong marit long bihain taim.

Nem: George Marnfund

Krismas: 22 (man)

Adres: Lutheran Shipping, P.O. Box 789, Madang, Madang Province.

Save laikim: Go lotu lainim ol gospol singsing, pilai soka, volibal na go waswas long nambis na wara, pen pren wantaim ol brata na susa long narapela provins manmeri.



Dia LAIPLAIN,

Mi bai pinis long hai skul klostu nau. tasol mi no save wanem samting bai mi meki m bihain long dispela skul. Bai mi painim wok olsem wanem na bai mi skul yet i go o? Mi warit tru olsem nogut mi go stap nating long ples bihain long mi pinisim skul.

SCHOOL LEAVER.

Dia PREN,

Mipela save olsem edukesen dipatmen save askim olgeta gret 10 sumatin long pulumapim wanpela pepa na tokim ol wanem samting yu laik mekim bihain long yu lusim skul. Yu bai skul, [ainim] wok, go long koles o narapelam samting tru.

Edukesen opis save salimol dispela fom i go long olgeta provinsel edukesen opis, sapos yu no klia orait yu ken traim toktok wantaim wanpela tisa bilong yu na painim aut long wanem samting yu inap mekim.



DIVINE WORD UNIVERSITY

INFORMATION FOR NEW AND CONTINUING STUDENTS FOR FIRST SEMESTER 2001

All new students (Business Studies Diploma One, Communication Arts Diploma One, Health Administration Diploma One, Arts (PNG Studies) Diploma One, Religious Studies Diploma One and Tourism and Hospitality Management Diploma One and others) who are eligible for on-campus accommodation are expected to arrive at the Divine Word Campus from Wednesday 17th January 2001.

You are advised to make early bookings and travel arrangements to arrive in Madang and Divine Word by the 19th January 2001 so as to attend the Orientation session for new students and Registration which begins on Monday 22nd January. Please contact the Registrar on phone number 8522937 or 8541837 or the Assistant Registrar on 8541836 or fax number 8522812 to advise of your arrival details so that arrangements are in place to receive you at the airport or the wharves.

IMPORTANT POINTS

The University buses will be able to meet all Air Niugini and Airlink flights and passenger boats at the respective wharves to transport you to the Campus if you transmit to the Registrar or Assistant Registrar your travel details as mentioned above

The School fees for 2001 academic year are given below and you are required to personally pay these.

Self Sponsored / Full Fees	-	K6500
Non School Leaver Diploma	-	K3250
School Leaver Diploma	-	K2500
TESAS (HECAS Category)	-	K1200

Furthermore,
No student will be allowed to gain admission to attend classes without paying at least 25% of the Minimum Personal Fees for the year, and
That, all students who arrive late will be charged K20 late penalty fine for each day that they are late cumulatively, and
That ALL FEES must be paid into the Divine Word University PNGBC (Madang Branch) Account No 6190591 and only receipts be presented to the Administration upon arrival and at Registration. No cash will be accepted on campus.
You are requested to note what category of fees you fall under and pay what is stipulated in the admissions letter to you. The fees that you pay will cover, Tuition, Board & Lodging, various charges for material and computer use, SRC and Damage Bond.

Returning Students are expected to arrive on campus over the weekend beginning Friday 19th January 2001.
Orientation for New Students begins on Monday 22nd and ends on Friday 26th January.
Registration for all students takes place on Monday 22nd January 2001 in consultation with the Registrar's Office, the Finance Office and the Heads of Department.
First Semester classes begins on Tuesday 23rd January 2001 for continuing students.
All queries regarding Admissions, fees, travel details, Orientation and Registration can be directed to the Registrar on phone 8522937 or 8541837 or the Assistant Registrar on phone 8522937 or 8541836.

YEAR 2001 SEMETER ONE ACCEPTANCE LIST

The following School Leavers and Non-School Leavers have been accepted by the University into the various programs or courses of study, commencing Semester One in 2001.

A. DIPLOMA IN BUSINESS STUDIES

Name	Gender	School	Sponsor
Donna SAULEP	F	Aust	HECAS
Benedict KOI	M	St Fidelis	HECAS
Henry PEK	F	Sogeri	HECAS
Josephine YOS	F	Malala	HECAS
Fabian KUIAS	M	DWU	HECAS
Anton ONGUGLO	M	Aiyura	HECAS
Jacinta MASU	F	Malala	HECAS
Nancy RAMBUI	F	Malala	HECAS
Fiona MOSSMAN	F	DWU	HECAS
Jerome KAGENA	M	Gordon	HECAS
Greg LUKA	M	DWU	HECAS
Rosa TOLEWA	F	Cameron	HECAS
Nancy WALO	F	DWU	HECAS
Sharon WANGIHOMIE	F	Gordon	HECAS
Philip AREL	M	Malala	HECAS
Elintha KERIACA	F	DWU	HECAS
Roiand KOVE	M	DWU	HECAS
Rose RAMUS	F	DWU	HECAS
Angela Anne ASA	F	Ialibu	HECAS
Belinda SOM	F	Malala	HECAS
Chris VAGALIA	M	POM Nats	HECAS
Gordon WARVI	M	TISOL	HECAS

Leah UTE	F	Papitalai	HECAS
Peter BINAN	M	DWU	HECAS
Karina TERRA	F	Goroka	HECAS
Sinmil BAIK	F	Caritas	HECAS
Silas FELINJOWI	M	DWU	HECAS
Alfred SUAIMBAU	M	DWU	HECAS
Mary Theresa KOPI	F	DWU	HECAS
James SEKUM	M	Malala	HECAS
Philip TEU	M	Malala	HECAS
Emmanuel LEKARA	M	DWU	HECAS
Eric ITAI	M	DWU	HECAS
David SO'ON	M	DWU	HECAS
Cheryl KISAKIU	F	Hoskins	HECAS
Leo AMBAEN	M	Passam	HECAS
Betsie EDO	F	DWU	HECAS
Luisah KAPO	F	DWU	HECAS
Lucy KOPIO	F	DWU	HECAS
Cathy IMARATO	F	Gordon	HECAS
Isaac YAMA	M	DWU	HECAS
Roselyn SAPU	F	Aiyura	HECAS
Brigitha ONGUGLO	F	DWU	HECAS
Jacinta WIAP	F	DWU	HECAS
Garry MAZEWIN	M	Aust	HECAS
Victor TOUNOKON	M	DWU	HECAS
Belinda VUE	F	DWU	HECAS
Kevin LAMUR	M	DWU	HECAS
Don WIA	M	DWU	HECAS
Remon RIEPE	M	DWU	HECAS
Fiona UMPAO	F	DWU	NSL Dip
Tony HANS	M	Aust SL Dip/Self Spon	
Jeffrey LAKI	M	Sogeri NSL Dip/Self Spon	
Solomon PITAR	M	NZL NSL Dip/Self Spon	
Victoria WARTOVO	F	DWU SL Dip/Self Spon	
Imelda YALIKAWA	M	Passam SL Dip/Self Spon	
Anzhalli PUK	F	Mt Hagen SL Dip/Self Spon	
Ian GORE	M	DWU SL Dip/Self Spon	
Betty WAMA	F	Ialibu SL Dip/Self Spon	
Charles IKITAE	M	DWU SL Dip/Self Spon	
Gerard LENTOS	M	Namatana SL Dip/Self Spon	
Gambungine ZADOK	M	Aiyura SL Dip/Self Spon	
Max MAIMA	M	DWU SL Dip/Self Spon	
Liggo Maima WAWA	M	Rosary SL Dip/Self Spon	
James MUKA	M	DWU SL Dip/Self Spon	
Franciscus RAEK	M	East Timor Overseas Spon	
Gerard SIELAND	M	Germany NSL Dip/Self Spon	
Jethro SAN JUAN	M	DWU SL Dip/Self Spon	

B. DIPLOMA IN COMMUNICATION ARTS

Ivan ARUMBA	F	Mad UPNGC	HECAS
Musarika ANANGAI	M	ZNL	HECAS
Geralinda WARRE	F	Malala	HECAS
Patricia E JOSI	F	Bugandi	HECAS
Patrick A MINANA	M	Malabunga	HECAS
Alex NARA	M	EH-UPNGC	HECAS
Marlene SAMAR	F	POM Nats	HECAS
Christine MANLEL	F	Aust	HECAS
Erico HOVOB	M	IDCE-UPNG	HECAS
Fiona KONAKA	F	Malala	HECAS
Jeremy MARK	M	Cameron	HECAS
Cathy DANIEL	F	Wabag	HECAS
Joshua Lucas KAIS	M	Sogeri	HECAS
Michael SIWI KONGA	M	NZL	HECAS
Linda SATARO	F	POM Gram	HECAS
Aaron ENGLISH	M	POM Gram	HECAS
Mary C MACKSON	F	Hoskins	HECAS
Martha K WAME	F	Cameron	HECAS
Thomas LUGABAI	M	Malala	HECAS
Sophia ATANG	F	St Ignatius	HECAS
Rosario SAM	F	Goroka	HECAS
Brenda PETER	F	Passam	HECAS
Dianne SEKO	F	Hoskins	HECAS
Geua FRANK	F	POM Gram	HECAS
Andiopa SABADI	F	POM Gram	HECAS
Sandra TUGA	F	Kerevat	HECAS
Heidi MUINGNEPE	F	Bulolo-UPNGC	HECAS
Stella AUGUST	F	St Ignatius	HECAS
Jason KAUT	M	Bugandi	HECAS
Gue Z MANGAE	F	Gordon	HECAS
Michelle YIPRUKAMAN	F	POM Gram	HECAS

Jason WANGUT	M	Kerevat	HECAS
Tracey Ruth NATALEO	F	St Ignatius	HECAS
Paulo TALANOA	M	Cameron	HECAS
Jacob Kia POTOURA	M	Kambubu	HECAS
Jubilee HAUKO	F	Kerevat	HECAS
Maggie VEVE	F	Kilakila	HECAS
Andrew IKI	M	IDCE-UPNG	HECAS
Andrew ALPHONSE	M	NSL	HECAS
Dorothy MARK	F	Kabiufa	HECAS
Eric KUMA	M	Kerevat NSL Dip/Self Spon	
Gary Eski FAGON	M	DWU NSL Dip/Self Spon	
Paul Nimhai KAMAN	M	DWU NSL Dip/Self Spon	
Wesley MANUAI	M	Papitalai SL Dip/Self Spon	
Clarissa NAING	F	Aiyura SL Dip/Self Spon	
Robert KANABOTE	M	Tusbab NSL Dip/Self Spon	
Jack SIROI	M	St Fidelis NSL Dip/Self Spon	
David REUBEN	M	NSL NSL Dip /Self Spon	

C. DIPLOMA IN HEALTH ADMINISTRATION

Fidelis KUSO	M	DWU	HECAS
William Loh NAMBA	M	St Fidelis	HECAS
Stella MURIKI	F	Bugandi	HECAS
Kathy SEVESE	F	Kilakila	HECAS
Moses NICKSON	M	St Fidelis	HECAS
Selina PAHUN	F	Papitalai	HECAS
Melani PALILI	F	Bugandi	HECAS
Kaupa MORUA	M	Rosary	HECAS
Clara PONAUF	F	Bugandi	HECAS
Gabriel NALUNG	M	Hoskins	HECAS
Lemeck KARAWAS	M	DWU	HECAS
Teddy NINGI	M	Malabunga	HECAS
Ronald KONIPARO	M	Goroka	HECAS
Wilson USU	M	Mogol	HECAS
Emily KARI	F	Passam	HECAS
Elizabeth BOPI	F	Bugandi	HECAS
Alice APORO	F	DWU	HECAS
Daniel ATIYafa	M	Aiyura	HECAS
Elias DARIUS	M	Bugandi	HECAS
Joanna KAUPA	F	DWU	HECAS
Mahiro AELA	M	CAHS Full Fees/Self Spon	
Alphonse AMA	M	Banz Full Fees/Self Spon	
Wilfred Tiyol BART	M	NSL Full Fees/Self Spon	
Thomas IPAKANE	M	Mendi Full Fees/Self Spon	
Ottoma W MANDA	M	LSON Full Fees/ Self Spon	
Bernard MILTON	M	CAHS Full Fees/Self Spon	
Dainet NALELA	M	NazSON Full Fees/Self Spon	
Rosemary NICHOLAS	F	NSL Full Fees/Self Spon	
Ivan NOESE	M	CAHS Full Fees/Self Spon	
Timothy T PAIMUNYAI	M	ArawaSON Full Fees/Self Spon	
Raymond A POHONAI	M	WewakSON Full Fees/Self Spon	
Allan ROSS	M	DWU NSL Dip/Self Spon	
Gorithie TAI	F	Malala SL Dip/Self Spon	
Charles TANGURI	M	LSON Full Fees/Self Spon	
Jacob Tau TAUYO	M	M Veit'a' CHW Full Fees/Self Spon	
Fidelma VOVOLA	F	VunapopeSON Full Fees/Self Spon	
Albert Sivi WAIA	M	LSON Full Fees/Self Spon	
Kuyan KAWAS	M	Mad He Dept Full Fees/Self Spon	
Angelita DE GOMES	F	East Timor Overseas Spon	
Priscillar KEND	F	Mt Hagen SL Dip/Self Spon	
Marilyn KUPENG	F	DWU SL Dip/Self Spon	

D. DIPLOMA IN ARTS (PNG STUDIES)

Agatha INIA	F	Aiyura	HECAS
Emma MIDAN	F	Hoskins	HECAS
Frances AKUANI	F	Malala	HECAS
Joseph RAINBUBU	M	St Ignatius	HECAS
Jennifer KUNOKO	F	Bugandi	HECAS
Timothy AWA	M	St Fidelis	HECAS
Maria SIMP	F	Fr Peter	HECAS
Georgina WAWI	F	Hoskins	HECAS
Nigel KUAWER	M	Goroka	HECAS
Nancy WARKIA	F	Goroka	HECAS
Adrian MIAN	M	Goroka	HECAS
Barbara VALAUN	F	Aiyura	HECAS
Kammy I WAGERA	M	Sogeri	HECAS
Rebecca EMORI	F	Caritas	HECAS
Georgina MOCKE	F	Aiyura	HECAS
Valerie TOMBELE	F	Aiyura	HECAS
Patrick HIKIN	M	Papitalai	HECAS

Kritee KELEBE	M	Kiunga	HECAS
John NDROKUL	M	DWU	HECAS
Waka TOSA	M	Fr Peter	HECAS
Ian MANGI	M	Aust SL Dip/Self Spon	
Tarcisius SEBEPMIN	M	Unitech NSL Dip/Self Spon	
Chris WANINARA	M	Overseas NSL Dip/Self Spon	
Thomas WARR	M	MadUPNGC NSL Dip/Self Spon	
Daniel D TOLPARE	M	St Fidelis NSL Dip/Self Spon	
James TOPO	M	Overseas NSL Dip/Self Spon	
Lawrence MAMADENI	M	DWU Full Fees/Self Spon	
Dickson Mandengat	M	Passam NSL Dip/Self Spon	
Iola TAMTU	F	Overseas NSL Dip/Self Spon	
Lillian ROTH	F	Bugandi SL Dip/Self Spon	
Carolyn ROBERT	F	Caritas SL Dip/Self Spon	
Florian KOLLY	M	St Fidelis SL Dip/Self Spon	
Norbert WAMSI	M	Good Shep NSL Dip/Self Spon	
Desmond SASSO	M	Aiyura SL Dip/Self Spon	
Quinten AWAPOK	M	DWU SL Dip/Self Spon	
Nicole KISOIAI	F	DWU SL Dip/Self Spon	

E. DIPLOMA IN RELIGIOUS STUDIES

Pes KOROMBA	M	Mendi-UPNGC	HECAS
Charles BISIKO	M	Chanel	HECAS
Emmanuel SPERIR	M	Passam	HECAS
Emmanuel LAPLAPIR	M	Chanel	HECAS
Bernard NEU	M	Papitalai	HECAS
Michael JOHN	M	St Fidelis	HECAS
Emelyne KAURIE	F	Malabunga	HECAS
Phillip RUIING	M	Fr Peter	HECAS
Jozsef Roger MITRAP	M	Kerevat	HECAS
Michael Loh EPRI	M	Sogeri	HECAS
Betty ANGALAPAI	F	HTTC	HECAS
Priscilla EPE	F	HTTC	HECAS
Emma (Sr) KULU	F	CHW	HECAS
Toria RAKO	M	Sonoma	HECAS
John RUMU	M	St Fidelis	HECAS
Monica Jirai SIKAS	F	HTTC	HECAS

F. DIPLOMA IN TOURISM & HOSPITALITY MANAGEMENT

Angela ITINGE	F	Malabunga	HECAS
Wesley ISAAC	M	DWU	HECAS
Nathaline MURKI	F	POM Nats	HECAS
Carol Chapek VELA	F	POM Nats	HECAS
Christine KAPINIAS	F	Malabunga	HECAS
Allan SUMB	M	St Fidelis	HECAS
Jayne F KULLUAH	F	Kerevat	HECAS
Darusila JUBILEE	F	DWU	HECAS
Vanessa VAGI	F	Cameron	HECAS
Agnes TAKESI	F	DWU	HECAS
Bernadine PATAK	F	Hoskins	HECAS
Augustine SAUPAI	M	DWU	HECAS
Renet VANUA	F	Bugandi	HECAS
Edward WOISUB	M	DWU	HECAS
Terence OFORA	M	DWU	HECAS
Elna RIPASON	F	POM Nats	HECAS
Raymond TOREU	M	Aust	HECAS
Bianca MELI	F	Namatana	HECAS
John MARKSI	M	Papitalai	HECAS
Juliet BASSE	M	Gordon	HECAS
Evelyn Piwen NAKIN	F	Overseas SL Dip/Self Spon	
Rebecca NIGINTS	F	Overseas SL Dip/Self Spon	
Charles LAKAU	M	NSL NSL Dip/Self Spon	
Diana WAKENA	F	NSL NSL Dip/Self Spon	
Grace POSOLOK	F	Papitalai SL Dip/Self Spon	
Francisca KONE	F	Passam SL Dip/Self Spon	
James ANDILA	M	DWU SL Dip/Self Spon	
Evelyn ARTEKAIN	F	DWU SL Dip/Self Spon	
Anderson MENDANO	M	Overseas SL Dip/Self Spon	
Clemencia MATUPIT	F	DWU SL Dip/Self Spon	
Dulcie NOGORU	F	DWU SL Dip/Self Spon	
John Pea KALAN	M	NSL NSL Dip/Self Spon	
Dorothy LOWONG	F	NSL NSL Dip/Self Spon	
Elizabeth PIAOEN	F	NSL NSL Dip/Self Spon	
Phillibert PIDI	M	NSL NSL Dip/Self Spon	
Miriam PAINING	F	Overseas Pending	
Gina DE ALVES	F	East Timor Overseas spon	

Fr Pat Gesch
Vice President (Academic)



• Aba Teata grup bilong Bukawa i sanap long kisim piksa bihain long ol i putim kamap wanpela pilai bilong Krismas.



• Ol woklain bilong Word Publishing i redi long skelim kaikai long wanpela krismas pati bilong ol.



• Santa Claŋs i wok long lukiuk raun long ol pikinini long haus sik na givim presen long ol.



• Ol lain Kerema i bung na lotu long krismas wiken long Hohola, Mosbi. *Poto: JOE IVAHARIA.*



• Ol liklik skul pikinini long Mosbi i raun long krismas taim long bikpela Pot Mosbi jeneral haus sik na givim ol presen long ol sik mangi wankain lain olsem ol yet. Dispela em wanpela piksa we ol pikinini i tingim ol arapela husat i gat sik o hevi long taim bilong krismas na ol i go lukim ol long haus sik.

KANAGE

Kombuk Wine
Mt Hagen



Kanage em i manki long ples. Taim em i stap long ples ol i save stori long bia olsem 6 peks, 12 peks na wan katen. Wanpela taim bikbro salim tok long em long go long Lae. Em bai save tingting long go olsem na dispela em sans bilong em. Wanpela Sarere bikbro i spak nogut tru na kam long haus. Em i lukim Kanage wantaim poro bilong em na 3 lus bilong em yet. Na em i kisim 6 peks bilong bikbro bilong em. Kanage em aut long 3 lus botol na tekov long haus na tok-save long brata bilong em. Em tok mipela baim 12 peks, 3 peks em mi dring na 3 peks em poro bilong mi dring na em bia, 6 peks bilong em. Taim bikbro harim olsem em i kilim skin stret long lap i go na spak bilong em pinis olgeta. Em tok mipela i save tok 3 lus long wan wan botol na 12 pek taim yu lukim ol bungim. Kanage painim toktok tasol na tok em inap mi traime yu tasol. Yu dring bia o yu dring sup bilong tapiok. Samting tru em i save olsem em rong pinis.

tru na kam long haus. Em i lukim Kanage wantaim poro bilong em na 3 lus bilong em yet. Na em i kisim 6 peks bilong bikbro bilong em. Kanage em aut long 3 lus botol na tekov long haus na tok-save long brata bilong em. Em tok mipela baim 12 peks, 3 peks em mi dring na 3 peks em poro bilong mi dring na em bia, 6 peks bilong em. Taim bikbro harim olsem em i kilim skin stret long lap i go na spak bilong em pinis olgeta. Em tok mipela i save tok 3 lus long wan wan botol na 12 pek taim yu lukim ol bungim. Kanage painim toktok tasol na tok em inap mi traime yu tasol. Yu dring bia o yu dring sup bilong tapiok. Samting tru em i save olsem em rong pinis.

Alphas Starlone
Lae

Kanage i painim wok i go na em i go kamap long haus bilong king na askim long wok na King i tok orait na Kanage i wok i stap. Na taim em laik lukluk long sait em lukim King na pikinini meri bilong em i kam. Nau King askim Kanage long nem bilong em. Na Kanage i tok olsem Yokoks na King i raitim long buk bilong em. Taim King i go pinis pikinini meri bilong em i no go. Nau Kanage lukim: pikinini meri bilong King i stap na Kanage i tok olsem noken werim sotpela sket moskito bai kaikai na yu bai kisim sik malaria. Wanpela mun bihain na

pikinini meri i kisim sik malaria na Kanage tok, mi tokim yu long noken werim sotpela sket. King harim olsem pikinini meri bilong em i kisim sik na em belat nogut na em kam ausait long haus. Kanage save pinis na em opim geit na ron. Nau King singaut holim Yokoks, na ol sekyuriti paul na larim geit i op na Kanage tekov olgeta long ples.

Erol Wela
Mt Hagen

Kanage em bilong ples Anglimp insait long Mt Hagen. Wanpela moning em i putim spotwe na em i no putim pens na i go ausait na em i sanap i stap long gras. San i kam antap na i sut stret long Kanage na hot i kukim em stret na tuhat i no isi long em. Wanpela yangpela meri tu i sindaun na lukluk i kam long hap bilong Kanage. Man Kanage i bel kaskas long meri ya na em i traime long hukim meri ya long sampela kain stail bilong em. Olsem na em i trening long boksen i stap na tromoi han olsem em i pansim man. Em i singaut na mekim nois wantaim, hup haa hup ahh. Semtaim, meri ya i lukim na tokim Kanage, boksa o strit paita, stail man tru ya. Sore Kanage i bel amamas pinis na trening hat tru na tokim meri ya, neks wik long taim bilong boksen tonamen bai mi kam kisim yu long kam lukim mi pait. Samting tru em Kanage i konim meri ya na mekim pren wantaim em.

Michael K. Numdi
Mt Hagen

Kanage bilong Erap long Morobe provins na em save stap long ples. Wanpela taim em wantaim Junia stap long haus i go na Junia hangre nogut tru na em krai long Kanage. Kanage tok nogat kaikai tasol Junia em pilim nogut tru na em krai na tanim tanim long graun-

i stap. Kanage lukim olsem na em wokim wanpela kain hariap kuk stret. Em kuk pinis na em skelim long tupela plet na em tokim Junia kam sindaun na pasim ai na tupela krai. Kanage pasim ai tasol Junia les long Kanage krai olsem na em sindaun opim ai i stap. Kanage statim krai na Junia stat kaikai isi isi i go na em lukim olsem krai i go longpela na em stat kaikai hariap hariap. I go na Kanage abrusim karai bilong kaikai na i go ausait na tok bikpela yu ken helpim olgeta lain long Ostrelia, Amerika, Afrika na em kolim sampela kantri i go. Dispela taim Junia pinisim kaikai bilong em. Taim Kanage pinisim krai na opim ai plet bilong Junia lus pinis. Em askim Junia long plet kaikai na Junia smail na tokim em. Longtaim yet mi kaikai taim yu kisim sip, balus na raun long Ostrelia, Amerika, na Afrika i stap na taim yu kamap mi pulap pinis olsem yu stap na kaikai na em go ausait na go pinis.

Maron Wallii
Lae

Wanpela taim Kanage i stap long Wewak na i laik go long Maprik long taim ol wok long draiv i go antap long haiwe, ol i bin spak tu na ron long ka. Kanage yet i bin draivim dispela ka. Em hapim bia long Wosara stail stret na het i longlong. Em ting em ron long rot tasol nogat em givim stret long bus. Na ol i kapsait long Yangoru. Taim ka i kapsait em kirap nogut na i laik sekim ol poro bilong em. Ol i pundaun nabaut nabaut. Em go kamap long narapela sait na i laik hapim em. Em i paul long baten bilong set. Baten i stap long beksait na em ting olsem nek bilong poro i tainim pinis. Orait em i laik stretim nek bilong poro bilong em tasol nogat. Em kirap na tainim tainim nek bilong poro na poro i dai olgeta.


Eugone Dunan
Maprik

Wanpela taim Kanage i bin stap na harim olsem tambu bilong em i go skul long Madang na bai em greduesen long dispela skul em i go long em. Kanage yet em wanpela man bilong Sepik. Tambu bilong em i ringim em na tokim em olsem long taim em bin i greduet na Kanage i ken i go. Tasol yu save Kanage, em man bilong lus tingting hariap ya, em go kamap long haus na em laik tokim meri bilong tambu bilong em long taim bai ol i go long greduesen. Kanage kirap na tokim meri bilong tambu olsem. Bara ya i ring na tok bai yumi go long Edukesen bilong em tu, meri bilong tambu bilong Kanage i paul na askim edukesen em i go skul ya! Nogut em tok long greduesen. Man! Kanage i lap na tok save mi lapun na yau i no harim gut.

Edward Dunai
Maprik

Kanage em bilong Barawagi. Ples bilong em stap klostu long banis kalabus. Wanpela taim em i dring bia na spak i stap na poro bilong em tru i kamap long ples we Kanage i dring bia. Kanage i lukim poro bilong em na kam holim pasim poro bilong em na tok, I got a one bottle but is not a fit for you. Na poro bilong em i kisim dispela wanpela botol na em i dring. Bihain Kanage i sem long dispela wan botol na em i givim long poro bilong em na em i tok olsem long poro bilong em, I got a only one K2 but is not a dat bot long mi tupela pilai dat bot. Tupela i painim dat bot wantaim i go i go na nogat tru olsem na tupela i go long haus bilong tupela.

Kuglo Joseph Api
Simbu



Mt Hagen jeneral haus sik i no givim gutpela sevis

Dia Edita,

PLIS inap yu givim mi hap liklik spes long pepa bilong yu long mi na mi i ken autim wari o bel hevi bilong mi long pablik i ken lukim na autim tingting bilong ol.

Wari o bel hevi bilong mi go olsem. Mi wanpela yangpela man bilong Lower Mebilyer, Mt Hagen, WHP.

Mi save painim sik long baksait bun bilong mi long taim mi save mekim bikipela wok olsem wokim baret, klinim gras bilong kopi gaden o brukim baksait long mekim ol bikipela wok.

Man mi save kisim taim stret long sanap stret. Mi save slip na putim wanpela laplap, hap diwai o ston long baksait bun bilong mi na lukluk i go antap long skai na stap olsem 3 o 4-pela minits na mi save kirap na wokabaut i go long haus.

Nau mi kam orait liklik. Lastaim mi go long Hagen bikipela haus sik. Na mi peim K2

na kisim pepa na i go sindaun long pom. Mi bai i no inap sindaun planti na wokabaut planti bikos baksait bun save bagarap. Olsem dispela taim mi kisim pepa mi sindaun planti na wetim ol dokta o nes i go belo bek na baksait bun bilong mi i bagarap olgeta.

Mi tingting long i go bek long ples tasol mi lusim K2 na kisim pepa pinis. Samting olsem hap pas wan wanpela dokta i kam na wok long autpetent. Mi i go givim pepa long dokta long hap pas tri stret. Mi givim stori long sik bilong mi na dokta givim mi pepa wantaim nem bilong marasin na soim mi long wanpela haus i gat ol marasin.

Mi go long dispela hap dokta long haus marasin i tokim i long go ken long kemis na baim na em givim mi ol marasin nabaut i no long sik bilong mi.

Mi bel hat tru long ol. Na mi ting olsem long dispela rabis

marasin tasol mi peim K2 na tu wet nating i go apinun. Em wanem kain sevis ol i givim long mipela?

Sapos ol nogat marasin orait putim toksave pepa long wol nabaut na mipela i ken lukim, na noken paulim mipela na stilim mani bilong mipela nating.

Nau sik bilong mi pinis bikos mi baim 3-pela botol long kemis wanwan em K6 mi lusim K18 olgeta.

Na tu mi dringim Aloevera wanwan taim. Mi askim ol brata na susa olsem sapos yupela gat sik olsem mi. Plis noken go long ol bikipela bikipela haus sik long kantri. Bikos ol bai konim yupela na stilim mani bilong yupela.

Traim kemis o Aloevera, king na i fit tru long pinisim sik bilong yu. Tenkyu tru long ritim pas. Bekim o sapot em laik tasol.

**Tano Wati
Mt Hagen**

Ol man long ples noken komplem long taun laip

Dia Edita,

Mi laik putim komplem bilong mi long olgeta man long Nam eria insait long Drekeker distrik long Is Sepik provins.

Man em bilong Waringama viles. Yupela save kam raun long taun long visitim ol wantok.

Na taim yupela save go bek long ples yupela save kamapim kainkain toktok olsem i no kaikai gut o i no kaikai ol gutpela kaikai olsem abus. Nambawan taim husat singautim yupela na yupela kam raun long taun.

Yupela i no kam long oda bilong wanpela man na i no gutpela long yu go bek long ples na kamapim kainkain tok bek sait nabaut.

Em stret tasol husat tru i askim yu long kam. Yu kam long laik bilong yu okay yu mas redim mani inap long yu ken stap long taun na baim olgeta planti kaikai long pulumapim bel bilong yu.

Bikos yu mas save olsem laip bilong traime em hat tumas. Na noken komplem long ol nau taim yu stap pinis long dispela hap. Yu yet sigi-

rapim long kam okay hevi em bilong yu yet nau.

Narapela em yupela save tok olsem taim yumi sot. Plis em mi ris na stap ya. Na sapos ol i go long ples yu bai helpim ol long wanem samting bilong yu. Yu bai i no inap givim ol wanpela samting. Noken kam raun nating na givim bel hevi long sampela man husat u i painim hat long stap long taun.

Sapos yu gat gutpela tingting bai yu tingting long helpim ol. Ol lain bilong ol stret bai helpim ol na yu narapela man em nogat ya na ples bilong yu na mi tu mi gat olgeta samting olsem yu gat long em.

Mi laik askim yu husat save mekim ol dispela toktok ya. Yu mas i no tingting gut pastaim na toktok ya yu mas stupit long wokim long wokim kam long toktok ya.

Yu husat laik sapotim o agensim mi welkam tasol long lukim pas bilong mi long Wantok niuspepa.

**Peter N.
Lae, Morobe provins.**

Sepik i stap na yu stap

Dia Edita,

Mi wanpela man Sepik husat i stap long Wes Niu Briten provins. Mi laik bekim toktok bilong brata ya bilong Madang. Brata yu bin tok olsem Sepik i openim papa long Madang na painim mani na inapim olgeta provins.

Brata mi laik tokim yu olsem yu save tu long tumbuna stori bilong baibel na hau ol tumbuna kam kamap long PNG.

Brata sapos yu bin go ong bikipela skul na kisim sampela save long histori ating em orait liklik.

Sapos yu no save em yet pikinini Sepik bai stori long yu nau. Stori em olsem taim ol ensista o tumbuna i kam ol i bin kirap long Israel na kam olsem long saut Is Esia na go stret long Wewak nambis bihain ol i go gabaut long Madang na narapela provins.

Yu mas save olsem 99.9 pesen bilong save we bin stap na kam wantaim ol tumbuna em i stap long Sepik na stap ova 0.01 pesen. Em Sepik wara i trautil na ol lain provins olsem Madang na ol narapela provins em

yupela kipim olsem sans tasol.

Brata yu save tu olsem ol Israelities i stap nabaut long wol na Keke win i stap em wanpela tasol long mipela Sepik bikos mipela bihainim tumbuna husat i bin kam olsem long Israel.

Papa Somare tu bihainim tumbuna stori olsem na kisim pes Independens na pes Praim Minista. Brata yu no inap stapim Sepik bai brukim rekot yet ya.

Long sait bilong moning yu mas amamas olsem Sepik i stap olsem flaing fox na planti tumas, sapos nogat Sepik ating flaing fox bai Keke win wantaim ples ya.

Mi save olsem yu tu wokim pipia na Keke win long Kimbe ating yu mas go bek na rausim ol Sepik bilong Madang sapos yu man tru.

Brata mi tu stap long Kimbe so ating yu les, maski kisim bot i kam na mekim olsem yu tok long pas. Noken bikmaus nating long niuspepa na westim spes bilong sampela gutpela samting ina go long dispela spes.

**Negrina Baino
Kimbe**

Traim wanbel na wokbung wantaim

Dia Edita,

Mi wanpela mangi Seim insait long Nuku, Sandaun provins tasol mi stap long Kimbe Oil Pam Blok. Mi laik skelim tasol sampela tingting na wari bilong mi i go stret long ol gutpela memba na ol lidaman long kantri na Sandaun provins yet olsem as ples bilong mi.

Bipo mi go yet mi laik bihainim tasol het tok bilong mi long pasin sampela memba i save mekim long ol yet. Long luksave bilong mi em olsem yupela ol memba na lidaman bilong Sandaun i no save wanbel na wokbung wantaim long kamapim provins. Dispela as na i nogat tru ol sampela wok kamap yupela i gat tingting long wokim.

Pasin politik na wok resis tasol long kisim biknem samting i bagarapim tru ol sampela plen yupela gat long developim provins. Tru mi ting sapos i nogat ol kain politikol tingting bilong yupela yet, ating provins bai i mas gat sampela wok i kamap

pinis.

Mi bin interes tru long ritim na lukim sampela tingting bilong foma Gavana Mista John Tekwie long kamapim ol kain wok olsem Oil Pam long Aitape, Rais long Nuku na Suga projek long Grin Riva ating dispela ol bikipela meja projek tru na em bai kamap tru sapos ol arapela 4-pela memba i gat gutpela sapot wantaim Mista Tekwie.

I nogat sapot na bungim tingting mi no ting wanpela samting inap kamap hariap olsem na long gutpela bilong ol pipel na Sandaun provins yupela ol memba i mas traime senisim pasin na tingting bilong yupela yet na wokbung wantaim nau long kamapim sampela trupela wok long provins bilong mipela.

Tingim dispela em wanpela bikipela krai na tingting bilong mipela olgeta mangi Sandaun i lusim ples na nau mipela stap nabaut long arapela provins sapos yupela ol lidaman bilong yumi ol isi Sandaun pipel inap

senisim sampela kain tingting nogut bilong yupela yet.

Mi ting tru olsem Sandaun inap kamap wanpela gutpela provins tru bilong ol kain wok olsem foma Gavana i bin kamapim o tok pinis. So long pinisim tingting mi gat long em, tingim tasol stori bilong man i laik wokim haus.

Em yet i no inap tru wokim na pinisim gut wanpela haus em i gat laik tru long em sapos i nogat man i helpim em laki tu mi save yupela yet tasol sapos yupela i lusim ol kain sin bilong yupela yet o wan man disisen na traime bungim tingting wantaim na bihainim wanpela rot, mi ting tru olsem ol sampela gutpela plens o driman bilong yupela bai kamap tru yet.

So em tasol tingting mi gat na yu husat pikinini Sandaun i laik sapotim o agensim em rait tasol.

**John Anis
Kimbe**

Katolik em mama sios long wol

Dia Edita,

Mi laik bekim pas bilong brata Wire Mokoiri Kiri em i kamap long mun Novemba 16, 2000.

Yes brata Wiri Kiri mi laik bekim toktok bilong yu.

Yu wantaim mi, mitupela wantaim las ples na bus tru arere bilong dispela kantri. Yu tok olsem yu yet yu wanpela mangi. Mi i no save yu i gat hamas kris-mas bilong yu.

Brata Wiri Mokoiri mi na yu mitupela man bilong dispela graun. Yu pul kristen long ai bilong God o mi i no save. Papa bilong yumi God wanpela em i save long bilip bilong wanwan manmeri.

Brata mi les long egensim yu. Yu wantaim sios yu save lotu long en yupela soim bilip bilong yupela long ol narapela sios na olgeta manmeri bilong dispela graun.

Em klinpela wok bilong God yupela inap soim rot i go long God. Brata Kiri Mokoiri mi askim yu nau, wanem sios i kamap pastaim long dispela graun na autim tok bilong God long olgeta manmeri.

Yu wantaim sios bilong yu o husat i noken bagarapim o daunim nem bilong Katolik sios long pablik niuspepa olsem. God em bai panisim yu long daunim nem bilong narapela manmeri. Yu tok olsem yu dispela Katolik sios tasol yu i no soim rot gut long olgeta manmeri bilong God gut. Olsem na planti manmeri i paul.

Orait yu i ken witnis na yu bungim olgeta manmeri long graun. Sapos yu pul kristen. Nogat orait yu pasim dispela liklik maus bilong yu na i stap isi.

God wanpela tasol em bai skelim olgeta manmeri long dispela graun i nogat wanpela man o sios yu bai kamap jas long skelim manmeri.

God em yet wokim yumi na God em yet bai skelim olgeta pikinini bilong em yet.

Ol liklik kainkain sios i kam insait long PNG na tok baksait na bagarapim nem bilong ol mama sios olsem Katolik na Lutheran sios na Yunitid sios na Eglikan sios.

Ol dispela sios ol i kam bilong autim tok bilong God. Ol dispela sios ol i no inap kisim yumi i go

long heven. Nogat. God bai skelim bilip na pasin yumi save mekim long dispela graun.

Brata Wire Mokoiri mi bekim pas bilong yu.

Yu laik i kam moa long bagarapim nem bilong Katolik sios orait, yu i ken i go yet long Wantok niuspepa. Mi save gut tru olsem yumi olgeta manmeri bilong graun, nogat wanpela bilong yumi save wanem lotu em tru tasol yumi olgeta i gat wanwan bilip bilong yumi. I no gutpela long yu kirap sutim toktok i go i kam na tok dispela lotu i gutpela na dispela em nogut. Dispela lotu i trupela na dispela em nogut. Baibel i tok yu noken kamap jas bilong narapela brata, God papa i wanpela tasol husat bai jas bilong olgeta manmeri. Mi ting i moa gutpela sapos yumi ol pipel bilong PNG i no sutim toktok long wanpela arapela tasol holim strong wanwan bilip bilong yumi na larim God i skelim olgeta bilip. Nogat wanpela i makim man bilong graun jas.

**Angelus Pore
Pomberel, SHP**

Raitim gut stori tumbuna

Dia Edita,

INAP yu givim mi liklik spes na mi autim wari bilong mi long stori tumbuna. Brata stap bilong Enga provins i bin raitim long Wantok niuspepa No. 1369 Septemba 21, 2000.

S. Tab i bin raitim stori bilong Kulbob na meri bilong em Manub na tupela kros na Kulbob. Kapsaitim hatpela sup antap long Manub na em i bin ronawe i go daun long solwara na taninim hap meri na hap pis. S. Tab yu bilong wanem hap tru na yu raitim dispela stori.

Dispela stori bilong yu em i no tru long wanem Manub i no meri bilong Kulbob. Tupela em ol brata. Marub

em bikipela brata na Kulbob em liklik brata. Na stori em stori bilong mipela hia long Dimer NCR. Mi i no inap rait na stori long wanem em sikret na tambu.

Sapos yu yet laik harim gut stori bilong tupela Manub na Kulbob, orait kisim bas na i kam long Dimer na bai yu save na maski long raitim giman stori long niuspepa na tu yu belhevi orait rait long Wantok niuspepa. Mi stap sambai tasol long luktim bekim bilong yu.

Em tasol tenk yu tru.

**Thomas Nineng
Madang**

Sapos yu laik salim ol pas bilong yu i kam long dispela niuspepa, Salim i kam long dispela adres:

THE EDITOR
WANTOK NEWSPAPER
PO BOX 1982, BOROKO, NATIONAL CAPITAL DISTRICT.

* Yu mas putim nem na adres bilong yu wantaim na salim ol pas bilong yu i kam. Sapos i nogat nem, adres na sain bilong yu i stap bai mipela i no inap prinim.

Les long ol mekap Kanage stori

Dia Edita,
Mi laik toktok long stori bilong Kanage. Mi ritim olgeta stori bilong Kanage i nogat mining bilong en. Dispela em mekap stori tasol. Nogat mining bilong dispela ol stori.

Mi laik tok oslem God i wokim ol manmeri bilong em yet. Em i no wokim wanpela em narapela nogat. Olgeta i wankain tasol.

Na i luk olsem yumi yet i laik senisim han bilong God, na yumi yet na i no save kamap gut. Olsem na mi laik tokim yu husat i laik raitim stori. Trupela stori yupela raitim. Mekap stori em maski. Mi save les tru long ritim dispela stori.

Stori i gat mining. Mi save ritim, na i no save swit long mi olsem na lukim tasol. Mi laikim stori o nius bilong sios yu raitim mi bai interes long ritim stori bilong baibel. Yu raitim bai mi lukim gutpela rot.

Na mekap stori i no inap soim yu long gutpela rot, nogat tru. Nau wanem hevi wok long kamap yupela mas tingting gut opim ai na tingting bilong yupela. Tok i stap pinis long baibel nau. Yumi kamap long en kainkain pasin i wok long kamap nau long kantri bilong yumi nau.

Marit laip i bagarap, kilim man nating nating, sti, lai gris, pamuk-na planti pasin na olgeta hevi i kamap bikpela long kantri bilong yumi. PNG sanap long wanem rot nau? Bai yumi mekap stori tasol o? Yu edita yupela mas raitim stori ol gutpela yupela i ken printim lukim sampela stori i no gutpela lusim tasol.

Mi bin lukim tripela man ol bin komplek pinis. Nau em mi putim bilong mi. Long yupela mas lukim na skelim. PNG yumi tok Kristen kantri na olsem wanem na kainkain hevi i kamap. Nau, long luksave bilong mi, mi lukim bikpela hevi i kama long kantri

bilong yumi.
Bikos yumi yet i no save bosim maus bilong yumi gut kainkain toktok i save i kam long maus bilong yumi, tingting nogut i save bagarapim yumi. Yet tok bilong God i no i stap long bel bilong yumi sapos tok tru bilong God i stap long bel bilong yumi. Dispela hevi i no inap kamap.

Bilong wanem yumi i gat strong inap long takolim dispela hevi. Yumi i nogat inap strong, bilip bilong yumi i malum malum nogat strong yumi laikim tru papa God. Hevi i no inap kamap bikpela.

Yumi putim mani i kam namba wan, papa God yumi putim i kam namba tu long dispela na hevi i bungim yumi yet. Yu hust i laik egensim o sapatim mi welkam tasol.

**Mrs K. Naiwe
Karker Island, Madang**

Hatpela taim na maski long painim wantok

Dia Edita,
Mi wanpela grasruts mangi long ples Mendi na nau mi kam stap long Kimbe, Wes Niu Briten provins oil palm kantri.

Taim mi wok long oil palm long Bebere divisen tu mi lukim kainkain manmeri wok long kam long haus bilong Tobias Kundi, Sem Kat, na narapela man long Bebere divisen tu stap long ples Mendi SHP na kam stret long haus bilong Tobias Kundi na pinisim kaikai na mani bilong en long lukautim famili bilong en.

So nau long dispela taim, taim yupela husat i save kam klostu klostu long haus dua bilong en plis yupela traim na stop liklik. Turangu Tobias Kundi ya em i no save holim pen o wok long bikpela opis o wanem, em save wok long helpim kompani long kautim fruit olsem mobeta yupela manmeri long Kusa, Mamurikendin i mas isi liklik long go long haus dua

bilong Tobias Kundi.
Taim Tobias bin kam long Kimbe, long dispela taim yupela bin helpim em long baim sip bilong en o yupela baim PMV pe bilong en nogat sem bilong yupela lukim ol, traim sindaun gut long haus bilong yupela na tingting gut pastaim.

Tobias nau long neks yia long 2001 em tingting long sevim mani na kam long ples Kusa so mi no laik bai ol narapela manmeri i kam long haus dua bilong en na kisim mani na pinisim kaikai bilong em.

Larim em kam long ples na yupela husat lain brata, kandri bilong en plis noken na noken kam long haus dua bilong en Tobias.

Em mi autim liklik wari bilong mi long ol lain manmeri long ples Kusa.

**Philip Sendex Nycoo
Mendi, SHP**

Yangpela meri long PNG i no save laikim tumas man Hailans

Dia Edita,
Mi wanpela mangi Nipa insait long SHP provins na mi stap nau long Kimbe Oil Palm provins.

Mi laik mekim liklik bel hat bilong mipela olgeta 5-pela provins long Hailans olsem. Mi bin raun long olgeta 19 provins long PNG na mi save lukim ol yangpela meri i no save laikim tumas Hailans man.

Mi save lukim ol meri Sepik, Madang, Tolai, Kerema, Popondetta, Manus, Kavieng, Kimbe na Hailans save sikrap stret long prenim man Morobe na tu 15-pela provins ol yet save pren na marit.

Mipela ol Hailans nogat na nogat stret. Taim mipela man Hailans tromoi hap tok pinis o laik tok tok long ol yangpela meri. Ol i save kros na tok nogut na suruk olsem kindam na wel olsem malio long wara.

Mi laik tokim yupela yangpela meri Momase na Ailan riji olsem. Papa God antap i wokim yumi manmeri long graun i wanpela bodi tasol. Noken daunim narapela na laikim narapela tasol olsem Morobe, Sepik na Madang. Mi Hailans man nogut na yupela yangpela meri save les na poret long wanem? Mipela mangi Hailans save yupela naispela na gutpela meri Momase na Ailan rigon. Man, mipela askim laik taim tu i hat stret. Planti save hangamap long ol mani na ol man inap long kamap papa bilong ol na i no luksave long ol pipia mangi olsem mi. Dispela save mekim na mi save kilim tingting stret. Inap wanpela stretim dispela hevi bilong mi. Wanem samting rong long mi?

Em tasol long harim bilong yupela.

**Dickson Nipa
Kimbe, WNB**

Wari long senisim lidasip long Ambunti Drekkir

Dia Edita,
I GAT liklik spes tu, bai mi ken bekim pas bilong brata bilong mi, Lucas Apinur long mun Septemba, 2000.

Yes brata, Mista Lucas Apinur, mi ken ya John M. Waime. Mista Apinur mi wok long paul liklik long undastandim yu, olsem yu stap long Ambunti o Lae?

Las adres long pas bilong yu, adres Lucas Apinur, Ambunti namba tu pas ken, Lucas Apinur, Lae. Mi no inap bilipim yu no i stap dispela graun, yu mas stap long klaut o skai.

Tripela pas bilong yu Lucas Apinur i gat adres long tripela ples em, Mosbi, Hagen na Rabaul. Ok brata nau mi laik kam wantaim yu long ol gutpela tingting bilong yu Mista Apinur. Em hia:

1. distrik edministreta bilong Wau Bulolo Mista Bart Ipambenj olsem wanpela kendeit bilong Ambunti Drekkir long 2002 long laik yu, mi amamas long tingting bilong yu Mista Lucas Apinur.

2. Bilong wanem na yu no laik tokaut klia long niuspepa olsem, edministreta o Mista Bart Ipambenj em i bilong wanem ples distrik na provins? Inap yu Mista Apinur bekim o rait ken long Wantok niuspepa, na tok klia long ol pipel bilong Ambunti Drekkir long Mista Bart Ipambenj em i bilong wanem liklik ples insait long wanem distrik na provins?

3. Tingting bilong yu Apinur long

sanapim kendeit insait long bus, o man bilong bus, dispela mi sapatim 100% Lucas.

4. Olsem mi bin tok, 3-pela man hai Herman Massibor, Andrew Sapuko na Joseph Sukwianomb, ol i no sindaun tu long haiwe olsem yu tok long niuspepa, nogat ya, Herman bilong Kuanga (1) na Andrew bilong Kuanga (2) ai tupela i stap insait long bik bus tru bilong ples Wasambu Kuanga (1) ples Assanogor Kuanga (2) dispela tupela ilektoret Kuanga (1) na (2) wanpela nekleled ilektoret long provins, mi no save bilong wanem i olsem?

5. Brata Apinur, mi John M. Waime brata bilong yu. Mi kam long ples Daina, las ples Kuanga (1) Drekkir distrik ESP. Tasol nau yet mi stap long Namatanai, NIP. Brata mi laik tokim yu long wok bilong mi.

Brata Lucas Apinur, yu na mi mas putim tingting wantaim long kamapim sampela senis insait long lidasip long hap bilong mitupela Ambunti Drekkir long yia 2002.

Las long em, mi laik askim ol dispela 4-pela man hia, Herman Massimbor, Andrew Sapuko, Joseph Sukwianomb na Bat Ipambenj long go long ples na sindaun long graun tabel na stretim ol samting namba.

**John Waime
Namatanai, NIP**

Apim nem bilong provins bilong yu yet

Dia Edita,
Mi wanpela mangi save gat bikpeal laik long ritim dispela pas, dia edita, mi yet mi bilong Hagen, na mi laik putim aut sampela samting mi lukim we i no stret long ai bilong mi.

Samting i no stret i olsem, mi save lukim planti man na meri i save werim ol kola ti siot na ol laplap we i save gat print bilong lait haus bilong Madang.

Ol i save salim long stua, maket ples na long ol rot tu. Man yu husat save baim na werim o yu husat save printim, mi laik tokim yu stret olsem, dispela em Madang o Hagen?

Taim mi save lukim ol man werim ol dispela samting, skin gras bilong mi save kirap nogut long wanem dispela em i provins bilong mipela ol Hagen olsem na yu mas mekim sampela samting long apim nem bilong provins bilong yu.

Maski, ples i kol, planti maunten na vali nogat kokonas diwai o wanem. Yu mas save olsem dispela em papa God yet i wokim yu na putim yu long en yu mas mekim sampela samting long apim nem bilong provins bilong yu.

Maski long kopiket nambaut na apim nem bilong narapela provins. Traim kamapim sampela bilas makim ples we yu kam long en bikos ol narapela i no mekim samting bilong kamapim nem bilong ples bilong yu. Yusim save bilong yu na traime kamapim sampela samting long hapim nem bilong ples bilong yu. Nogut yu stap aninit long nem bilong narapela ples na dai ol manmeri sik dok we nogat man luksave long yu.

Em tasol wari bilong mi na husat laik sapatim o egensim, rait tasol i kam long Wantok niuspepa na bai mi lukim.

**Willie Doa
Mt Hagen**

Plenim kamap bilong kantri

Dia Edita,
BIHAINIM wanpela bikpela toktok tru bilong wanpela Amerika long plena i bin toktok na raitim kamap save bilong en long sanapim kantri Amerika tude yu i ken lukim em i stap olsem wanem tru long dispela graun nau.

Dispela lo plena em i bin i stap long 18 sensari em i bin raitim olsem, wanem samting yumi i mekim em bai i karim kaikai long ol yia i kam.

So tude dispela save bilong en i wok long karim kaikai long kantri Amerika.

Olsem olgeta taim mi save sindaun na toktok olsem, long kamapim wanpela strongpela demokratik develop kantri, i mas kamapim wanpela strongpela demokratik pipel, em we kantri tru i kamap long en, sapos nogat em i nogat.

Long tok Inglis i olsem bikos em bai i wokim moa tok klia. (To develop a sustainable, democratic and prosperous quality of a nation, is to sustain-

ably democratically and prosperously develop a quality of basis aspect of human integrity of life, is the fundamental existing of a nation building).

Pipel i as tru bilong olgeta developmen i kamap long wanpela kantri, taim i nogat pipel bai i nogat developmen. Long kantri PNG i senis liklik i gat pipel na risos bilong ol i stap tasol i nogat inap developmen, olsem na yumi i lukim olsem i gat ol kainkain tabel na hevi i kamap.

Long waneim kain we tru bai yumi i developim laip bilong ol pipel em tru long ol samting o kain developmen we i ken kamapim kantri olsem, gutpela, strongpela na save politik, ikonomi, lo, edukeisen, helt, agrikalasa, sosel sevieses, envairomen, sain (science) save (philosophy) demokratik pawa, sistem, pasin, save, developmen, lotu na moa moa yet, na God i mas i go pas long yumi wanwan.

**Philip Pais
Vanimo**

Plis maski so op long pablik

Dia Edita,
Mi wanpela skul sumatin long Mosbi na mi laik autim liklik wari bilong mi i go long ol lain brata-susa husat i save dres ap long blu-blu (plis).

Ol brata na ol susa, mi yet mi no save wanbel long wok bilong ol plis manmeri. Mi save pilim sem taim mi save lukim ol wok ol i save mekim i no stret long ronim ol pablik husat i save salim ol liklik kaikai long bas stop na tu saspek nating nating long ol mangi na sekim ol nating.

Planti bilong ol dispela manmeri i nogat wok mani bilong ol. Planti save salim smok, buai na kol wara long helpim ol yet na hariap tru ol plis i no save isi long ol. Paitim ol nabaut na kapsaitim sarnting bilong ol. Dispela i no stret. Hatwok bilong dispela ol pipia manmeri i save kamapim takis mani we i save peim ol plis

man. Ol plisman kirap na save komplek na tok mani sot. Husat bai kamapim, em ol dispela lain manmeri tasol. traim isi long ol.

Yu ting yu mekim gutpela pasin tasol yu kirap tokim ol dispela manmeri long go stil na kamap olsem raskol. Taim ol painim hat na nogat narapela rot, ol bai kamap raskol na bagrap sindaun. Noken ronim ol nabaut olsem pik na dok bilong yu long haus.

Turangu yu save yumi stap long siti na laip i hat ya. Traim larim ol pablik stap long laik bilong ol. Traim na mekim wok bilong yupela stret. Yu save gavman i save baim yu traipela mani ya. Wok bilong yupela em long stopim raskol pasim, pait na ol narapela we i hat long man stopim, na i no long ronim pablik olsem ol wel laon o dok nogut. Mi yet mi lukim olsem i gat rot


long kontrolim ol pablik sapos yupela laik kontrolim pablik. Na i no olsem ol laon na dok. Planti taim mi save ting ol plisman i no kisim skul gut long koles na i no save long mekim wok bilong ol. Yupela bin kisim wanem kain skul long koles? Yupela mekim na sampela mipela les stret.

Dispela wok we yupela i save mekim long ol pablik i olsem ol man bilong bus i save ronim ol wel pik long bus. Dispela i soim olsem yumi i no kisim independens yet.

Olsm na tingting gut na yusim het bilong yupela olsem ol man stret na i no olsem ol animals i save mekim nambaut nambaut.

Tenkyu, sapos yu husat brata o susa laik egensim o sapatim mi welkamim yupela.

**Iksy Haveva
Boroko, NCD**



PNG

BUSINESS

ISSUE NO. 326

DECEMBER, 2000

PAGES 32

K1.00

BUDGET 2001

*The first of the
21st Century*



**OUT NOW
AT YOUR
NEAREST
NEWS
AGENT!!**

PNG
BUSINESS
IS A
MONTHLY
PUBLICATION
OF WORD
PUBLISHING COMPANY



WANTOK SPOT



Nesenel Spot Institut dairekta i kamapim bikpela hevi

PAPUA Niugini Spots Komisin (PNGSC) i gat bikpela hevi tru nau long stretim ol wokman bilong em long Nesenel Spots Institut long Goroka, Isten Hailens provins.

I gat ripot i kamap long Wantok Nius olsem dairekta bilong NSI, Raphael Sapea wantaim wanpela wokman nau i wok long kamapim bikpela hel hevi namel long ol wokman bilong institut.

Dispela hevi i kamap bihain long Mista Sapea i kisim wok bek

olsem dairekta bihain long long-pela malolo bilong em long Australia.

Mista Sapea i bin kisim holide na go stap wantaim famili bilong em long Australia Institut ov Spot long Canberra we meri, Barbara Sapea i mekim sampela skul bilong em long kisim digri.

Eksekutiv dairekta bilong PNGSC John Kambuou i no save long longpela malolo bilong em wantaim famili long Australia, na

PNGSC Bot i askim sapos PNGSC menesmen i save long dispela.

Bihain wanpela wok painimaut, Wantok i save olsem Sapea i askim long malolo na joinim famili bilong em long Australia.

Tasol em i stap 7-pela mun olgeta, na em i abrusim malolo bilong ol Pablik Sevis we i kamap planti toktok namel long ol wokman bilong NSI.

Long Septemba, PNGSC i

askim Mista Sapea long surikim malolo bilong em na ol i ken mekim wok painim aut.

Na Wantok Nius i save olsem Mista Sapea i kambek pinis olsem dairekta na i givim planti hevi long ol wokman.

Eking dairekta bilong NSI, Edris Kumbruwah yet i no save long wanem samting i wok long kamap long institut.

Mista Kumbruwah em wanpela kontrak opisa i wok long mekim

planti wok tru long NSI olsem eking dairekta tu na olsem kosing dairekta bilong soka insait long kantri.

Ripot i kam long NSI i soim olsem Mista Sapea i no save rispektim Mista Kumbruwah long tokaut olsem wanem taim em bai kambek long wok na mekim Mista Kumbruwah i luk olsem wanpela skul mangi.

Wantok Nius i no inap kisim toktok bilong Mista Kumbruwah.

Unitech bai painim hat long OFC klab sempionsip

HENRY MORABANG i raitim

SEMPION soka klab bilong Papua Niugini, Unitech (Lae) i gat liklik sans long winim bikpela mani prais bilong FIFA long resis bilong Osenia Futbol Konfederesen (OFC) klab sempionsip long Januari 2001.

Eksekutiv opisa bilong OFC Tai Nicholas i tokim Wantok olsem Unitech bai kisim bikpela salens tru i kam long Wollongong Wolves, sempion tim bilong Australia na Napier City Rovers bilong Nu Silan.

Insait long sem pul, PNG Unitech bai bungim sempion tim bilong Solomon Ailans, Laugu United FC na Latoha'pai FC bilong Tonga.

Laugu United FC em wanpela strongpela tim tru. Long rekot, nogat wanpela representativ tim bilong PNG i winim wanpela tim long Solomon Ailan, olsem na Unitech i mas tingting gut.

Planti ol pilaia bilong Unitech em ol studen bilong Solomon Ailans i skul long Lae.

Wanpela strongpela sapota bilong soka i bilip olsem Unitech i gat gutpela sans sapos ol i lukluk gut long kain stail pilai bilong birua tim.

Arapela bikpela samting nau em, planti ol pilaia bilong Unitech em ol studen bilong Solomon Ailans na Vanuatu husat i skul long Lae. Sapos klab bilong Unitech i helpim ol long kam pilai, ating ol bai gat gutpela sans.

Unitech em i sempion tim bilong Lae Futbol Asosiesen long Morobe provins.

Wollongong Wolves i gat planti ol gutpela pilaia i save stap insait long Socceroos tim, em i nesenel soka tim bilong Australia.

Dispela Wolves tim bai yusim yet ol biknem pilaia bikos ol i gat tingting long winim dispela bikpela \$US1 milien long sapotim klab.

Na long arapela pul (B), Tafea FC bilong Vanuatu i gat bikpela sans tru long winim gem long dispela pul. Bikpela salens bilong ol bai kamap yet long AS Venus klab bilong Tahiti bikos ol i save kisim gutpela sapot i kam long Frens.

Wanpela sinia pilaia bilong Tafea, Noel Vari em tambu bilong ol Papua Niugini. Em i save skul long Pot Mosbi Yunivesiti na save pilai wantaim Yunivesiti soka klab.

Tafea klab i gat nem long winim klostu planti taitel tru insait long Vanuatu Soka Asosiesen.

Vari i tokim Wantok olsem em i amamas tru long kam pilai gen long asples bilong em. I lus olsem planti ol lain tambu bilong em, Babaga famili bai kamaut long ful fos long sapotim Vanuatu tim.

Bihainim dro, PNG Unitech bai salensim Napier City Rovers long namba wan gem long Januari 9. Orait long namba tu gem, ol bai bungim Wollongong Wolves na bihain Laugu United bilong Solomon Ailans.

Unitech i winim sans long stap insait long klab sempionsip bihain long ol i winim PNGFA taitel long Lae.



• Sampela ol pilaia bilong Fiji husat bai karim nem bilong Foodland Warriors long OFC klab sempionsip long mun Januari.

Gutpela Pis tru bilong PNG... Em DIANA!

PROUDLY



- Tuna kam long solwara bilong Papua Niugini Stret.
- 100% tuna mit stret, nogat bun na nogat skin.
- Planti mit istap long olgeta tin.
- Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.